



落落齋遺集



97.451
5399
247


47

Inches
Centimetres
1 2 3 4 5 6 7 8 9 10 11 12 13 14 15 16 17 18 19 8
TIPPEN Color Control Patches © T. Tiffen Company, 2007



招五草敘

丁巳乞假還里與仲達每過一驛余輒題一二語仲達第品之而已余謂子通體皆詩何以不詩微笑曰聊復作耳吾無行而不與子詩者問酬一二語便有空山無人落花無言之致別四年而寄我長安已哀然一編則吏廬山來爰書之暇經行寘坐公案也始歎天機清妙隨其所出欲落一俗物故無處著俗廬山自白蓮開社後緇黃之游者籃輿樓笠之不勝數青蓮題後其崖間水次之詠飛流濺沫殆復不勝瀚而獨淵明能千古此山者只爲其人不俗詩亦如之昔人秋菊有佳色句以謂南北朝人菊詩多矣盡菊之趣無過斯語他花不足以當此余謂淵明正無不佳彭澤八十日佳子令柴桑三十載佳于歸飲酒二十首佳于醉止酒二十句佳于醒飽則雞黍以迎客飢則叩門而乞食乞之也其諸異乎人之乞之也與然則乞亦復自佳矣子厚有陶之句而無其情樂天有陶之情而無其句此語殊不然淵明之外可容再有淵明耶亦



云得其意而已矣儲孟也韋柳也白蘇也皆意之近陶者也余即不敢罪過口語謬推一人于淵明間為參寥所呵若仲達者可謂得其意也矣可與言陶也矣虞山年弟魏浣初寄題

落落齋遺集卷四
招五草
如斗山城落星一點而五老眉橫天半寒
隅構一小閣揮手相招風倩響答時復舉杯遙屬高歌伐木之章
忽焉興至振衣以從顧視五老乃在予足下然則折腰五斗安在
無伸眉白眼時耶素月輕霞怪風積雪飢空得味觸響成哦即託
寄不同欣慨各別要使瀚肺浣墨以對五老其致一也辛酉夏書
于招五閣

落落齋遺集卷四

招五草

小引

如斗山城落星一點而五老眉橫天半寒

雲而俯瞰之予于署西

隅構一小閣揮手相招風倩響答時復舉杯遙屬高歌伐木之章

忽焉興至振衣以從顧視五老乃在予足下然則折腰五斗安在

無伸眉白眼時耶素月輕霞怪風積雪飢空得味觸響成哦即託

寄不同欣慨各別要使瀚肺浣墨以對五老其致一也辛酉夏書

于招五閣

秋仲修祀廬嶽祠因憩棲賢寺

行行山之阿山寫秋容素泉響白雲侵蟻屐每疑誤高陳匡君祠

俯落千層霧虛倚鄰白樓繚絡兩山左右顧當案湖映沙濃淡沙

頭渡飛觀五老峰絕磴三五路日斜促近遊萬壽名亦故寺荒佛

眼塵藤古石腰互礪道開深凹桂枝百可數轉轉飛泉平來水淵

停乳千片碧玉盤幾點白石拈歎息山中奇疏密松根護僧知平



可耕誰道幽堪臥息步人棲賢鐘鳴三峽怒坐久不知暝歸去衣
沾露

觀瀾閣用壁間韻閣近滕王

勞勞行役一登臺懷抱凌風得好開江靜魚龍剛入定簾疏雲日
欲浮來青山對出千秋眼碧漢孤懸萬頃杯高閣祇今誰作賦落
霞長憶子安才

晚衙閒眺二首

煙雲千頃坐孤城一洗鉛容別樣清怪得冰心人鏡遠霜寒月白
好申盟

一庭霜氣靜無譁拙政剛看罷晚衙好倚虛窗滄秀色坐來手煮
武夷茶

潯陽姚司李以遷行小詩送之

潯陽星渚腹背相望匡廬介其中兩司李行車滄宿瞪眼向人
卻不入谷簾一杯也予來後做我三年輒稱同好今做我以州

大夫賦歸雲間誓不執手板此後匡雲吾獨爲伴愧做我尊鱸
多矣賦呈一劇

姚子澹蕩人腰折江州吏文移挂笏了放衙理幽事予亦薄遊匡
相將五老睡一片香爐雲與君分曳被行車織潯干鄉酒拌予醉
慷慨發高歌蕭靜領孤意君說返故園小草甘獨寐酌酒試問君
毋乃五鬼祟五年飢欲死方州人所賦大夫浪擲手鄉里小兒刺
君曰心悠哉寒魚不可餌歎息送君行張翰今誰二

袁九滌使君覲行歌清風兩袖十章予代庖久喜公之還郡也歌
以迎之四首

清風兩袖朝天去還有香爐一片雲料得長安人不識歸來試與
小匡分

清風兩袖朝天去寂寂匡城夜月孤六案飛塵勤爲掃君看得似
去時無

清風兩袖朝天去落寞春山不共遊長說湖中了公事笑予禿盡

指尖頭

清風兩袖朝天去，滄勝樓頭放鹿眠。草色齊齊青不翦，去來清味

總悠然。滄勝樓公署中所名

五乳寺訪愍公

路入叢棘中，不識青山面。折歷松腳摩，草沒蹊如綫。滴滴五乳鮮

何處飛絕巘，溪回徑始平。翳盡峰爽見，愍公息深深。熊虎恣奇變

泉甘浮乳花，香靜團雲片。聊復理之言，五岳指端電。

九日袁使君招遊五老峰絕頂次韻三首

松露微微竹滿林，幽蹊可數白雲深。乍疑洞口來仙窟，不信人間

有佛陰。采藥香餘空外味，坐花清斷世中心。山僧細引藤蘿徑，五

老玄蹤何處尋

使君高韻淡于秋，況復秋峰千尺頭。飛酒臨風開紫霧，亂雲歸壑

卷蒼虬。煙寒遠水茫茫眼，星落孤城點點漚。搔手青天吾欲問，從

來仙吏幾人遊

風流遮莫負重陽，翦菊廬高興好償。嵐盡數峰凝晚黛，瀑懸三疊
濺輕璫。塵容耐可雲邊洗，傲骨偏宜天際狂。徙倚鐵船巖上石，祇
疑星漢落奚囊。

秋夜渡章江

每向章江歌懊惱，而今清思滿江邊。片帆輕渡橫波月，老樹斜披

斷岸煙。風動絲絲漁火亂，天空冷冷暮鐘懸。但教客路長如此，斗

酒吟秋吏也仙

小舟迎家大人以西久而未至風雨淒淒賦此二首

雨滴荒階靜風欺小牖寒。懶將遊子眼空逐亂帆，看秋老催鄉思

江長斷羽翰。吾廬盈菊把底事累豬肝

搖落今如此。江行更若何。蒹葭煙未了，鴻雁晚來多。雲薄憐輕袂

風柔卷素波。計程無近遠，惆悵雨帆過

雨中芙蓉

花入秋都淡，盈盈此可憐。力柔全褪雨，紅嫩欲欺緜。嬌意看成妬

羣餘怨未妍羞將桃李後故倚菊花天
白鹿洞答袁使君見贈之作

翠屏迴合轉巉岉百尺龍鱗倒影看鐘鼓虛堂雲靜落圖書深鎖
葉飄殘藤陰石古還眠鹿泉色霜分好濯肝自是紫陽重振鐸可
須李渤更登壇

課士宿鹿洞月下口占四首

長松蔭寒泉隙月墮深井驚濺老龍鱗散落千層影

山靜鳥無言月波冷可沐不道石上月還疑眠白鹿

渡溪芒屨溼兀立酒初醒點點松梢白疏痕幾箇星

言尋獨對亭相將松影去獨對者誰子問松松不語

鹿眠亭望五老

鹿眠亭上招五老縹緲輕雲不可掃雲行誰爲洗眉痕如黛如藍
復如縞日照明霞天半飛瑪瑙屏中映紫薇紺色酣餘青欲上不
知何處染織衣是耶非耶瞬已變山靈呼吸開生面五老千秋眼

自醒生面年年人不見願將白鹿嶺頭眠分我眉端雲一片
再用前韻

紫芝不共商山老黃石人間行跡掃屹向天門障玉屏羽扇綸巾
明素縞嶺末年年白鶴飛嶺外何人學采薇獅子夜擎承露掌鐵
船朝挂碧雲衣幻花空色指端變山中豈識真山面結廬其下會
有時百丈芙蓉月中見如聞咄咄呼孺子玉髓丹書但如此不見
當年十一郎白雲有約老何方

宿天池寺

崔嵬凌鳥道山勢與天分香靜千松月鐘飄萬壑雲鉢虛飢鼠立
僧定夜猿聞孤枕秋聲裏蕭蕭對此君

同袁使君遊石門卽事

招尋美幽壑景物若爲牽斷靄初封幕濃陰自度篔簹露于杉翠滴
霜以柚紅妍石棧雲深護溪春雪亂濺潭鳴龍欲寤葉墮鳥如憐
忽訝凌雙劍方知別一天峰尖攢齒啣苔豔簇裝髻乳竇靈光屬

雲根斧鬼剽碧霄人語響蒼壁水痕緣嵐影搖金鎖芝房挂鐵船

金鎖鐵船

危藤時駭鹿絕磴不飛鳶險奪前崖秀奇貪後壑鮮僧

攜夕照暝塵引夜燈傳飢煮胡麻飯寒披白露縣漏搖香篆信鐘

定衲衣穿曉磬敲山骨驚雷鼓石田過溪應問虎卜社未成蓮自

識塵非故誰知肺已滯好教畢居士名共謝公鑄

石門禪房揭止靜二字試以傷問之二首

問汝止云何萬法本無住澗聲流不息汝心在何處

靜中何所有靜中何所見十年坐蒲團錯認如來面

雪中渡章江夜行宿華嚴公署

飄零寒雨惱歸程江勢風騎辣膽行冰面好從團雪打布帆一任

怒濤橫渡餘泥草羸蹠滑溼盡楓煙驛火明旅席餘霜正淒斷巫

雲底事夢中生

繆采星矢弗納妾也今秋下帷江上乃得吳姬小詩問之二首

相思秋有雁那惜一行書蘇小丰應別江郎筆可如巫雲朝鎖夢

梁燕晚窺梳想得風流意殘紅綺席餘

劇有梁鴻操風情底事顛芙蓉江上好明月鏡中圓鳳管輕喉度

龍團素手煎無煩畱別院應使見猶憐

五月渡章江乘風下彭蠡

芥子書生膽衝濤五月寒龍吟如有訴風力若爲官帆半飛于馬

湖長淨可滄快哉驚定後不信洗波難

憶家大人西來之約二首

記得牽衣別蠡雲片片飛祇今雲在眼不見別時衣

去日悲秋晚前期下井桐無將嘯歌意零落桂花風

嘯歌家園闕名

除夕

寒雨淒淒隱小龕驚心客歲已除三紅爐不煖霜侵肺明鏡應憐

鬢滿頰斷掃名根從裂爆辛甜宦味且嘗柑何年團坐聽簫鼓說

到家山夢也酣

春日偶成

春風小煖拂霜姿，斟酌春心入酒卮。
學吏三年孤影瘦，登樓千點暮雲敲。
尊前綠萼憐同調，眼底青山好放眉。
阿母手攜春菜煮，喃喃早有索羹兒。

王葆真寅丈賦歸劍川次韻奉別

春風吹斷鷓鴣聲，漠漠寒煙野水生。
越客歸時雙劍老，吳儂愁處一帆橫。
吏分栗里真成隱，案入匡山別樣清。
君學挂冠緣底事，登樓長嘯轉難平。

夜行廬山道大風雨宿歸宗寺

路暝匡山下，疾風顛我車。
激射雨師怒，崩騰山鬼呼。
蘆火護明滅，戛戛石隈驅。
佛子忽開林，驚魄來招予。
馬嘶僕誼立，相駭澤中癯。
茶熟正可啜，獨坐捋其鬚。
雨亂隱清磬，風高度木魚。
喜怖了不異，是非定何如。

中秋酌季弟以酒遂至達曙

好醉他鄉酒，無將歸事題。
輕簫風雨後，清磬竹枝西。
雲盡秋孤月

星寒夜度雞幽懷，殊可數冰署宛招提。

對月懷魏仲雪時仲雪陟北雍

思子意何限，盈盈秋水東。
心將天際落，影在月波中。
寫得詩都覩，應知道不窮。
片氈霞自舉，愧我久樊籠。

自課

檢點三年事，峰頭五老知。
飢來貪煮雪，興至酷題詩。
傲骨欺風雨，閒情友鹿麋。
柴桑真吏隱，醉石是吾師。

秋仲芝山道中得家報迎家孺人遂兼程還郡阻風于左蠡渡五首

摘得桂花初釀酒，香驅走馬又西東。
飄零風雨芝山道，幾樹殘花入夢中。

昨日江鱗剖素書，都將歸事問何如。
可憐遊子牽衣挽，阿母其能學絕裾。

三將清夢數離憂，為許歸期二月諏。
只恐夢醒仍是夢，難將望眼

繫歸舟

遄返山衙慰母思石牛嶺上度金雞誰知星影催殘道渡口波橫
竟日維

盈盈斷岸望中分百尺湖波卷白雲贏得孤舟鈴柝靜秋風都是
楚騷文

憶衙中桂花

山衙蕭索如空山野草蒙茸赤土頑鑿池破底井常竭移得江花
無好顏咄咄老桂爾何力舉枝挺秀參雲間東閣孤迎旭日麗西
齋對立秋風間三秋見爾長十尺鮮青掩映薜蘿斑花神為我著
意舞花發年年跋往還相思不信夢中見下有仙子雲衣爛酌予
沈澹紫霞盞飄飄素影明雙鬟數聲鼓角斷殘夢遊魂牽絲不可
刪咄咄花神能御李濃香幻出素與蠻他年并州爾為主相招五
老點清班

家孺人來官舍三年憶外大母而歸奉衣沾袂行李蕭然寫詩一

章識遠離之痛

阿母攜兒來非為湖魚美昔兒帝京遊母思食停匕出戶誼朱旗
望眼閭空倚說道南康貧炊黍肉斷齒藜羹對兒甘豈學膏梁子
暫辭家務勞空衙坐鍼指慈悲教兒心清靜得治理兒將驕莠鋤
母曰矜勿喜兒瞋邑吏殘母曰令之恥瓦疏雪滿牀室逼暑常泚
買工築一椽母曰民勞止為願母加飡為願母著綺母曰無飢寒
不見門如水日昃兒呢飢婦嚙充耳母已含哺先烹茶手持簋
雞鳴兒出門驚夢戒薑芷東裝兒遠行擘果置袖裏兒如魚在淵
只道應如此甑塵問阿爺航米惟母旨酒脯與棗茶布絲枕簟履
滿眼故鄉物紛耳平安紙三年隙影過一輪彈指擬父曰歸助予
絲紛莫綱紀弟妹淒盈盈兄也歌陟屺問母何所思母有母老矣
迴腸喜懼雙夜夜夢千里子女豈不憐若箇平等耳歸去舊荆布
竹籠攜敝屣為語貧親知兒官只爾爾
送季弟東歸二首

落葉蕭蕭江上船故鄉千里一潸然不知何處重回首溼盡蒹葭
野水煙

采采芙蓉當酒錢青衫白露晚江天家人若問官衙事一片匡雲
在几前

君不見答仲雪

君不見十年讀書不讀律執筆披文喬面鐵又不見驄馬行來吏
折腰雨打塵蒙豪氣消小李一飲三十盞而今霜月凌醒眼佛子
捫蝨指膽柔而今激射飛荆板都無卓豎慰君思咄咄冰心云異
撰官貧如女貞不辱何足名況于司李冷如雪風驅劍削星斗橫
年年航米父哺我阿母煮菜廚無羹一官若寐何時寤舟飄車度
衣沾露五老峰頭清夢醒白鹿羣中伴魚蠹詩籤文管聊復爾月
影松風心眼素咄咄李生樊中鳥兩翼垂垂空矯矯坐對芙蓉長
憶君胸懷歷落知多少

舟過鞋山

何人鐵腳度天門蹋斷雲根蠶水昏一隻麻鞋流不去至今風雨
老龍奔

簡大來母舅

寸管年年食蠹魚酒淫棋癖近何如幾時鬪指敲殘月耳熱嗚嗚
話子虛

鍾陵道中憶家孺人江行

行行陟岵望歸舟搖落江天滿日秋清夢可禁潮夜打迴腸無計
水西流侍兒絮語三年事季子分消千里愁風日宜人隨意好輕
帆遮莫下蘆洲
候得南風再賦
好風江上送親歸想得窗紗映彩飛檣穩波容平似織帆懸岸影
疾于機聽歌漸說鱸魚美問郭遙看柿葉肥紫蟹瀕江如掌大阿
奴知否爲調飢
入署有感

霜路三千里孤帆向落暉入門看穉子別淚忽沾衣風信燈知報
江聲夢不違平生黽勉意于此宦情微

東林寺書示三昧上人

我來叩遠公謾謾松風語遺響滿空山溪雲不可煮人去虎亦逝
紛紛渡溪口一聲午鐘鳴傍徨不能去試問三昧師遠公在何許
開先寺同袁使君石亭坐雨

重到開先寺霜林酒色分都因煙雨意來就鹿麋羣絕壁迴寒瀑
孤亭鎖溼雲寒衣還促飲侵袖已紛紛

宿黃巖

寂歷幽巖上山僧一草菴片雲棲冷衲雙劍影空潭風雨孤燈夜
人天短塵談蟄雷驚嘯虎枯夢不成酣

曉起白雲滿壑遂披雲緣磴而下
洞口山猶碧人間路已封霏連銀海雪浴出紫霞峰弱水盈盈合
支機處處逢定知雲下者縹渺望仙蹤

仲冬六日宿鹿洞有懷示諸子二首

良夜何迢迢松風發深省廓然餘寸心而沉幻身影寒鴉巢白雲
高棲謝塵穿機冥色亦忘斂翮旭還遲至理悟消息達士亶云靜
峩峩五老峰宵紫朝復碧點綴託雲霞千秋此白石野花春芳菲
絲霜菱陳迹試觀洞口松亭亭自膚澤空華眾所豔素心各有宅
壯懷薄青霄志士恥倖獲曳裾何太勞委運詎不適
再訪愍公

霜林點點翠微中乘興還來叩遠公冷衲臥穿雲自補殘經詮斷
葉初紅浪猜壁影原無相爲問禪關到底空兩度塵玄渾夢景相
看遮莫是飛鴻

適有亡婢之感愍公來索新曆走筆代簡

昨日朝雲誦六如朝來佛印忽貽書正于寂際觀生幻何必山中
識歲除塵業無邊思法雨宦情空擬學寒魚大師願力深同海爲
乞禪燈照冥車

不寐

寂寂深更轉漏遲夢餘千縷繫人思纔驚玉碎添新怨未褪衣香
憶舊時機畔寒蛩聞悄語竹西涼月掩愁眉年年孤枕冰心在不
信芳魂恨別離

學博王君以雙瑞圖索題走筆贈之

我觀五老峰崔嵬落星斗千秋霞色鮮兒孫眾培塿掃除金碧妝
素骨凌霜久郡與峰爭寒吏亦傲素手王君首藉貧羣中矯鶴首
問君源何清上有鶴髮叟解推今所希人矜鄉祭酒阿母正齊眉
甲子各逾九斑爛滿堂前繩繩絲在藕我觀雙瑞圖五老伯仲否
采將雲滿筐拾得芝盈缶白雲翦作衣紫芝甘可剖君且歸去來
持此介眉壽

除夕得家報

呼兒鬪彩若爲嬉惆悵家書攬恨時雪打芳口休爆竹酒消殘淚
罷題詩多情此夜成春夢薄命何年不鎖眉珍重雙親憐憫意九

原應遣淑靈知

奉和袁使君題籜雲橋之作二首

崩崖如削走鳴湫山骨撐來鳥道浮金井舊傳三峽曉玉淵今帶
五峰秋雲根倒影懸青壁霞幙飛空接素流閒月停欄孤鶴遠相
看直作廣寒遊

翔虹初下飲山湫漱出層層碧玉浮壑隱奔雷堪對嘯窗寒澄影
更宜秋寒煙兩屐微鍾度暮雨千峰倒檻流鐵笛吹殘問樽酒孤
情不數六橋遊

題陳孺人灑淚篇

孺人之死也人以慷慨烈丈夫奇之余獨謂吳公數嬰其阨孺
人早聞日者言沈吟數四曰惟我死可以代之此豈區區烈丈
夫事哉生則緹縈死則紀信孺人可謂殺身成仁矣
虎冠者何雄一紙雷霆薄檻車躡飛霜志士矢溝壑慷慨丈夫難
何乃碎柔魄捐軀代君子從容酬宿諾一死悟聖明孤臣生有託

血碧謝緹縈義氣翔寥廓只今湖濱虎跡稀斜陽黯黯愁雲落
答瞿起田年兄代簡

千里連江樹三年杳夢思永懷看月墮芳訊到梅時琴淨君孤瘦
山清我自宜拍肩如共語應笑滿頰髭

袁使君榮遷滇憲賦五言二章見別次韻奉酬兼以志感二首

朝浪紫岫霞夕吸青松露疑是白香山寐身今忽寤雲綺紛縱橫
湖山入吞吐錦囊貯已盈甌塵亦其固風流憶何許敲韻寒鐘暮

公自號
寤白

弱羽初試飛迴翔多畏色覆翼得所依飛鳴各相憶俊翮忽冲霄

風雲天際逼嗟予獨羈棲寒煙渺鄉國知音曾幾人肝肺詎忘刻

送別袁使君子棲賢寺小酌籜雲橋望五老峰二首

送別匡山中酌酒邀五老眉影天半橫輕翳淨如掃青眼爲君開

飛雲贈遠道遠道一迴首煙霧迷深草何處最相思峰頭孤月皓

靈境千年闕一朝敞幽界飛梁架絕壑蒼壁龍鬚挂響奔玉瀑寒

乳滴石雲怪級級淙鏡涵高下迴波灑戀別此徘徊他年魂夢債

孤興篇小引

丁巳春暮仲雪方偃臥匏園予迫選期杖策獨往書生散骨將就

羈繼引杯撫劍寥寂寡歡灰沙故來相勸率短吟以謝之跋程六

千逝日百八十選言三千有奇蒙塵叩缶其是謂乎石照居士書

登金山

平江峰一點簇簇到眉青蹊斷參差石廊迴上下汀穿林捫弱薛

躡閣敞疏櫺懸磬流空響飛霞影翠屏徑從僧熟引泉好汲餘聽

萬斛知龍噴孤根仗佛靈塔尖有草宿臺畔幾人醒祇疑清夜月

坡老嘯孤亭

妙高臺

孤岫凌江面高風淨石泥雲浮千嶂合日漾萬波嘶檣影危欄動

鄉煙極浦迷何時聞嘯傲酣望月輪低

十八遊醉翁亭追憶金山之勝卻寄魏仲雪

飛花白白趁輕遊勝境都爲洗客愁學士曾過泉尚韻醉翁一去
澗空流登臺倚石孤吟斷參佛看梅清梵悠回首思君天外遠懸
知來往北山頭

亭有老梅
文忠手植

度關山有懷舊遊仍次裂字

我愛秋山雲片裂春雲澹蕩山光絕我愛空巖雪色奇飄飄飛絮
濃于雪幾度關山幾度思素心未許簞塵沒公孫巧獻妾婦容長
孺自守丈夫骨功名富貴各有時豈論區區工與拙稽首神前無
所求清心何地不林邱若教斷卻嵇康懶碌碌折腰安足愁

濠梁

濠水浮今古儵魚閒上下客心何茫茫愧此觀魚者

雨行

春路翻蕭颯淒寒惱絮輕已多離別意况復雨風聲隄滑敲車度
雲昏趁草行此時故鄉子燒筍聽嘒鶯
春日旅懷得四支十首

蕭蕭古驛點更時惆悵紗窗月影移自是孤懷容易斷不關清影

亂人思

祇有白雲迷望眼那知青柳已飛絲春風吹得花點點九曲迴腸
寸寸思

漫道寬心應是酒纔貪酒白又停危愁來醒眼還疑醉醉裏紛愁
似亂絲

膝下難忘捧檄思翩翩裘馬浪分離五更零落千行淚夢到親闈
問寢時

鼓角初殘鄉夢縻僕夫啣啣歎行遲閒情眞合青山老嬾癖那堪
黑帶欺

驛亭客夢醒何日積得千愁半別離我有離愁并寄與莫教日日
苦相隨

飛沙陣陣染雙眉不管昏眸并裂肌一片冰心知在否若教俗卻
倩誰醫

列炬鳴騶官道馳
迢迢只見草參差
江南夜色還堪憶
點點村燈吠犬時

笑殺江南輕薄兒
垂鞭柳陌浪情癡
可憐滴滴青如許
分付春風好護持

吳水吳山長是夢
燕雲燕樹強裁詩
詩成回首三千里
夢裏悠悠總不知

送春二首

忽忽驚春暮
勞勞笑此身
好花誰作伴
落日一征人
古道殘碑出

鄉思芳草親
別離蕭颯久
不是爲傷春
驛路縈歸夢
風光信去流
三春殘日影
孤客暮雲秋
零落憐飛絮

東阿飛沙

黃沙倚風驕
顛狂著空舞
蒙蒙煙霧中
毋乃侵肺腑
肺腑幾人清
風塵自今古
安得臥青山
臨流閒閉戶

德州道大風

顛風蕩輕車
搖搖驚欲墮
眼從亂沙打
身如敬器坐
震撼挾雷霆
崩摧萬木臥
風威裂膽寒
肅心祇天怒

偶成

亭亭嫋嫋十三餘
絲髮鬢髮覆額初
不必阿嬌金屋裏
好將清月伴芙蓉

初夏發良鄉回節驛

驛程過固節
望眼入長安
氣煖知依日
風輕好整冠
襟山西映紫宸極
北浮丹自笑迂疏意
徘徊擇木難

同王念生遊慈壽諸寺因宿摩訶菴

郊遊憩塵想
次第訪祇林
清淨蓮花落
莊嚴寶口侵
午眠酣佛日
跌坐證禪心
謾謾長松下
時聞清梵音

次日登玉泉山華嚴上下洞晚坐史氏竹亭薄暮乃去

洗出風塵眼
山容仔細看
看到來盤礴
意賞此曲迴
瀾洞杳雲根出

峰平屋脚寬翳然竹林好秀色飽供餐

碧雲寺泉亭小雨

千巖隨意碧眾壑自停雲是處濃濃抹幽泉細細聞雨聲勻落子
荷意媚輕裘不盡蕭疏致悠哉對此君

月夜有懷魏仲雪舊遊

永日炎氛薄夜色散空涼微微漾星影纖纖流月光塵淨雲輕迴
佳哉素秋妝秋妝寫君骨鬪指念君狂有時幽隅拱勝乃月際印
醉眼青復白飛揚意難忘君今空山屐清嘯彈新篁而我凌孤翼
撫影幾迴翔襟期豈在酒太息非離傷看取悠悠思片月皎相望
田枝鹿畱兩燕姬單車錦旋予既別緒縈懷兼感其意遂同邱信
之酌酒歌以送之

伊昔秋風走馬歸取次高歌煖別離天涯兄弟畱連意吳客悠悠
雲樹思青柳低眉月在眼江山遼落懷何限迢遞征車去復來若
箇纍纍墨綰酒豪賸有淮陰邱田子雙娥婉轉畱一朝去我臨

汾道瑟瑟雲寒月影秋可惜秋聲斷雁羣可憐孤月冷巫雲修蛾
澹粉入宮妒趙舞燕歌緩送君君行不必頻悽惋念取柔情誓且
且拙哉照膽與守宮貞心轉石石應爛感茲酌酒三歎息羽聲慷
慨慘行色飛鴻泥爪亦偶然青山明月長相憶若過易水弔荆卿
莫道今人不如昔

七夕得陰字

昨夜梧飛井秋風度翠陰白雲遊子意赤岸故鄉心

赤岸余家里名乞巧

誰家女和鳴幾箇禽可憐燕市上元自帶吳音

秋之仲外舅斗垣翁周一甲子小詩爲祝二首
甲子初迴秋半時當階淨月照深卮漫看弧矢孩心在若箇兒孫
老眼宜身世儘容棋局穩風情剛好秫田遺尋常擺落閒憎喜大

雅令予動古思

蕭蕭素業澹隨緣落落閒懷幾醉眠不學王孫豪白馬好將心事
對青天一經老去衣冠舊百慮寬時髮齒堅小隱鹿門深歲月滿

庭蘿薛已蒼然

李元鎮道其弟仲鎮好遊竟客死立岳下弔之

謂遊足以死牖下者誰子幻形等歸壑千載竟誰是之子有宿緣

五岳半錯趾高情癖泉石深山友鹿豕捨得煙雲觀譜入飛仙史

若道武陵源把臂入林矣危峰影翠嵐幽洞流石髓几骨礙凌空

神遊躡雲軌祇今立岳顛縹渺挂屐齒

除官後口號三首

嬾于吏局問雌雄星渚何緣入夢中酒韻文心收拾去刑書官格

好磨礪

纔掃書生筆硯緣又提十指課蒲鞭年年活計憑枯管簪筆何人

日月邊

歸心日夜繞江干贏得歸時菊可浪傲骨而今剛半折籬邊莫作

簿書看

旅次寫懷二首

矯矯風塵翼去去山澤居行役古所歎遠道渺愁予青山有好顏

相將引迴車車行駕飛雲山青落日餘巖棲懷靡及目眺空躊躇

寄問東籬菊枯菀定何如

我昔盟秋風野芹白雪煮深文詘蒼鷹望腹笑鼯鼠波濤濺擊中

投足慮多齟齬來五鬼驅名字落星渚俗簡澹無華廬峰秀可茹

高衙風蕭蕭流雲靜楚楚行矣及秋風矯首風前語貪泉苟不酌

簿書足容與里婦拙爲容聊復理機杼

鄒道阻雨宿小菴二首

天意蘇東郡風雲千里同殺蝗雷卷地驅魃雨乘龍孤客窮途日

懸車破甑中那知燈一點夢入小龕紅

津梁疲佛子衲鉢小因緣放脚如如地枯心得得禪鐘飄僧欲定

雨灑法無邊只此茅茨下居然穩客眠

初入徐州道晚行

澹澹秋容寫碧時殘霞點點度輕帷天垂平野星分影地坼東南

月半規幾陣飛蝗催客淚數聲絡緯擣歸思當年放鶴人何處一
為停車問酒旗

張仲餘為其叔秀湖君索贈走筆寄之

大江浩渺君山碧秋月飛空掃片石高歌醉月誰其主慷慨夙聞
君好客君今六十意氣深孺慕依依孝子心不學王孫豪擊劍笑
殺村兒守瓮金公府旌辟亦何有篤行共推鄉祭酒祭酒文章今
在否風流肯落前人後齋出祭酒
水南公

懷魏仲雪卻寄

友道是耶非高歌懷采薇浪將之子別何處好忘機月澹青蘿冷
江清紫蟹肥牀頭酒應熟為我浣征衣

簡繆采星二首

昔兆長庚夢今傳太史書千秋吾子在隻眼幾人餘世法思平淡
文心問密疏秋容剛寫碧靜理近何如
廿載論文意飛揚不自禁笑看童穉日款語弟兄心露靜松參影

鐘寒月滿衾蕭然冰韻在遮莫浪浮沈
渡淮雨行歌以自遣并示仲餘

君不見長安道上沙暗天面眉顰黑毛髮鬢又不見三日一風五
日雨顛蕩輕車泥啣股樹杪煙含雨氣濃風飛雲亂天濛濛此時
高樓紫簾卷山光黯淡雨聲中而我何為羈客夢浪分沙雨摧張
仲慘頓衝震度斷淮急槩翻波箭機送搖搖命寄片帆輕恰上平
隄鏡鼓動征人慣說行路難戶庭若箇劇據鞍逢途之蹇行跚跚
飄風颯颯征衣寒風風雨雨已如此況復長安變朱紫芙蓉灘頭
月正明高歌問月且歸矣

月夜度磨盤山

山顛月半規素華流千頃月波冷可掬山容空寫靚鳥道石鼻尖
高原遊目騁正作透迤觀懸車忽倒影下方散凹凸露草宿深井
疏火馬蹏青杳杳棲雲屏山窮觀亦止車迴空引領獨招明月來
古驛共悽靜

關山嶺

百尺懸崖日影翻誰將鬼斧劃天門當關氣入東南壯作鎮形分
淮甸尊車馬度殘空外馨雲煙浮合望中村何當坐擁千山月長
嘯山巔月滿罇

余凡三度歌關山矣漫續短章

山骨亦可裂石堅不可缺不磷良獨難世事問巧拙茲山削徑奇
登登梯級絕車馬無息時下上紛相啣勞逸雖云異巧拙共斯轍
去去任夷險淡緣聊白說頑似山頭石心是山頭月

江夜

靜夜澹不波嫩沙恰半吐如聞悄語聲疊疊紋可譜

簡黃贊伯

叔度千秋字風流今在茲清來看骨瘦一往故情癡布子燈青後
論文月白時心期兩兩合端不愧吾師予與贊伯同游吳
巒釋先生門故云
春暮偕仲餘走長安秋半賦歸予行為匡廬客矣書此畱別

揭作長安夢春風忽度秋與君回首意同是望雲愁酒熱嗚嗚語
燈青皓皓眸襟期良不異野性復何求

桐江行

江流澹蕩兩山迎高帆挂向晚霞明快哉長風破萬里舟行點點
飛雲輕此山此水競窈窕誰何嚴灘復垂釣天末一絲縹渺懸天
上客星今古照人盡魚也貪其餌之子披簑空外嘯風迴帆落倚
沙村水靜山眼對舉罇一杯酌與桐江叟渭濱罷釣今何有
倚雪篇小引

吾向嘗以意為詩多無韻之哦不解法律恐為所苦兩年來遂罷
去客冬北上乍履山川飽滄雪月亦復欣然字句點綴而思短手
疏孤吟無緒輒又罷去七月既望偕仲雪南還韻士之心口語目
笑無非詩者心雖枯頑見之躍躍有喜行來飛觀寂想渡流澌陟
危嶺晦明風雨之變友生廓落之懷每兩人寤歌率然成韻正如
秋蛩之鳴天機偶引而伸雪間繩我法眉目稍具嘻官格極我飛

沙蒙我仲雪以清心沃我三者未知孰勝今詩囊往矣吾初入里門酬應紛紛詩腸一去還可從仲雪索之否丙辰秋分前一日書于瓜步

東河道中雪山

雪徑亂山橫山如束帶乍疑縹渺中仙子飛征蓋

孟嘗養士處

古木寒鴉起暮煙祇今猶說孟嘗賢三千食客知何在賸得雞鳴

狗盜傳

得家報寄大兄

帝鄉春色好柳絮亂如絲嗟予念遠道乃在長江湄兄也予良朋拍肩拾草嬉夜午撮酒脯鬪指雜戲棋總角讀父書分經禮與詩兄時欣博覽予亦喜探奇筆舌俱不俗巧拙互有之高談先輩矩風雅亦吾師世眼青復白專愚謝雄雌雙作江郎夢連下董生帷擁褐鐘聲寒抱膝松影移選言標綺素裂紙故劄思靜夜憶親訓

感歎涕交頤甘苦十年事黽勉一舉旗曲江飛袂遊回首白雲悲素書故鄉來佳話忽紛披阿翁折屐日阿母加飡時孤窗理前緒簇簇上雙眉裁詩凭寄語何如棠棣詞

自述

懶性何多畏幽蹤亦偶然每因顛倒想悟出俗因緣禮法應非我道根疑是禪息機聊自逸澹意不須詮落落宜于酒悠悠好去眠坐餘窺鏡笑興著看山顛有客思敲子無言欲問天長松許作伴野鶴定相憐情死思前達勞生避世賢行藏殊未卜腰折阿誰邊

懷口集之

臨風思口子相對一高歌倚爾千秋意平茲世局波情癡緣采劇

閨思

一簾月影上疏桐無那離人在影中剛卸玉釵搔首望淒清何處又孤鴻

望東阿山

山色蕭蕭帶遠天，輕雲如蓋覆山眠。是濃是淡山無語，此意吾將問米顛。

晚次東阿野望示仲雪二首

疏疏樹色點山彎，淡淡秋容落照閒。不是君心清似水，何人共我

說青山

雙車徐帶遠山行，行到疏林軫一停。半樹半山雲外合，天空日落

總浮青

過新城弔荆卿

壯士有奇客，徘徊欲與俱。卻憤太子意，慷慨遂登車。白日寒

濺車，何足歎。所嗟偕豎子，成功良獨難。吁嗟乎功不成，兮非術疏

豎子怖死壯士孤，不知當年客誰在。悠悠此恨空千載。

去冬過東省，饑民食柳皮。柳盡白，今復成陰矣。

官道依依柳相憐，我舊過霜根膚轉嫩。秋葉態翻多，昔去同慘淡。

今來解嘯歌，凭君青眼看。行客好風波。

紀夢

恍到蓮花地，將無現宿因。心空瞻大士，僧說此真身分。得巾箱祕

看來玉樹春，初禪參不透。誰爲洗鬢塵。

紀行

漸喜青山近，生憎驛騎遲。秋風解送客，老樹似迎騶。驛驛驚官擾

山山洗我愁，前程殊未達。夜漏已添籌。

車中偶成

行行過魯地，秋氣正蕭森。塵面羞山面，文心映水心。蟬高時斷夢

風爽一開襟，無限躊躇意。荒碑古木陰。

憶家園

爽水盤層松，曲曲閒自瀉。疏竹不盈畝，臨水自瀟灑。小樓兀其中

倒影月明下

予受知荆溪周老師，輒深國士之感。耿耿此心，寄之短篇。

志士悲遲暮而余早致身十年塵凡硯一日傍楓宸白項慚知己
青眸見古人願言敦素節未敢負陶甄

彭澤山行

山形蹲兕首石嚙趾難受步之恐或蹉與人何赳赳忽復列平疇
知出層山口遠望一山青未知其名某想得蒼蒼色其下可招耦
清賞興何窮欣然思村醪所喜渡江南數日剛餘九

曉山

每憐滴滴晚山蒼曉景于今始一望映日初浮酣絳色籠雲徐褪
嫩青妝遙看宿鳥過層嶺恐有幽人在上方便擬褰衣天際躡攬
將佳氣貯奚囊

渡淮

勞勞嗟遠道六度入濠梁始酌甘泉味纔聞秀穗香雲情如素熟
鳥道亦吾鄉只此南中景歸人早欲狂

過關山

去年霜風吹指裂山容黯黯愁雲結今年山容為我開蒼苔浮翠
點山骨下車指顧四山間似有樵人雲際躡廟貌峩峩再稽首落
落我懷神所晰不願炎途鬪劍鋒但願清齋煮白雪請看過客競
雄心若箇雄心不銷滅歸去來兮意悠悠芙蓉寂寞江之洲好將
一片江頭月酣對高歌洗客愁

懷方孟旋

每恨吾生晚于君見古人如何老衲子卻現宰官身道貌凝高韻
婆心點世因茲生真穢土說法且休頻

渡江別魏仲雪

僚慄在遠行蕭瑟悲秋氣問誰連袂飛超超阿龍魏先號龍起日夕塵
燄裏總脫腥羶味筆尖落青山點畫浮空翠吾端寫幽憶滿眼邱
壑趣車行午後先心賞遙相謂古驛引杯雙孤燈分影四洗我俗
腸空指我詩律細鬪指兼拍歌敲眠枕我臂揚帆瓜渡頭我怯君
乃厲風柔浪不驚濤聲雜榜柁焦山似畫鷗金山如螺髻疏雨帶

飛雲空蒙亂天際飄舟幾迴旋忽失蒼茫勢昨日羈客心今日故鄉意所恨同歸子旦夕催分袂明年早著鞭相將共攬轡

閱季弟文喜而有作

勤勤讀父書十指博五斗阿兄賜眼枯青衫曳履走力田問逢年
弓冶顧其後嗟哉文不易世澤可廢否竭來倦翼餘季也洗我垢
指點新穎浮落句手如口慮汝心鴻鵠念汝影孤耦玲瓏兒子心
賢冠亦何有狂歌明月前飛揚百杯酒

學餘草

月下同友步松徑

松際清流影蒼苔數行跡徙倚聽波聲上有玉露滴素心追太古
立言永今夕月落未應眠爲君煮白石

除夕

閒心驚爆竹孤影冷燈蛾豈是希夷寢經年一夢過
送春

倏忽春光去聞鶯一悵然昏昏長似夢樂事又無緣

雨中閱楞嚴

坐來成小隱靜悄不聞囀細雨鳩鳴午輕寒燕語雙法雲初覆地
貝葉爲穿窗縱有凡心在看經也欲降

晚涼卽事

清風動疏竹高枕北窗閒偶逐飛螢起時看好鳥還月當天未淨
人入夢中間碌碌炎塵者何如此閉關

雨梅

梅含疏雨別生春幾點花稍灑不勻折得一枝應自遠遠香清絕
瞋花人

閒懷

離恨年年在懸情夜夜深春風不解意吹落海棠心
晚飲菜花下

黃花覆地映清樽遙見籬邊雞犬行細草纔沾夕露溼遠山猶帶

晚霞明村家煮筍纖纖供童子烹茶淡淡傾興劇歌聲頻促板何妨卿我復卿卿

偶成

鷓鴣深樹鳴何處不關情巫山元是夢浪道雨雲行

夏夜

犬吠人初靜蛙鳴夜正幽書空多怪事問影亦何求

和陶飲酒十二俱拙直無餘味今存其四

人生有真樂睠此目前是會心豈遠求無譽亦無毀懷想在黃虞

境界當爾爾水流復何心風至教文綺

閒行曲欄外舉目見花姿籬筍滿園中飛鳥棲叢枝升沈朝復夕

林木景多奇悠然意自領性拙淡無爲此中苟無累世網安足羈

渺渺天際遠秋風來肅然木響葉頻飛靜悄似深山開卷知千載

神往太古前俯仰自優游杯酒聊結緣

芙蓉低映水依依取人憐繇霜摧其英旋失向時妍所以貴松柏

亭亭歷歲年丈夫自有志寧以世移遷

白下送友歸吳門四首

旅邸乍逢君論交一杯酒悠悠千古心雙劍寒星斗

秋風催落葉惆悵送君行別思知何許江濤夜夜聲

姑蘇千里道四望暮雲深日落孤帆遠相思何處尋

去去從茲去蕭蕭木葉愁離人無限意寄向大江流

擬怨歌行

夜風起兮宿鳥飛羅□□□□□□□□□□芳恨悠悠

兮不能忘星寥落兮橫天□撫孤枕兮發浩歌人心險兮口生波


起徘徊兮怨情多仰問蒼蒼兮奈遠何

如夢令

庭院紫薇誰伴樹上鳥嘯聲亂畫長人正眠又被蟬聲驚斷長歎

長歎初放芙蓉滿岸

落落齋遺集卷四



落落齋遺集卷五

西臺書牘

上
答劉康谷父母

老父母冰心卓識掃清衙蠹既使區書無所容其那移則錢糧清
使差馬不得下鄉則貧民安歌頌已徧窮鄉矣今所亟望舉行者
革汎地快手使雞犬夜盜免廟寺村墟時聞弔拷之聲爲第一義
其他惠澤自次第均沾神君妙用非迂拙所能仰贊萬一至官戶
之糧敝邑較爲獨少從前掣肘在胥吏侵漁數千似不獨在此項
但未能先完以爲民倡是用愧心若老父母寬而漸督之如舊例
以十限爲率則治生輩斷不敢獨作頑民也其官簿少載老父母
已洞察之但流水簿每晚收進貴衙不落胥吏之手則洗改路窮
自無他弊此亦老父母明見所及不須更贅也謹此以復明問再
諭黃冊紙張乃紙店事豈敢以冒罔利之譏儻有以此干瀆者必
屬假冒統望以三尺懲之非地方公事愚父子素不與聞非面請

札陳知老父母必弗垂聽也辱下問之雅敬布腹心

又

再領台誨神肺爲清老父母畱心民瘼如置赤子于懷嗚飢號寒
撫摩備至今農夫野叟所喁喁而望者惟是農忙舊例百年相沿
每至五六月催科句提悉從停止往牒具在萬口同然卽功令
森嚴徵檄火迫老父母實有仰屋之歎然爲民父母首重農時民
亦有心決不忍負勿以從來相守之善政頓自今年廢之以爲後
日口實也老父母若單摘欠多不及五分者另示提比則奸頑知
警仁義並行卽使官戶不在農忙之例治生輩亦甘之矣鹽臺公
祖觀風試計藻鑿之下妍媸已分家兄應靈卷似勝前時兩試不
審可得特拔否家弟應星已蒙注意又前所面懇表妹夫夏寶忠
傑識英詞名駒汗血尤家姑丈諸子壻中之超異者各以其卷附
求破格之拔陳幽風而歌棫樸知愷悌君子必異于聽矣媿媿不
罪

又

向以農事仰乞神慈雖蒙寬及旬日已不啻三時甘霖矣葑菲不
遺不勝感佩敝邑諸生旣幸進而教之竊于兩題中窺老父母明
德新民之學本之于無慾之剛夫無慾而要之以止至善則亦無
倦之說也敝邑之民沐浴化詎有量乎一二社友向從都下時
先懇垂青皆素屬人望非阿私所好至家兄家弟已辱收之門牆
老父母文章宗匠應垂隻眼之觀又不敢內舉爲避矣仰體憐才
之念雖私實不廢公想不以瑣瑣爲罪

與魏仲雪

孟春初得兄前歲仲冬之札并惠敘言恍然相對者久之是後奔
走半年始得脫手六月入里七月北上十一月假還一年之中往
返數千里都不得有白門使人通一音耗今春之季過虞山晤叔
子知兄已持籌關上竹頭木屑中應不減雅人深致耶弟前歲亦
曾強與兩月是時爲初清宿穢力洗惡聲不似部關安而不貧然

知居此者口眼手足一刻不到則百蠹叢之凡所爲商患者非官而左右市儈之類也要惟勤而清而恕足以消之可以造福可以長譽否則惡聲蒙之不可不畏也兄素心密理下悉苦甘不須弟屬而見今可申忠告者正不得外此要著也弟以懶而澹之性乃居是非風波之場將爲容容免咎乎將爲矯矯博名乎將順流而安波乎將迴瀾而樹幟乎將趨炎而效顰乎將占風而望影乎度皆兄之所不許也宜拙而直毋曲而逢吾黨有人心期未改落落之素其寧敢負同志乎雖然已陳之唾拾之無益孰爲方今第一勝算急宜建白者乎孰爲方今第一人才急宜推轂者乎孰爲方今未發之邪急宜鋤斥者乎孰爲往時未平之案急宜糾正者乎兄之助我應在此不當以煦煦套語塞長箋也憶往時吾輩氣誼之投每每率然而合今亦各不羣兒與孟旋超然于木末亭畔讀書悟道飲酒賦詩何其樂而達也相與者何人最深韻可以託契最堅凝可以託盟最饒經濟留心時務又有何等奇奇怪怪宜

微知之者此非燒燭夜對不可了然相晤尚遙從此以筆札爲面語耳兄俸已幾何何時可及學僉之格後來之秀英英逼人弟曰在簿書中涵穰錯過兄居往來之衝過者如織亦儀封之隱觀人之會也儻畱意乎弟以八月杪北行嗣後當在長安通問矣拙刻一冊白鹿志一冊則弟別來功課也兄詩當益富有新刻本可惠幾帙音問久闊不覺覩縷邸報中事皆兄所悉故亦不一筆及之以聞所未聞爲急耳

候周老師

恭惟老師至情純孝體道含真以居憂讀禮之餘沛扶危定傾之用凡今之門戶重而君父輕情面重而紀綱輕者則惟禮可以已之老師靜觀極詣資深逢原弟子他年亦何能仰窺萬一哉竊于今日而預賀之也向者伏承渠誨務養和平敢佩終身不違參倚然何以免翹翹之嫌而仍不蹈容容之誚何以洗塞白之套而稍無負建明之思孰爲時事第一義孰爲時才第一等老師武庫之

所森羅夾袋之所儲蓄幸以千百之一告之斯則老師終始造就如天至德乎湯門生遂來竊鈇之疑竟遭投杼之患彼人信賤役之讒將何以爲剖白之路此又某所憤懣而欲請者也

與夏緘菴

諱煒南康守

康郡寒瘠乃多伏莽官其地者甚費心力矧台文當上下修隙之會事事大費幹旋總之隄工若成原是陰功無量又不特前人未了之局爲重矣白鹿名區傳是紫陽吾輩爲培植人才計率而由之亦復何罪近聞有厲禁而摧殘之者不佞弟夢寐不忘且須昌言于朝若地方調護終藉大力耳

與熊青嶼

諱德陽

不佞弟待罪仙鄉碌愚無似信心而往貿貿何知地方既有遺愆世法又復如夢自謂不足比數久矣猥藉明公鑒其素拙逢人說項貴鄉諸公從而倡和之遂使駑馬昂首同驅飲水思源其何敢昧憶自江州晤別半載之間輒復紛紛直道不容名賢去國虜憂

方大國是誰持雖幸正氣之未衰亦慮羣陰之尚伏邇者賜環之詔屢下知聖主不靳轉圜臺下其脂車以須爲世道計終不忍鳴鳳獨居空谷也不佞弟需次尚遙暫還故里茫茫迷路特乞指南託在同心想不塵外長君次君希道寤思

與戚司理

諱良史南康司理

匡城如斗湖山接席眞成吏隱名區如不佞之疏冷者宜藏拙焉何意高賢亦復至止輒令人有糝糝在前之歎李官操人生死關人進退不以地分局也門下大才其以矜慎行之賢者儻有同心乎衙齋清況正堪神往招五數楹滄風以構向有小銘懸之北牖若能爲不佞勒銘詞于石壁中者亦拜德之一也白鹿主盟李署專責幸勿多讓諸士被摧折者望與夏緘老昌言爭之已悉之緘

老札中不再贅

與門人余未之

行時備承繾綣至今念之茲以萬兄遠來稍悉近況靈山會上應

多筆底蓮花若以塵趣往者卽非所望也白鹿遂有魔劫僕愧無
金剛刀然終須爲吐一言幸語諸兄無爲悵悵佳稿刻就希惠幾

帙

與陸景艱

南九道諱夢龍

長安悠悠忽忽局面人情互相牽顧遼事都置度外黔蜀亦若夢
中因念國家欲得真心任事如台臺者宇內寧復有兩今地方興
釐旣已畢舉饒南守備一設保障尤喜有資而兵政易弛匡人習
慣時有細人好造浮議以圖修怨于袁九滌而欲盡翻其兵案者
台臺霜鏡在上飭武是先固無容其逞然未嘗不日夕伺隙也其
從前諸案乖謬固多而天公矢慎不敢徇屬託爲喜怒則可質之
白日至潯陽庫藏交盤尤極清楚然庫吏過後作奸借口誘託則
乞靈斷主持之其他地方利病無煩多贅要亦眷戀明德不覺叨

叨耳

答程都昌

都爲囂敝邑治者數多傷指獨門下快才遠識勤恪自將下車伊
始輒得其綱不佞向以卓異推言之上不聞而今循名蔚然千里
神慰夫訟易理通易清所難者一片冰心遊方之內毋遊方之外
耳以門下之品之材兢業以持之始終不貳都邑從此其爲善國
乎門下勉之矣

與白彭澤

諱紹光

彭澤有先賢勝跡可鳴琴治也近者盜張政弛百蠹叢集故特借
神君整頓之計妙手精心處處迎刃且改觀譽當益起縣之前
令多受鑿垣之警非必多藏誨之乃縣之猾賊黠吏通謀布置假
此脅息縣君耳聞衙後牆可跨越似宜峻防又有一二大窩窟穴
城中者敝縣劉父母知之極真可密問之而擊之之法須計之陸
景老毋漏風聲反受蠶毒也在台丈卓識通方知必裕如特在親
知故叨叨耳貴治兩番觀風試悉不佞與目其一中者乞查其
名而獎進之併示區區文字之誼然不必假借以他事也

答周繇貞公祖

日以芟芟申候弗蒙磨納反辱批答愷至益乎披淑氣而依朗照也道誼之篤海內正人共仰泰山北斗某亦何敢自外愧聞識疏才無當提誨耳舟次錫山再沐翰旣台意殷渥何以克承敝郡孫淇翁某之太座師也淵源有自竊所仰依若其居鄉之清介立朝之正直凡有心知詎能以黑為白乎此自台臺一流人何辱問焉一切指迷啟暗均望明誨而辱教之

答程都昌

承教具感雅意然地方共事藉庇已多正不在世法稠疊也惠儀附璧并謝倦倦都昌多口之地往往不風而波惟寬嚴交濟冰霜自持省差役清衙弊以門下神明之才出之裕如耳臨別贈言想能原其意也

與吳生白

譚中偉粵東藩司

四方多事粵東晏如臺下保釐之功卓乎茂矣粵夷伏有戎心邇

復何似知曲突徙薪妙有善畫仰惟聲實兼隆朝野倚重旦暮應借節鉞素辱宇下之庇者亦何敢後緇衣之好也家姊夫徐某守其誠朴幸戴二天臺下推屋烏而破格提之感佩曷已冷局無以自見欲乞一管稅小差似屬羶名宜為爭地又慮其以此賈罪然自大德施之直足噓枯潤朽儻其敗度斂怨臺下直繩以吏議可耳誼不容已輒復冒瀆

答門人林魯玉

譚森

美人之想何日忘之忽接蘭訊如捉塵相對也清心妙義博雅宏深充前力而引新緒日復疊疊為期一彈指間杏林春煖矣不佞業已戒途輒思稍言天下事故人相愛宜有良規若綺語頌言非所願聞也

與劉康谷父母

林居數月備承帡幪行時繾綣之情迴超常格非復可以筆舌謝也仁民之政宜民宜人芻蕘之言莫佐萬一竊有私念謂老父母

臨事詳慎博訪精研自是神妙作用然人心不同耳目難寄寧兢心而獨斷毋旁聽以啓奸且行簡則日有餘閒省訟則民無紛擾嚴懲差役下鄉之脚馬力禁捕衙擅受之呈詞舊糧徹底造簿摘徵欠多已蒙采家父之一得近聞簿止開米數而不載田糧終爲那移之端亟宜查田改正凡此愚見聊附古人贈言之義以備高明參酌家父愷直成性每好盡言惟老父母以通家至誼善體鑒之尤不肖所冀寐勿忘也

與曾二雲公祖

豈弟作人求賢如渴此賢侯事也文章氣誼友朋相引此弟之私也多言煩稱實皆士林之秀向別時面布所云幸不以多爲罪而憇置之者則請陳一二焉武進諸生吳鍾巒弟十年之師也名宿品孤羣望所歸實應冠軍之選不求平等之知無錫諸生顧嘉舜江陰諸生趙涑武進諸生吳鍾罄皆弟所心儀于師友之間者也悉望注以隻眼高拔其名若家兄應炅苦心力學試必先人家弟

應星穎而有志老公祖垂情而破格先之又不俟弟之諄懇矣其臨期開請子弟至親從鄉紳之常例者家父主之幸不以相廢蓋弟所以私于老公祖者止此

答錢牧齋

不肖孤蹤暗識臨淵夜行弁天下國家之故茫如也然私竊自念時事破壞田紀綱廢弛此行塞白將以爲首而辱承台教忽發其蒙台翁居揆席握樞衡其于清朋黨振紀綱茲一言仰窺一斑矣所恨怱怱就道弗獲請益孰爲切要之款孰爲整頓之方儻有便郵不吝終教之否乎孫老師身繫安危還朝何日翁台何以籌之并希指示講筵虛左寵召非遐拱聽履聲之入發武庫之藏耳

答楊周

諱新期

台臺夾日孤忠擎天巨手褰帷行部江漢爲清屬當黔蜀多艱兵食交匱百方措處以效纓冠者罔不干楚是賴非藉台臺妙運經綸力籌接濟則西南半壁已不可知然勦局未畢撫事難言水蘭

合謀後憂方大恐終須藉神畫以爲勝著若朝堂之上不過拱手以聽似未易卓然建一長策也某書生踽踽初塵驥後未申仰止之私先辱瑤函之錫既不敢卻賜以蹈不恭之罪祇有抱愧銜勒而已

與繆西翁姑丈

自別台顏後以九月望抵都門晤諸相知皆亟問還朝之耗計閏月中定得侍色笑冬寒暑短不如早發爲便也此中議論正是清明一二伏莽彈擊以去卽南中閃爍今已去其大者想邸報具已入覽福清行志自不得遂第聞蒲州謾信聊城故福清深以爲憂主上神明而內憂未杜激之不可緩之不可所猶可爲者大璫雖得志亦畏外廷之議使交關之人去則清明之象可長保也不肖初至無所知識塞白之後行觀先後緩急之宜要不足當一臂碌碌爲愧如何如何新總憲屬之司寇新冢宰屬之總憲俱可爲得人副院將借重李懋明矣近惟點陪之舉一箭雙鵰爲小人播弄

機關聞總憲深爲主上所器重可無憂此覆轍耳此中之事大都止此家中之事則望少篤故舊之誼一斥讒構之言使鄉曲間知有錫身之名使家嚴少釋眉頭之苦使不肖得免三千里之憂此姑丈懇摯本心而尤祈申告誠于臨行之際者也仁人厚德骨肉一家不妨直率吐其肝膈想長者必能俯原

答劉念劬

詳應選許墅鈔關

敝鄉爲加派之重兼織造之擾民力已竭卽入于關者利在東西南北也而鄉民斗粟漁舟動遭科迫今之爲關其謂之何臺下清心妙才愛商恤民上不妨公而下利于途此不佞所翹首而望也

答李懋明

某之譴陋獲託蘭臭餘芬每領教言如寐斯醒竊思中外多故厝火漸然非眞豪傑識力作用不能擎天柱而補地維台臺主盟吾黨匡濟斯民津門鎖鑰暫資韓范而望隆實茂指日借重名碩以表正中臺肅貞百度益中外同心正人翹首久已有定擬矣某辱

以舊知式軌就範稍得伸其眉舌以爲前驅則誠三生之幸也摘
瓜共歎伏莽未消愧此絲力其未有效亦惟台臺終進而教之
答解羅浮諱學夔沙縣令

向聞沙之清幽爲仙吏飛鳥之地年丈翩翩乎仙才仙骨則真仙
吏也治行卓然長安譽滿其以異等趨召與令弟年丈共吐筆上
之花而鳴梧桐之音者指日計之弟託在籍末最辱兩年丈相契
同心之助幾幾望之願年丈努力竿頭以慰故人之望

答李世臣諱喬祥符令

向從行卷中竊領文心直望爲天際真人也口卯之役獲附驥于
令兄少文年丈想見瓊枝玉樹王謝風流而今仙令飛鳥兩地琴
清又見潘安之花縣矣芳譽翔空冰鏡倚望辱有兄弟之好詎禁
起舞耶令伯碧翁老先生舊沐國士之知久疏起居每懷夢寐便
希道此耿耿

答徐見輿諱廷宗荊州司理

理官之寒瘁不佞向身嘗之矧荆方多故轉餉徵兵日不暇給上
費調停下煩綜核自非老鄉丈之敏手游刃朗若懸空者孰能勝
其任而媮快乎賢聲久已滿都下辱在梓末實有餘榮維國是而
清仕路同心之助翹首望之品地卓然端不以齒牙爲重而秉懿
好德亦何敢後焉

答魏仲雪

初秋一通音聞弟卽料理束裝倏復半年矣關政清惠遠近所傳
然以仁兄道品居此市曹終非了局同志俱以爲念歲底轉局自
是弟之責非兄事也公言之私言之政有計議意得南銓乃妥同
人中極可同力者有魏廓園在邑中諸兄試事風波弟竭力周旋
乃得之于文宗又得之于儀郎而宗伯執意甚堅必欲少處陸兄
故不得已聽之然儀曹定稿行察眾中首事之人弟三懇之而後
易者區區之力不可謂不盡便中可與諸友知之勿以一人牽累
爲弟罪也弟率其胸中所見與廓園爲同盟聊自有以塞白然欲

不見首則難欲以一口挽奄人膏肓之疾又難之難南中有所聞
幸索便示我新詩種種讀之冷然一清長安車足之穢弟詩腸又
去日以城務紛紛客席擾擾即欲覓一句爲酬弗可得也方青峒
遂別數年使人胸滿鄙吝今在家乎在官乎何時得一把臂念之
慨然

上孫愷翁老師

伏聞駐節關外進而逼口廣寧可唾手取也傳者言老師運籌之
妙謀入遼陽以數行空札離其腹心爪牙疑而誅殺者無數如此
則口在吾目中矣或者言卒之任甲者不過四萬將之橫戈者亦
復寥寥王帥乃至墜馬人言固不足信然安得如李愬者以副老
師之指揮乎時可乘機可赴老師勝算在心而將卒不能如意則
守之功不下于戰關一廣寧似亦費收拾也謀不萬全動不如靜
書生懦見固若此矣老師幸私教之長安議局紛紛往事都不足
道近者老師大疏鼓舞邊疆將吏之心平衡戰守左右之袒自有

深意豈爲市德而諸人有心欲言而口不敢出有本欲偏主而語
難異同至于敘防之中多有眾怒所向坐此叟叟迹幾相左然老
師微通其變而言者自守其幅正可置之度外大段人情只好眼
前無事耳老師敘勸勞臣其挂議者儻姑聽焉亦聖賢委曲行道
之微權也老師以爲何如讀擒妖始末敘言可謂仁義並用而心
一諸老意弗盡然恐寬一步則彼亦進一步此又弗悉老師公平
宰物之旨者也某茫昧無所知而四哥示以台旨若可不棄于門
牆故亦感發吐其坐井之見供老師一晒雖闇昧知不罪也邊地
霜寒軍務蟄集伏惟爲國加滄一縷申獻望恕菲褻

答熊壇石公祖

長江一帶鯨鯢爲窟而敝邑下當其衝若奸宄鼓楫如君山聚兵
之謀則父老子弟不得安枕臥矣幸藉台臺握鎖鑰之重運制勝
之奇使羣妖授首江上安瀾徙薪之功勒之彝鼎某託契蘭芬之
末竊邀梓誼之餘備員言責撫心莫語惟是邪萌之尚伏視羣妖

而易蔓台臺澄清南部正人所依何以明教愚蒙使鼓螳臂乎
答何武莪諱士晉

景仰鴻名已經十載自辛酉春一函通候又及三秋矣依佩之私
無刻敢後而往返京邑車塵無定心期渺渺空望嶺雲而神飛耳
粵西天末非所以居台臺惟是震鄰四警半壁支撐不藉方叔召
虎之猷孰當金湯鎖鑰之寄台臺誼急纓冠過于室中自救虛聲
實著使之內孤外懼焦頭爛額而不居其功功在人心簡在帝心
此非一人私言也分專闕而樹偉伐桑梓獨藉台光還朝伊邇詎
容多讓至吾黨同志亟望羽儀不肖孤拙跂領渠誨又未可寸楮
盡矣

答夏緘菴

星渚之荒涼天下所稀見然青山白石古壁寒泉雅與吾輩道氣
相宜台臺兩年循良望冠他郡者品固以地益章既兩人啓事參
藩不遠獨錢糧考成大嚴而催科往往見怨地方之難殆不堪久

處弟辱在素知斷不敢自愛其絲力候有內地之缺即可借重此
鼎分內應爾其盜敢先貪天功雅意稠疊見之驚卻正施可以交
誼拜登別賜附陳完璧相契之誼固不在世法中非自外也但萬
二生無辜可念附致一函于黃陽平候其行部將近或在省行事
時覓便致之然後令二生控訴總惟翁臺斟酌并示二生知之
與黃陽平諱元會江石督學

往年共事雖一江相隔而神氣交親沐高雅之誼特甚時耿耿念
之江右文章名地邇來風格卑弱翁臺大振宗風剔其腸而煥其
彩誠此道中快事豫章此後數十年名碩之胚胎也頃以考成溷
及渤海無論輕保障而重繭絲且舍經手而罪他局同志共駭既
已明雪不必介懷矣白鹿書院與自紫陽先輩名賢加意造士一
切科舉月課之規素關文宗條教舊南康袁九滌規畫潤色起敝
維新而不佞弟實董率之月以朔望再宿山中風雨寒燈手披口
授以刑官兼塾師者蓋五年于此諸生文心樸習亦既改觀辛酉

賢書三倍往日不意去秋張鍾老修郤于舊南康因摧殘其舊子弟幸舊按臺汪石老九江道陸景老若口力爭漸次收復而覆盆者三生其一則但宗說也宗說兄弟在南翁鄒先生門下文才行誼卓然白眉特以舊南康生祠此子實爲倡首故患病卽先降青補考竟行奪廩言及前事直使魄飛翁臺試召而試之其文豈五等秀才乎然此猶有倡首生祠之說也若夫萬人傑者家徒四壁年少力學舊例洞生另錄遺才此生適居其首先欲破格作興遂爲請附正案帶道汪來老實允行之因得挨次幫補乃竟罪以鑽刺然則誰爲受其鑽刺之人申文者乎批允者乎嘻亦甚矣且當時申案見在舊敝廳中翁臺試弔而閱之區區鼓舞之深心將爲書院之美事彼山空甌冷草布貧生非有微名安肯趨赴今卽格前例不行停其廩可矣痛加筆楚禁錮終身此生何罪鍾老第以洞生榮辱悉關舊南康不知此生一事在舊南康去後池魚之殃六月之霜仁人君子能無心痛而況不佞弟實貽之戚能坐視其

呼天腐心噤口不言乎幸翁臺昭雪無罪還其故物此可以質諸神明告之西江士大夫非私意干請他人可以援例者亦所以善成前人而掩其白璧之瑕也恃愛冒瀆翹首報音

答張蓬玄

諱鳳翔保定巡撫

台臺沈幾定力功高定亂已勒鼎彝而垂銅柱矣隆恩再錫中外懽心萬里長城方借中樞之席廟謨國是咸藉主持所謂斬釘截鐵之手非台臺誰屬哉向過部下快領塵玄懷清風而瞻朗月至今寤寐不忘也不肖識短心疏處非其據歸依眾正矢效緜力讀雲中之札三致意于否泰消長之關則旣發其蒙矣清明之氣尚存陰伏之邪欲逞惟具瞻之地長得正直開濟如台臺者秉衡持鑑爲國家抽出一片赤心白意以振紀綱而辨賢奸則一二伏莽不足慮也惟台臺有以教之

答周柱明

諱邦基兩淮巡鹽

國計匱訕司農仰屋兩淮鹽課居天下之半所藉台臺風清海若

月皎冰壺以足國裕商民甘其味而吏易其腸真從來齟政之最也茂績已書還朝伊邇南天之霖雨行爲北闕之鹽梅不肖幸獲歸依可勝欣舞乎

答吳濼石

諱嘉賓南昌司理

豫章司李非勁骨敏幹深心密理者不能勝其任向見張忝生年兄歎爲卓絕近聞年文治行復遠過之南昌諸公人人頌服而湯參予年兄尤悉道懋績至品識之超于治理外者方方石年兄深道同心之誼貴鄉銓衡虛左以待非佞語也司李之寒此弟所親嘗況年丈兼干戈顛沛之餘幾于無家何堪修長安之問敬以璧返雅意固心佩之矣

答吳生白

台臺天青月白心事皎然不肖每私仰焉人倫絕品粵東治行卓冠列藩猶不無積薪之歎祇緣清卿壅雜搶攘成風開府未缺眈眈先視遂使藩方牧伯遠弗暇問如台臺之譽望亦復緩焉然官

如傳舍人無可課之績而台臺三載奏功造福無量長城萬里支撐半壁旣已名實兼隆廷推首爲屈指第建牙方議久任昨叩之當事者擬卽借槐棘之班不使周召久勞于外也分宜駢語奏報近有堂約率以質言惟鑒原之

候周老師

閏月初接得台札備承眷念之隆兼于令兄老先生時悉道履甚慰懸念計違師範八月于茲矣胸中茫然如故紙上索然無奇竊復虛觀天下事驚敝成風贅疣日益思啓一言提其綱而振頓之心短手鈍格格不展局中鬪勝君子弗爲獵有喜心狂奴不讓老師得毋嗤其愚乎雖然此亦台誨所謂言其心之所欲言不盡關耳根之入也今時言官正自不易薦人嫌于市恩糾邪又爲傷體觸諱立見摧折條陳祇附空言老師謂何道而可幾幸乎近者于役北城尚得少解尸素妄意巡方異日或可效一二于地方若株守螭頭日弄白簡真亦虛實剛柔兩難之局也但差期尚遙須有

一年紛擾老師幸時惠教何人何事明白示之使知趨向爲望毛
禹門眾正所宗望其賜環以日爲歲而大璫故持之今且觀呼嵩
前後想有好機括耳小疏如命錄上以供覆瓿臨風不任瞻依
與毛禹門

山中之遊大有勝情不喜識張公玉女喜得仁兄兩日夕清話也
高誼依依歸來心醉亦有數言屬韻竟以塵冗置之乃行時未通
一函以乞司南而長安又辱翰惠愧何可言仁兄鐵骨冰鑿力迴
旣倒之瀾邪黨構陷正人氣短今邪謀已破公道昭明劉朝先服
其辜王一鵬亦落其首眾正喁喁之望日暮得見賜環而魏璫爲
朝修卻持之不變今不得已變其說于葢襲之覆行爲善用小人
之微權以通君子之路是一通也嗚呼前後應有轉機吾道將行
豈使直臣久錮乎閣部方有同心所藉不在議論弟慎有欲言再
觀其後可耳

答蕭元恆

諱毅中江北學院

台臺文成作吏羽可爲儀人傳殿虎之名士仰泰山之望而敝鄉
文格漸下士習愈囂江以北實甚仰借人倫之冰鑑兼作吾道之
宗盟旣起其衰亦肅之紀使多士彬彬于文質則高皇之靈實式
憑之不肖拭目以觀謹謝命之辱

答劉康谷父母

行時備陳謝別之私不覺罄其狂瞽老父母大雅君子以道義取
人不重諾諾相欺者故幸無罪然已惶悚無地矣邇雖鄉訊曠隔
私念豈弟宜民雨露日暝目所覩記孜孜民事推心置腹而不飲
一杯水則古循吏治行亦何以過此哉武健嚴酷可以御吏不可
以親民潔己愛人可以親民亦可以格吏夫催科何傷撫字所畏
者頭緒多差役煩耳胥不吮其血而課必搜其根寬于八分以外
之錙銖而嚴于八分以內之什伯老父母持此法以無倦國與民
兩利之道也祝融爲虐慘傷如許老父母惻然罪己自是父母之
心然五十人之劫數已去而千萬人之待命更殷仁人君子遂忍

恂然乎學院孫老師處適備道卓品精心亦聊效與人之頌也

答葉慕同 諱成章長洲令

老父母以天馬行空之才本以止水之操持以如山之力從來所過劇地脂途今為花縣琴聲矣敝鄉邇有天幸豈弟君子萃于一時然如老父母之壁立千尋固鄰封子弟所飲河知潤而齒頰為芬者也種種瞻慕之私敬拱俟履聲于山公之座矣

答史崇仁 諱敬英

門下神識照膽妙手剗犀以崇之頑且敝而恢乎有餘地焉神君父母之頌亦彼中所數十年而一見者也不佞向叨共事備悉鴻猷雖芝眉未覩齒頰為馨竊自附于緇衣之好久矣敝座師居鄉端介生計蕭疏今其身後二三世兄皆誠慤君子居刁頑之俗有門戶之憂惟門下加意覆露之諸孫中尚多俊才有名道昌者不佞向于觀風拔之如遇試事為之垂青皆所望于二天不淺也

答韓參嶺 諱光祜

恭惟老公祖正氣千尋弘猷萬頃席上繫夔龍之望江右借周召之謨某向伏下里則聞吾儕小人歌甘棠而頃濫竽班行乃益從眾君子後依泰山而瞻北斗也自維待罪匡城拙鷺之愆見羞五老顧得叨庇廣厦掩瑕匿垢台臺自以州子弟特容覆之此德已渥又辱瓊瑤之錫永矢弗援與甘棠之澤俱長耳一絲為獻亦其土之毛也

答陳玄洲

行時備承款洽復三千里而辱貺之何其厚也邊疆多故正藉妙手支撐乃澹然高尚黑髮懸車當人情躁進之時表急流勇退之節鄉有羽儀後進者其望清風而動白雲親舍之思矣功司題覆早已屬之不負明命誥敕亦託敝同年轉那得之不誤期矣蔣尊老榮轉兩語兩選君而皆唯唯以俸少為辭今少宰已為留意亦云須得一入都為便乞轉致此意尚在此圖之也

答楊斗樞

軍興以來司農仰屋計惟煮海爲自然之利而疏通無術商竈兩困敝鄉之所流行于深巷荒村者則皆私販也蓋官私之貴賤殊價賦淡異宜民情趨其所便勢不可以盡禁急之則爲盜資耳老公祖經國弘猷濟時妙手其必有以處此下車以來清風明月照拂三吳鐵面霜威震攝百吏旣已不言而飲德矣弟某居江陰常熟之交兩邑父母皆清操絕俗表表一時而常熟尤資深績茂惟老公祖行部大獎翼之誠足以助揚仁風者也

答同年某

時艱財匱處處捉襟而邊鎮虛伍冒餉漏卮不塞則竭海內之脂無益也清釐節省詎不在司出入者苦心妙手哉年丈冰蘖爲本副以風稜重鎮免脫巾之呼司農藉同舟之濟負然時輩矣春回歲改遙望卿雲分我椒觴輒慙臄腹不盡瞻佩之懷

答馮弓閭

諱起綸豐城令

微天之幸獲託大雅君子聲氣之同更喜劍合延津共事江右每

歎臺下經緯精心冰玉粹品以極繁極逋之地恢恢乎遊刃治之有何妙道以臻此豐城寶氣有識者共欽其難名不獨弟之私誼津津于舌也

答余星子

寒雲冷岫吏隱名區與門下相對直如戒行僧也僕已遊五都之市日弄廣長舌不自知其刺刺而門下清靜如昨爲眾生廣渡慈航功德無量見使者讚佛之音輒爲合掌喜星渚宗風不墜吾黨生色耳分香飯以惠我具有飽意然豈水舍所宜殆恐無福消受別獻寸絲不當芥子毫末也九江道陸景老附有一函望卽轉達鹿洞諸子并希垂念耿耿不詳

答李緝敬

諱日宣河東巡監

久違台光時切夢想向讀大疏軫念子遺無告議清畝以濟加派之窮真拯之于水火之中也敝鄉此弊亦復□心而任事實難良令不易廟堂之上粉飾目前遑念有嘵飢號寒敲骨吸髓之哀黎

乎既兩奉旨下部度當事者應為動念也草復不備

答汪南康

諱宗文

匡城寒氣如陰山之雪固足以表絕俗高韻乃吏弊民瘼如小家
頑惰爬搔整剔大費心手台臺入其境有慨于中其亦以鄙言為
識途之馬乎不佞五年罪狀都如行腳僧瞋喜隨緣瓢笠空挂而
魂夢所結似有宿因者則白鹿洞諸生山寒月冷午夜課燈亦復
少發羣中之秀行車一隔遽如星散鹿眠草深文心茅塞每片函
寄訊輒有榛蕪吾道之感台臺固紫陽後身也時雨之化儻有意
乎

答宋希文

諱賢常熟令

老父母天挺異才幽微畢照推心置腹人在懷中真神明而父
母之矣左右之人不得關一短長之舌九四方所交口而頌為從
來飛虎一見斂翼之日以此定力秉衡持鑒山公之座虛左俟之
秉懿好德人有同心匪特舍親仲嘉兄與不佞之阿私所好也

答姚鏡初

諱應嘉巡漕

恭惟老公祖以舟楫之長才展風雲之妙手波臣效順魚龍不驚
百萬京儲銜尾而進使都下人心恃以無恐者則皆經綸拮据之
偉伐也敝鄉屬在几席之下尤披霜露之多某實沐浴明德而未
伸一介轉辱瑤錫耶感與愧俱矣拱聽履聲齋心請益

答趙總戎

諱辛教

朝廷為遼陽一塊土歲費數百萬金錢以養戰士不愛高爵重祿
以任武臣且以樞相三朝元老親履戎行蒙犯霜露此誠大丈夫
立功顯名之秋而志士枕戈飲血之日也兵將坐食海內空虛而
不肖者尚忍吸部卒之膏圖歌兒舞女之樂刺士馬之肉作賄權
媚上之資每念及此輒生痛恨比聞樞相愛重將軍力與督部爭
以明將軍之材勇而又有言將軍屯粟如雲軍令嚴明愛恤士卒
者故疏中特表出之亦欲勵將軍之後黽勉建功以分知人之明
不願以饋遺及也雖云自種之毛然以此鼓舞一裨將則一飯之

德必有奮勇以報私恩者將軍其赤心白意撫循部下與同甘苦
竭力屯種以助軍需毋以中朝毀譽爲念來儀附返已紉雅意不

一
答劉康谷父母

老父母素心惠澤出敝邑之民于水火積蠹潰穴方有清緒正貧
黎乳哺奸頑格心之日也奈何以五十人之劫灰而生引咎拂衣
之想乎知已撫順民情甚爲欣慰舊糧理無并徵某以縣力爭之
再三不獨爲一方也昨小疏入告奉有明旨已許詳覆蠲免且計
部先已題明泰昌以前不在參罰之例老父母其出實力擔承莫
以吏語搖動此理勢確然有害無益某實始議亦決不以舊糧之
罰累老父母也惟遼餉似聞全納何故解不及格昨以老父母治
行告之餉院李層峰舍親渠云論欠應議今姑置之不言極知卓
望不得不爲法而遺薦也老父母儻一查之二三年分之遼餉豈
有從中侵食者乎家大人備承下問可以生色家兄弟不才見擯

有負提攜儻有錄遺之路九鼎全藉神力此自至情公典度老父
母亦決不忍坐視子弟之沈落固不如正試之聽命于冥冥也

答須日華

諱之彥

傾耳台丈斗岱之標五六年于此雖蘭芬玉塵無緣一親而向往
之私固不啻執鞭之慕也以濟世深心運奇偉略加之秉禮賢勞
僅借滿座清卿之一席乃不免于求多之口豈才名固忌之招乎
辱在梓里實深惋歎公論自明白文即暫抗白雲之節亦不得久
臥東山也翰教之遺甚感高誼若台貺則愧無瓊報敢以璧返伏
惟台照

答徐若谷

諱良彥宣大軍門

四方多故人心皇皇借重擎天之手支撐半壁鎖鑰有託從此可
安枕臥矣惟是重鎮勁兵乃化爲疲敝之色台臺慨然于向來之
視爲故事則自後之實心擘畫指顧風雲如李臨淮之壁壘旌旗
頓爲改觀者可不問而知也伏承翰教敬謝不忘

答馮禮亭

諱嘉會

往過部下披拂仁風兼沐百朋之錫輒以不見荊州為交臂之悵
比聞壯猷神識曲突徙薪坐消妖黨之氛克謐震鄰之患望高伐
重不宜久勞方叔于外當事者謂卿貳之坐鎮不如秉鉞以勦勤
中土之救靈尤屬腹心之要地暫需時日以暨鴻施履聲之入拱
聽之矣

答南損齋

諱益

台臺其瞻之望山斗為標獨坐之尊風雲在手屬以海氛之弗靖
方憂紅夷之薦侵乃大振威靈克揚我武伐其謀而創其逆東南
偉績猷聞快心使海濱數千里盡安枕上之驚濤者功將勒之鼎
彝也傳云夷欲與倭為媾知屬調音恃有方叔壯猷奪彼殘魄杞
憂固迂無當台臺其有以教之

答侯六真

諱恂貴州按院

老年臺直節凌霄壯心貫日驅車絕域手奠危疆當慷慨請纓之

時固已知逆酋在指顧中矣作懦將之氣厲死士之心解督撫參
商之意見而奏犁庭掃穴之勳銅柱先標非老年臺為第一哉善
後之宜人心為本使蠢蠢諸苗皆仰天朝威信而廓然無貪其土
地之疑以安反側以杜後憂度老年臺必有成算無俟杞人鯁鯁
也兵餉如珠百費若掃猶分長安之俸以惠同籍見此真欲汗下
其何以消受乎

答溫清霞

諱舉謨四川按院

蜀土傷殘逆酋竄處仰惟文武壯猷運奇謀于掌上懸勝算于鏡
中使巢穴之洗蕩無遺黔黎之安堵如故功在彝鼎詎尋常攬轡
可方萬一哉黔師告饋及安乎有後憂九鼎之力尚在蜀師之扼
吭擣虛也台臺幸終計之還朝伊邇拱聽履聲

答陸太和

諱獻明

黔事之裂也方幸台臺入而匡持之比見大疏批卻導窾目無全
牛矣初聞警報時長安沸然皇皇無策謂台臺尚家居不知受事

何日乃有就近借傅公祖之議不意議出而台臺報代至矣多一
番改移枉卻台臺半年之辛楚百種之籌諮然楚固劇地也震鄰
之警徵兵轉餉責望更殷不如黔之一意理兵而合四省將伯之
助也此舉以酬傅公祖向來之請纒耳恃愛布其所聞統惟台照

答王玄珠

諱心一廣西按院

粵西非無事之國也而今黔又告變矣外思助兵內思轉餉吏既
裏足民復存饑台文處此其難哉甘露以濡之清霜以肅之淵機
神識以妙運之知台文裕如于此第批鱗直節望重中臺恐驄馬
之跡未及徧而已被還朝之命矣何武老勳望兼高羣賢推轂然
尚遲時日者欲展其偉略于疆場不欲虛糜以坐嘯畫諾之地也
晤時幸爲道意

答胡漢涵

諱一龍

節省美名也賢者行其實不必居其名矧取其名而亡其實者乎
弟向固訝之然君子成人之美雖非旣其實亦姑取其意百方補

苴而上下交和了前人之局卽後事之功也老年文深心妙手知
應之裕如矣

答謝玄中

諱文錦江西按院

恭惟年臺持斧江西以懷中清風明月披拂而照之威惠兼行旣
已入吏民之心而出士大夫之口伏讀大疏文吏武弁誅鋤霜肅
眞使廬峰日白而章貢波清矣弟彼土舊吏遺愆積戾所賴庇覆
實多還朝伊邇諸容面請指南

答張虹海

諱五典

台臺淵澄玉立品望隆重海內正人方將借重廟廊主持國是不
宜棲鳳于棘也然廷尉天下之平東南生德實于焉在君家釋之
後先輝映矣暫領白門清況以當洛社優游行聽履聲之入慰不
肖輩瞻依之私敬翹首以俟

答李碧海

某待罪江右踽踽涼涼舉足有冰淵之畏傲有奇幸獲庇二天拂

之以清風照之以明月濯之以百丈之瀑而煖之寒谷之噓進不知爲上官退不知爲屬吏微若託道義之同仰對于冰壺霜柏之間者亦世法中一僅見也每念高韻孤標振衣千仞之上長鳴梧桐之岡而雞鶩羣棲驚爲異物莫或想其來儀任與冥鴻同遠則竟不知爲何心今方有按圖索駿中流思柱者台臺其未得輒想東山之屐也五年來驅馳東西南北之交不通一字以候起居念之便欲汗下但聞鳳雛噉噉一爲慰心獨哀九老竟中譖者之毒不平之鳴屢欲一伸而略有俟也然吐三寸舌告于友朋則既時時不輟矣

答楊升之 諱光升

台丈聲光若斗氣韻如仙文章吏治俱從素心而出卽操刀未幾而游刃已恢恢矣地當孔道應接爲煩要以譽望之易騰亦復在此方今催科撫字須兼用而密劑之一方黔黎所仰以造命者惟令是賴若清惠宜民寬嚴合道真官之本而德之基望台丈勉思

其後東陽敝親家品政卓然可爲地方同心之助便時希道相念

答黃行其 諱願素撫州司理

向叨共事每歎服台兄精心快才投機迎刃一段光燄都從淵然靜照吐露不見些子矜激之氣何其妙也撫固劇郡台兄兼而攝之政績益不可勝書春明門外酌酒彈故人之冠期不遠矣敝門人張憲卿蕭然狷潔不屑一問卒牘然時有塵甑之憂儻台兄高誼爲懸徐孺子之榻使得館穀資則一幸也恃愛附瀆亦不必其知特以助緇衣之好耳

答邱太邱 諱兆麟川湖督餉

不肖驚下亦微託有聲氣之同時欲竊領蘭芳少醫俗骨而西事再棘台臺恩恩持斧以行至義不反顧倍道驅車蓋明以簡書之畏鞭中外疲驚之筋使人人殫心瘁力憂國如家呼吸應手豈患夷虜哉剗楚之肉填黔之壑壑未有已而肉且盡然自台臺苦心調劑則緩急之際腠理畢和轉輸之餘神氣自甞新撫沈毅其以

當台臺之提掇智意將日長西南半壁終賴九鼎在幸竟籌之使
得竊領緒餘以釋杞人之慮也

答何武菽

台使行已勒數行奉報計爾時台臺且移鎮矣名賢碩望功在社
稷不宜久勞于外而重地儲才每難推轂之選遂欲以黔局相煩
幸與霞城曲寢其說然復倚重鎖鑰者將竟經緯之緒以撐東南
半壁也一兔百逐誠如台諭而終不能與台臺爭國史之芳名卽
黔人忌功亦終不能抹殺西兵俘斬之功次鼎鼐旂常日月爲昭
特黔局再裂姑閣前功亟議新罪故台臺覆敘恐少需黔事之定
耳公論昭然人心不泯樞衡之座行虛左以俟拱聽履聲未須介
意目前也絲力無益高深祇有血誠仰依道誼

與王靖江

江干僻壤土潤而俗厯從未沐名賢之化地脈乍轉遂來福星豈
惟江流夜靜韻響絃歌且使下邑風和光華照映地方之沐澤鄰

封式詠孔邇未有如敝邑之親且暱者也往在都下拜謁屢勤識
荆緣薄邇者鄉之父母咸播神明之譽以達于長安因私念敝邑
赤子熒熒無依其提攜而乳育之上有推心之誠下有投懷之慕
者莫若老父母是攀是望老父母儻不棄哀黎而憫收之乎

答吳本如

諱用先薊遠總督

薊門鎖鑰安危所繫中朝之躊躇四顧者久矣台臺以弘毅大力
淵微妙用上膺主眷下協輿情往肩擎乾之柱欣欣慶得人伏惟
台臺經緯之餘濟之以同心同德之雅師克在和則今日滅口第
一義也狂瞽之愚儻有可采乎

答貢二山

前已有字奉答略悉此中情事見來札甚喜一通音耗然格套之
拘寵賜之厚令人發一大慙吾輩以心相照兼欲得人爲世道之
寄真無隔不剖奈何拘拘于此同鄉同事者固須氣脈相通然太
過亦非所宜吾輩于人事周旋中仍存一種落落之意乃覺久而

可思耳賢郎青其衿聞之喜躍容寄賀于家然竊有進者少年捷才一試先人席家世之華鍾掌珠之愛須善保其金玉之德器而遠于澆薄之俗習謙為福之基靜乃學之本老叔教子之急務固不在居官砥名之下也辱在骨肉之愛不敢不布其愚至婚嫁大事父母之心人皆有之豈敢執辭近于不情之論但弱息不勝衣遽欲儼然為婦時則未可願少需之來歲想能見諒也台賜太侈傷惠傷廉兩無一可謹九頓以辭儻異日妝奩菲薄稍寬其督過可耳一笑新按君及新鹽臺俱已力託之更待報代書到再手札丁寧不煩挂念也

答魏明實

諱尚賢保定知府

上谷為畿南保障昔人云得一良二千石當勝兵三萬值此邊烽四起綢繆拮据為力倍難靜以寧民勤以固圉動以作氣正以勝邪老年丈蓋恢乎有餘地焉夫令之貪廉媮敏府可照垣見瞻也公而察之毋取其比此亦治之大端知皆年丈之所優特以辱愛

故刺刺言之想不罪也

答王旭泰

一別遂隔數年甚切清風朗月之想每聞芳聲四達輒為色飛近得晤老年伯詢知起居治行曾幾何時而忽有歸來之賦也驕軍鼓譟習為故然即輦轂之下可毀御史之第諱戎政之堂何況僻壤此政不足為年丈累但為紀綱法度長太息耳彼中兩院題疏不審何若年丈第靜以觀之可也

答解羅浮

老年丈治行卓絕閩中士大夫交口頌之弟嘗妄謂令在今日不難撫字而難催科調寬猛之宜酌緩急之數上不迫于功令而下可喻乎民心譬如以慈母為嚴師正使督課凜凜其神不傷老年丈治術之妙即他日秉衡簪筆以進退君子小人者直而和正而靜皆比物此志也令弟年丈辱以氣誼收之併祈道耿耿

答鄒靜長

得手札縷縷隔言足當晤對弟出口招尤取忌正想默鈍之法蓋不俟箝也第舌不能茹年兄何道以醫之邊疆之事率多隱匿來教中所謂豸冠走死覆軍不報者尚未得其端委利害所關甚非渺小幸密切示之懇懇

答胡泰六

恭惟老公祖夙係羣生之望久爲眾正之宗敷歷風猷奠安百粵首膺簡命明允五刑夫舊京豐鎬王脈所鍾而狐嘯狸鳴政弛法玩固非優游表望之地將觀平明戢志之風正藉老公祖以正直孤清不茹不吐屹然表正肅法持平使奸宄畏而潛消蠹窟從茲一洗天眷方篤仁聽履聲且不可以舊京淹矧欲爲東山臥也某仰止高山久沾棠蔭跂想丰采之照映庶幾道義之提撕乃辱瑤函披對諄篤拜嘉腆賜何日忘之

答李緝敬

察吏之暇聿興正學絃誦之聲徧于秦晉讀大疏及傳是堂稿發

名賢之光續往聖之脈真吾道中一快事也學術不明人心日變君子與君子自分左右之袒而發之自貴鄉向使台臺居此則異同之見寧不悉化于大治乎屢心世道莫先于此使舉朝有同心同德之風毋多讓美于秦晉是所望于台臺以道力攝伏諸君子者耳敬謝大教并布其硜硜之愚

答閔非臺

詳心鏡崑山令

老父母天駟異才鳴球清韻發硯之初迎刃而解崑雖數易長令然玉之在璞市人卻走遇碧眼胡授之良工瑀之琢之遂爲連城之寶今亦其遇良工之日也老父母信心合道何局不收酌法宜民何弊不去清者法之源也惠者民之母也斷者胥之藥也勤者政之樞也老父母始難之則終必易矣躊躇四顧乃奏刀焉所以若然解也弟幸附玉筍之班竊分棠蔭之潤拭目望治敬矢款款之愚以復明問

答徐泰掖

辱在維桑之暉而涉世日淺無路覲光芝玉每披讀奏議私識中原牛耳實在翁臺竊願執鞭弭以從乃廓清之餘坐食其賜流螢一點掩景月魄何以辱翁臺之拂拭也舊京清議素砥北流恃有鸞棲時賡鳳響乃此中近事意見偶分遂生同室之爭不免歧路之哭翁臺憂心世道將何以止其沸而解其縛乎日讀討逆大疏仁人孝子寧無心惻妄謂真偽二字共應掃除但疑城洞開則大羣仍合高明其謂之何其性稟孤拙涉波已畏而羈蹤未脫偶感披心俯照之誼不覺媿媿幸密存之毋洩爲罪案也

答唐毓承

海若之區鯨鯢所窟邇因兵騷餉竭民以盜爲生涯其輟耕隴上聽海波之沸者實無有徒神君慈母兼而行之民寧其居而海不揚波者老父母之賜東南半壁均受焉非一隅私戴已也不佞竊分餘潤快頌明德誠不勝孔邇之慶而老父母又辱惠存耶

答王克承

別來遽復週歲每念仁兄翻覆于江沙鯨噬之中以我文弱禦彼蠻剛勝負之數恐不可保然地有定數官有成案必不至爲之下也而究竟不受其驅劫乎天下事利與害相倚理與勢相煎臨淵結網尚不如負耒而耕之易也況風波排盪蛟龍四鬪豈若几案吟哦之爲快哉狂夫之言智者擇之弟執寸管以與小人爲難亦猶之兩造之爭竭絲力啞口以御沙豪者也有人苦不自知兄將反而誚我我何以應聊發故人一笑耳

答張仲餘

兄近況俱悉之采石弟念兄貧無以爲計其有力可效者再試商之不敢自愛也庭前玉樹數年所望此亦家庭至樂弟率意信筆所言不當天下大計聊不負愧于故人耳何以教我使發所未曾乎地方聲聞閒中采民庶之口以備得失之林惟兄深心解此弟願聞之他寒溫語不足道也

與吳巒穉師

一入長安終日塵緣客債課爲公事偶竊暇晷旁及國家利病賢
奸消長稍一伸眉言之所謂末大于本倒行逆施甚可笑也平旦
清心每自恨不十年讀書抱此空質粉飾甚苦假若再侍絳帷畢
三歲之力窮搜今古開發悟門或尚有長進業已置足半途遽難
退轉日望老師入木天之署傾武庫之藏耳小疏數千言舍間悉
有鈔錄可得一指其是非得失之故乎國學蔣君攜得手札大快
積想小試既售爲秋風得意之先賢姪亦青其衿諸門下士各各
脫穎皆杏壇間樂事而更祈藥石之訓鞭策之方以俾書紳者敢
請
與郁念之
辱丈勤勤下訊益以諸品雅惠尤紉故人之誼弟身在網中聊復
爾爾寸管作崇兩眼生憎殆非好官利根也丈何以好言譽我哉
兩郎君英英露穎想見聰秀之語筆花浮動此種至樂誰可易
長安俗地愧無佳品爲報容續未了

答繆采星

行時數行遂隔闊如許每次家報都恩恩一函故不及相訊近聞
科考見遺甚爲惋歎豈戰之罪耶抑觀者之賢買耶遙想上下城
鄉往來公私之事定無清心妙緒則雖謂戰之罪可也科舉不足
重自當得之所爲兄念者大售之根基耳中年學力此時草草何
日收功則三等一番實足爲動心忍性之資吾以此爲兄福兄不
可不知福何自錯過也國事家事弟自關心此中有姑夫之商量
家中有家嚴之主持但得賢兄弟時存一體周旋之念則弟之受
貶無窮矣凡事不能悉詳惟願兄以清心勤讀友于相愛爲第一
義

與繆采璧

高明如兄不敢以尋常寒溫之語頌美之詞相溷惟遙想文心之
深靜學力之灑脫必有人所濡忍獨見斬然人所飛揚獨見淵止
者昨舍妹一訊來屋後之奴儼居新莊高明者亦復爲之乎及問

之姑娘采石俱云已必許遣還而特稍爲委曲如不忍穀棘之牛者自非斬釘截鐵具大猛力則婦人之仁吾輩所共不免安能以此遂忘體念骨肉之至誼乎雖然疾徐緩急之間竊以觀學道淺深之候矣望之望之

與趙漢如

兄之清心妙義而不遇國士之知豈好蹠實者不尚虛逸耶然小格之以發兄猛力是亦造物之微也弟碌碌塵中僅博筆舌之爭都亦無用止如幾句帖括聊供觀者眼中之花究竟成底事業兄明心了眼應有以策我

落落齋遺集卷五

落落齋遺集卷六

西臺書牘

上孫老師

歲底伏蒙批答諄至教思藹然如坐春風明月中神動心開又如聚米爲山谷規畫指授率然有常山首尾之勢也老師以動天格祖之血誠旋乾轉坤之謨略用奇化正握機入微乃至蒙犯雪霜夜宿毳幕生聚教訓旺氣遂滿關山直弄狡口於股掌之上韓稚圭之膽詎方此也以遠人守遼土以遼土養遼人千古不易至論彼中情恇怯者視關外爲畏途併擲揄此鹽煤之利此固智士所笑然三鎮獨無一出而每傾元老之親行者謂何中朝士大夫席萬間之蔭矢偏見之談大率左袒關撫者好驚風鶴致疑薊撫者實畏戈矛各各蘊隆于中不覺以仰望之殷憂思之過今幸和盤託出兩者皆去羣情各安其故眾喙遂息其鳴春防帖然頌聲交作老師至是直無異同之可計何毀譽之可言某嘗竊聞諸君子

之意迴維于十年之前所以歸依宗盟者不啻元祐之相司馬故按疏一出交口非之匪某門牆之私言也老師身繫眾正之望如山之有泰岱星之有北辰片言袞鉞國是所定知不忍因人而併疑其地因小羣而併渙其大羣近傳新督時蒙褒獎士大夫欣欣相告謂休休有容收羣策羣力之雅念如此也不識兩新撫亦足供鞭策否人有言玉帥柔靡貴家輕華子弟時咯血數口老師亦弗之器也果爾何不易置之乎進取之議咸願靜以待時然何以長握必勝之算而不以歲歲五百萬罷敝天下之民人人挾省兵省餉之私望不知其難言之也老師幸略教之某愚昧無所適從但以嘔吐肝隔爲弟子事師之道然不知關事甚愧於君子惟老師俯鑒幸甚

與阮圓海

數年契闊纔得聚首掀髯稍談天下事而天人不偶遽見拂衣人情挑伺之故蓋有甚難言之將不知何所究竟者年兄浩然不顧

既已畱挽不得無可奈何惟願靜思深念早迴人山之車則天下事尙可爲也情界圓缺多關定命明心了眼珍重此身五鼓夢中不及折柳以此數語聊附古人臨別贈言之義

與楊蘧初公祖

京口一別台顏忽九閱月矣老公祖冰心道味凝然如山沛然如雨四方魚驚獸駭而下土波臣晝偃耕隴暮歌靜食霜露之餘而不驚其故信有道者治術之微而大也弟矢口橫臆不足爲吾黨之重老公祖幸指我所未曾使得奉爲南車大發而長鳴之貴鄉新銓固當事者求材豫章多收梗楠桐梓之思然謀之弗協諸君子微有介介魯齋有云自家人說自家話一言破挑者之陰然彼此直諒大見參商今起華匪石俱行矣微情苦口曲而調之化吾黨異同之嫌毋蹈不遠之鑒老公祖儻有意乎敝邑凋敝纔受廉仁父母之賜而遽奪之議從何生也惋歎不已仕者將謂邑實病令望而裹足老公祖何以爲計儻有可調之以來須相其敏力察

其品骨今不審誰爲之署卽如遼餉年年輸將而參罰率不及格
奸胥作祟何法驅除儻復來兩舊丞之類則邑化爲鼠窟矣吳公
祖南遷日費分疏亦敝郡人士一阨也家大人時蒙盼睐感勒于
心家兄弟遂擯孫山當是一日之短家弟病魔未去不敢重煩提
挈獨家兄文心學力尚不後人仰望老公祖之力全而注之沈舟
破釜當有以報弟越在三千里旣邀天之幸老公祖以骨肉道誼
照臨于鄉而使矻矻之苦志觀光無路老公祖必引爲子弟一體
之責當無俟弟之控陳矣

與張篤棊

老公祖鬱然之望如冰映鏡空見者冷然心善也貴鄉屬有參商
銓席虛左借重老公祖提衡人倫之鑒竊幾幾望之昨自一函報
謝遂闊疏至今然神未嘗不依依法星之照也家兄某薄有脫穎
之地久沐國士之知而錄考見遺大負提挈將沈舟破釜以得一
當老公祖旣不棄之藥籠應不吝其神力某于三千里外獨此懸

懸則委曲多方必致之棘闈者尤不朽之銜勒也手足關心汗顏
布瀆

與曾二雲公祖

弟迂疏自率不識治譜然妄謂神靜者誠必孚源清者明必遠魑
魅畢照之謂才魚鳥不驚之謂德俗吏馳驚腐吏牽拘皆非質也
老公祖淵然澹然而凝以如山之力四國載靈一之休羣魔息飛
揚之燄凡我父老子弟頌聲日來一時神明公祖交相與以躋至
治也顧司理遷不副望不知誰何中傷乃邑父母且遭投杼蜚語
過南誰爲爲之孰令聽之不覺爲下土恫焉老公祖定悉本末願
開其蒙顧念爾時落落晨星曙且莫借彼耳食者以下土爲悔地
則奈何敝邑之民瘁矣日供騷役之不暇而竭土之毛剌心之肉
大半爲胥鼠所咽幸新緒方清今又已矣署者再一擾之未十所
究竟老公祖幸時懸之心目庶不終痼乎試事媿媿陳瀆宿昔友
生誼無可已不暇顧言之行否然憐才佳事援手非難老公祖勿

視爲尋常竿牘而憇置之幸甚

答宋鹿游

諱祖舜淮安守

淮海重地蛟龍所居民貧而易動也妖俠乘釁鼓浪翻風具有隱憂在幸借老年丈壯猷坐鎮惠澤旁敷銷窺伺之雄心返哀鳴之鴻雁東南半壁幸受安瀾之賜焉催科撫字昔人所難調甘劑苦仁人必有仁術局外者蒿目而憂真不知所計區區管見惟有緩舊逋以勸終事老年丈以爲然乎附懇做同門邱義軒年兄竟作古人言之堪慟其年伯在堂有子雖青其衿而孱不任事老年丈幸垂青覆露破格提攜之吾輩年誼應于死者篤厚想老年丈有同心也

答周縣貞公祖

託在宇下獲有桑麻雞犬之安既已如天之覆矣典型在望正氣常伸稍得竊春秋袞鉞之餘一抒狂瞽然歧中之歧忽有發于意想之外者水火旣形羣邪窺伺老公祖聞之得無有隱憂乎璫燄

方張內外交結魚肉我下土之殘黎老公祖爲民請命天聽難回則吾民之厄也可奈何第願徼福星之照雨暘時若枹鼓不驚父老子弟安枕而臥則剜肉醫瘡無所復恨惟是舊逋至踰五年理勢誠難兼督調甘劑苦地方爲政權宜而畫一布之以絕胥吏漁獵之端飲德未有涯也老公祖儻不廢芻蕘之采乎做邑廉令忽以議奪今誰爲署之奸胥窟穴侵蠹萬方積漸以往將不可問乘劉父母清緒而早調一精明英敏之才以急治之庶猶可救老公祖畱意地方知無俟某瑣瑣也

答蔣澤壘

年兄行後自圓海入一變爲疑城自圓海行又一變爲敵國初以工垣之推生圓海之疑繼以臨川之難各致疑於圓海弟虛中觀之二者皆過也臨川謂雲中也自是一種意見恐不關於圓海圓海夫亦豈忍至此特鄒匪石調而魯齋帖月吾輩人也乃憤憤生疑漸不可解中細人之挑激至使兩正人無端蒙其毒鬪牆召侮

豈不可爲痛哭哉今羣議解紛未知解得與否而事端將自此開矣王安二子又殺一人一人不足計恐憂在世道柄在中涓禍在縉紳漸不知所止耳如此景象安能脫然如年兄驅省方之轍哉福清去志頗決高邑側目者賦坐席未穩僉堂且行矣所幸秦中諸君子風氣不墜尚可撐持如與貴座師相聞幸力以轉移調劑之責屬之若江右二三正人反覆不已則先進者不得不任其責也

答錢牧齋

官府隔絕惟有講筵一脈稍通眞呼吸非具學識才辨精誠膽力者不能收格心之益以此望翁臺之入爲世道計甚大非一人私言也邇來同志分曹立黃已見太阿倒授將有清流白馬之憂幸孫老師甚膺天眷入關可期而居中斡旋尤亟亟于翁臺是望東山之屐幸勿久淹若向來持議之人聞已虛中無我不必望念也不肖拙鈍駑下不能爲吾黨絲毫損益舌短心長面牆是歎儻翁

臺進而教之或終不至質質耳拜命之辱跂足以俟

答門人朱子潔

武侯云學須靜也才須學也澹泊可以明志寧靜可以致遠每誦斯言輒爲神悚古今豪傑不能出此數言僕根器淺薄學力不到意于靜淡二字守爲涉世居心之本而塵務相關失其故我筆舌交迫迷卻眞詮忽接芳訊知築室修靜隔遠城市頓發起予之歎嘗謂才士之致可以剽名文人之心可以學道以兄之才之年之文譽而高謝時趨晤歌一室何論文章吾以觀道力矣勉思此意守而勿失竊因下問題齋額曰靜遠愧不能大書聊以塞責簡讀妙義知心清而機靈風格適上無些子脂膩之氣更願挈其大提其脈勁而正和而澤總之清心所入自有眞境非他人所可告語也

答沈雲升

向聞茶差爲僂羨年兄之僂僂也曾幾何時而風波鼎沸對面如

山人多鬼蜮之心步有荆榛之挂然後想僊不獨茶差凡乘驄而出超然于是非之外者皆僊也弟不得年兄之靜而習爲懶不得年兄之微而師其心方且束手新差尚有數月不得去勢必至顛躓而後已孫老師聞有進意雖中外尚有異同然可翹足俟也總之都中之議日變月化不可預設成局只看春夏之交恐變態尚未止此年兄靜觀之餘何以教我併爲吾黨計乎

與魏廓園

吾輩疏亦復如此不必言矣今萬一可爲者在九卿大臣之疏而太宰且杜門求去安得戶部有韓文爲之倡率耶此時言去不謂避言乃近于避事事已如此三十年重名須有結畢之地年兄素以道義爲太宰所重此事須一激發卽言之不行事君愛友各盡其道而已年兄以爲何如幸密商之弟目小苦故不得卽面晤偶閱劉瑾時事蹙然而起以告知己過三日卽無益矣

答李緝敬

纔拜鹽筴之教又奉激揚之牘民之剝苦分甘吏之拂肝洗膽儘覺學道者仁術自妙而信心中搔癢都靈台臺之割寸丹以灑秦晉之墟者孜孜不厭如此弟坐困長安車塵泡影每披對大疏一字輒意赧心飛也法星西去正論孤危翹首露洲空餘神往

答許約疏

老父母高懷曠致當于清風明月中置品憶往歲在清涼坐上識領光霽則亦時以清涼意境想像鳴琴之韻不意民有清歌朝施墨錮吳山吳水應笑廉吏之去亦聊以去後口碑明敝鄉之民心尚在也意者清固造品亦違世法乎論久自定謹伸舌以俟榮分布被之絲謹效絺綌之報庶幾我思古人之義不敢煩稱以溷大雅

與毛禹門

昨忽聞太夫人之憂慘然動色卽擬走數行弔問然猶妄意事機可圖環召不遠且曲商善覲以得一當不意大璫旣持于內福清

又期期于外卽太宰一片熱腸不得不觀望慎重乃小人交通大
難先作同文有獄直道不行邵上蔡之流毒再發而後憤兵交起
今日之事不至二正之季不已者弟將駕山中之車從仁兄後矣
若使天牖聖明大奸鋤去則吾黨可以吐氣而仁兄彈冠之日也
然向者之毒發之浙猶可省也今發之江右謂之何哉仁兄虛明
冷覲何道而可要之弟亦過計矣卽霞城恐亦在餽飢間未知作
何結局辱仁兄惠存發此憤懣洽寔諸君子皆行矣世道否泰真
聽之天無足言者素絲一縷伏惟莞置

與蔣澤壘

前字奉報想已入覽嗣後互相觀望彼此調停意求少靜不意髡
鉗亡命等語出而佐鬪兼內禍日深卒不可解激爲相爭之勢于
是副堂之疏一出公論爲之一鬱彼中甚忙卽陳居恭且出疏以
參璫而他可知也總之事機旣發要地絕無有應手照顧之人年
兄試觀邸報與一切旨意概可知事之究竟必至二正之季再見

于今日耳又何言乎時事如此可憂甚大局守長安如在船艙中
一聽風波搖蕩然後想持斧乘驄之快也黔撫出疏自辨而不發
鈔近霞城于齊中諸公子覓得刻冊大是放恣然匪石考功覆疏
已爲平情之語渠意亦倣年兄功過相準之意有罪疑忘過等語
似亦不必煩參駁也意于功罪大凡中帶一二句足矣年兄以爲
何如僉堂意欲行太宰更苦不肯畱此局不知應如何收殺年兄
可一言密教之

答徐若谷

上谷重鎮畿輔鎖鑰台臺以旋乾轉坤之手矻然爲萬里長城使
碌碌書生安枕于此皆明賜也卿雲在望鈴柝相聞廟堂之上風
波滿眼台臺憂心世道儻不吝一葦慈航渡之彼岸乎貴鄉道德
節義之風申于天下不肖沐浴餘潤依爲斗極豈特并州之念而
已台臺收其夙尚則幸有以教之

答夏緘菴

台臺隆重早借分藩爲一路福星此當事者循資采望本有同心
不意淮海多故舊者復畱再三商推乃移江右總之以道德之鄉
處第一流人以竟從前第一等治行竊爲并州額手慶矣家大人
村居卻掃特承惠問故人高誼銘佩不忘然此硜硜者實家大人
之教也朝西暮三其謂之何來賜謹以璧返統希宥其不恭但萬
二生極感鼎力昭雪鹿洞生光台名當與紫陽並傳矣

答王洪崖

諱道元廣東副使

台臺洪猷亮節壁立千尋海內正人仰爲山斗固非一二含沙之
口能鼓浪而挑戈也嶺表重地正借福星坐觀澄清之烈益懋建
牙之望彼人已斂翼而歸殆不煩過爲介意韓正老乃吾輩正人
且與家姑文宿契俟其入時一解之不敢負睠睠之託也

答魏元白

諱光緒山東按院

讀來教殷殷世道之憂乃長安鼎沸而台臺蓬萊閣上仙仙乎湧
日吞濤令人慨然有乘桴浮海之想今而知人間險幻不在大海

茫茫只此陸地奇波漸成蟻穴方謂靜以消觀釁之熱腸猛以清
憑城之深窟而雷霆忽下狐鼠方驕折檻無能挂冠有志獨恨不
早得補浴之手探驪珠而掃妖氛耳

與錢梅谷

向在南康有一府學訓導在之臣貴州人甚有超然意極于白鹿
洞中禮重之後轉貴陽教授十月圍城督諸生以死守乃圍未解
而已劣轉兩院雖敘薦以卑官寒冷莫爲昭雪頃其子亦以明經
應試持疏欲上曾爲達之貴衙門陳公祖竟不之許但念今天下
官爵冒濫功賞混淆彼一老明經受圍城數月之苦能倡率青衿
以死守之義僅以循資之故使曳裾侯門真可憐也此種情事似
與妄自陳乞者不同台翁儻可爲一言使達天聽乎想仁人君子
有同心也

答孫六吉

恭惟老師以正法眼觀下界空華直提人心膽于月鏡中魔障畢

消狐禪始破塵飯土羹者更覺無處生活此亦敝鄉一變至道之時也往來公與明相須而文與法自合精氣所通神明爲動況于握槩磨煙之士乎績望竣卓榮膺特簡不得久借麟鳳之章然數十年間敝鄉有棟梓之遺則皆誦明德于無窮也某硜硜爲性直于邪正消長之關茫乎未有所窺聊復徇臆妄言耳今震霆時擊狐鼠日驕內外之變隱憂方大式望老師還朝展補浴之手作中流之柱國是世道何幸如之瞻戀宮牆不勝耿耿同氣之懷未敢以私瀆也

答周縣貞公祖

異同之言發于吾黨流波激電遂張中涓之醜所謂楊墨慘于洪水信哉言也中外旣已分曹是非從此始定小人之網或未易張也今發難者去矣化異爲同似乎有機安得且晚聽履聲之入使紛然者望斗極而止其所乎惟台臺教之不敢不竭駑力以從

答吳石渠

年文品力吾黨託寄甚深非直爲一時華要而已當事者別有宿心持之堅確故不遂所願然畱居鎖闥出大手眼以驅邪指佞尤世道大幸也爲期不遠努力前修若時事尚可支撐不遂挂冠以去猶可俟飛舄于長安傾倒數年心期耳

與宋一衷

諱師襄

年臺持斧而出澄清畿輔且舊遊之地吏弊民情可照燭數計也乃中朝議論忽復紛紛而雷霆震驚多冠走死可爲班行短氣年臺聞之得毋拍案而起乎井陘道王君弟與共事江右甚知其才品如玉之粹者也年臺畱意拂拭之砥柱旣移吾黨遂無領袖言念近事惟有軫鬱

答楊蜀亭

諱金通丹徒令

敝鄉得歲愷悌君子多辱而臨之然屈指卓魯未有不首推老父母爲東南半壁之冠者驚濤屢作正見安瀾非老父母妙運深心不知張皇幾許若經緯之緒冰玉之標固非贊歎之所能盡也山

公坐上拭目以需不盡種種

答周縣貞公祖

敝鄉凋殘已甚十室九空蓋不俟水旱爲虐而皮骨將枯矣幸邀
仁人之賜甫脫呻吟漸有起色乃生之不振造物者復沼而魚之
引手而援是在老公祖惠澤從心再見富鄭公之芳規耳振未敢
望蠲亦須爭若停舊逋以毋爲民擾則老公祖可以便宜行也擬
俟勘報公言請命然不如老公祖之一言九鼎伏讀大疏所謂仁
人之言其利博哉有焚香以祝耳

答張燦衡公祖

弟習爲外吏每謂官評長短惟地方知之最真故不敢以耳食之
見短長外吏若碧山劉公祖之議蓋先得此心之所同然者也前
雲間之舉本以士民之意而貽累賢郡守以行益垣言其所聞老
公祖言其所見公論昭然老公祖何嫌何讓遠思棄敝鄉而拂衣
乎覆疏益屢促之祇以太宰杜門百事擔閣咨已隨到隨復今部

覆已奉明旨矣以部遲非本衙門遲也老公祖持斧澄清敝鄉方
有雲開月朗之色卽報滿期迫何妨請寬且敝郡五邑三缺其令
所藉于老公祖之釐剔者以日爲歲萬勿孤雲霓之望也水災再
告民且爲魚仁人君子側然動念知不俟詞之畢矣

與蔣澤巽

月初卽草數行奉訊未得便發一閣遂二十日可見長安之混也
然時事亦不出所料今萬元白奄奄一息生死未卜林心弘之逃
大爲衙門短氣昨士光亦杖發矣了此一方案全是太宰之力雲中
已丁外艱大抵從此可以靜矣魯齋帖月爲茂明所轉都有化異
爲同之機亦世道之幸僉堂纔可畱而副堂又有必去之勢若畱
得太宰則可爲也終日騎馬而待漏則坐于松棚聞諸璫方以武
廟實錄進則禍未知所終殊生挂冠之想年兄何以教之

與曹薇垣講文衡

年兄以絕頂精神做出絕頂好官龔黃卓魯復見今日移地易民

不過暮月可以分藩前者加銜之議不敢力爲贊決者吾輩但討一分便宜便有媒孽者居其後孫恭甫年兄所以被此者亦以加銜爲之崇也功多賞薄乃有餘思年兄以爲然乎長安光景大抵是二正之季士大夫之憂未已卽社稷之憂也方發挂冠之思年兄何以教我

答趙芝庭

嶺南昌曲周令

側聞老年文妙手運斤清心茹蘗胸有成竹目無全牛畿南卓異之聲無不首爲屈指者夫今之令亦難矣催科則病民撫字則病官急操之似于釣奇緩繩之易以滋蔓使安焉習焉雨濡風蕩而不詭不驚者此真治術之妙也老年文殆近之矣旣爲第一等令自有第一等官公論自在翹首俟之

答詹狝南

諱應鵬嘉興守

嘉禾爲浙西重地非深心大力未易妙入人心老年文淵然止水挺然孤幹恢恢遊刃定有不言而使人意消者下車未幾先念故

交遠馳翰貺見之欲汗也弟拙疏自信碌碌如人已覺鼠技之窮空灑杞憂之淚老年文何以教我乎

答胡泰六

粵東之變紀綱掃地國家二百餘年未有亂民披猖一至此極者豈特一方之慮實關天下之憂自非老公祖文武壯猷剛柔妙運定亂于呼吸之際決機于緩急之間則禍不知其所終矣二千石自失民心持斧之憲臣何罪彼中士大夫自有公論廟堂自有處分總之紀綱爲重義不得姑息亂民而始禍有因亦不容混淆國法讀大疏再四情法曲盡似無以易之矣

答饒業明

諱景暉廣東藩司

地方之變固云意外然釀禍有本縉紳之口不可諱也握兵者道其罰而旬宣者分其咎是豈情理之平不佞竊效一言云身在內而閉戶不納是爲畏禍身在外而開門揖盜盜無後憂今臺下焦頭爛額矣又何罪焉以風紀之故而苛于共事之人要終不能倒

翻公論也。敝衙門行有持平之議，臺下亦且靜俟之耳。契闊之懷，實增惋歎。矢竭區區，不敢靳也。

答門人饒得渭

緬維高韻，與日俱長。發久閱之光，以生故人之色。蓋屈指計之，獨未曉文心，道味竿頭之步，去阿蒙幾許。以此耿耿耳，粵事大為駭人。波及尊公，尤為悵悵情事。曲折昭昭，耳目掩面。心者固不能以一言操功罪之衡，正自無煩過慮。主持公議者，應且有說耳。長安如沸，瑞禍不減于亂民。僕方履虎尾，而想挂冠不審，得燒燭以待良友之至，否先期就道，神靜心閒，亦戰必勝之道也。儻有意乎，答王中訥。諱永吉定興令

每從薦剡中，想見芳標清韻，超然治譜之外。其自驛車來者，又無不口頌仁風，熒熒聲光，梓里生色。幸以立水抽繭之意，懋勉前途。吾輩有一片血誠，入赤子腹中，則神明鑒之，豈有不能動物之理。託在同心，固無敢不竭也。

答劉泰望

諱斯嶽海澄令

猶憶明衡年兄在銓署時，問其將來之秀于老年丈首屈一指。弟每藏之，隔間明衡非妄語者也。老年丈芳聲卓政，有口共芬。今居波斯寶藏，此亦吾輩亭亭獨上之地。海上之民，習于汙政，一沃以清風，孰不泠然入心也。仰惟勤勤下問，此為芹味，可以共享。老年丈定為發一笑也。

答吳本如

都下囂靜閒忙，一視兩關為動息。台臺仗鉞臨邊，風雲在心。戎索在手，虜銷跳梁之威。口寢潛窺之志，如韓范、望河、陽壁壘，自應不同。乃其大者，尤在輯和文武，捐除畛域。每敝座師從關上書來，輒歎服台臺淵妙。沈雄不啻口出而撫臺規畫之方，率受鹽梅之劑。是又在台臺善治而成之。夫封疆大計，最患參商。遼左淪亡，此為病本。不肖愚迂，無似然從不敢妄談遼事。自謂多指亂視，故矢不犯此一段罪業。顧管中窺測，每欲以此言相告。台臺深心神力。

廣益集思尤喜聞芻蕘之說者也辱忝通誼故敢布之
答吳亦臨

猶憶途次一晤芝眉至今耿耿于懷也年丈卓識孤標珠圓玉映
而久淹墨綬兩地琴清書最之方新則峻擢之在邇所謂觸邪持
正朗朗日星之章固年丈事也弟庸庸何堪當此乎有翹首以望
飛鳥之入長安耳

答瞿芝達

大府劇地才足以運力足以擔精神足以周徹而又有矯矯自異
兢兢恐墜之念以提之則愈劇愈見利器耳年丈具此數者與運
斤成風何異況以計典爲言何其謙抑之至也念省會重地如可
題畱亦屬便計萬不必以此中爲念

答蔡孝來母舅

長安捱日每喜家訊之多而輒懶于作家訊時一舉眼即想見母
舅蕭然之趣然通候之牘落落乃爾亦恃有迹外之鑒而已于青

門年兄函中啓得手教爲之快然福祉盈門他無所念衣食之計
水到渠成即俯首而思亦未得其方小事尚爾況欲高談天下大
計哉邇來走馬漸慣獨苦舌不能結乞歸之想旦夕不忘母舅何
以教之玄老偶有人言昨已爲之曲致然千秋公論不必以口舌
爭也現聞何以久不來館閣中纍纍橫金腰玉而麾湛持于邱壑
世道大略可見吾鄉水災光景定惡有救荒之策亦望示之可以
入告也家訊一函乞爲發去聊通平安二字而已

答申青門

向有報函已悉別來款曲適接手教又如晤對一番亦旅況蕭然
中大快事也令伯年翁沈識雄才共倚爲封疆之重啓事已駸駸
上矣微聞有關門之危爲擬議者而言者忽出殊爲惋歎以目前
用人之故彈及九原論定之相業弟尚未諳往案一讀令伯大疏
如矇斯啓千秋公論自在詎足爲令伯累乎病目口授不盡耿耿
惟年兄亮之

答申立渚

邊疆鼎卯急需旋轉之才老年翁沈雄淵妙聚米爲山谷使人躍躍有尺組繫天驕之想乃明綸甫下旁議忽生凡在知交之末共深多口之歎悠悠煩語不足爲老年翁白璧瑕第索及三十年前金滕之案則九原有知寧無太息甚矣議者之苛也伏讀大疏瞭若指掌急向敝同咨鳳毛年兄婉致此意渠已首肯卻不意鄒瀘老之有言然總不出此數言之外老年翁第靜聽之所謂不辨自明者也千秋青史一代人心要豈以目前筆舌爲據辱大教之及敢布縷縷

答陸衷涵

長安聚首悠悠可思機緣偶阻仙旆南還殊令吾黨有索寞之恨然璫礫方飛縉紳短氣吳山吳水一年逍遙天之所以厚年兄者甚至不須羨禿筆招殃也太宰方欲破格用人遂不能安其坐今格外所增暫爲新選君出頭之地也年兄青瑣鳴珂正好穩夢但

預辦數篇大文章爲整頓乾坤計耳申立老忽挂多口殊是意外然總屬前人舊案不足爲累也一函幸不浮沈何當爲行李之累偷兒眼小覷此空函豈家書真抵萬金乎一笑

答陸足吾

年文行後正氣遂衰一切國計民瘼俱無人得其要領吾鄉落落兩三人尤覺孤弱不能與秦晉齊楚爭盟若何武老之再造危疆功存國本僅得平平一轉而吾輩已覺力竭氣盡矣此亦孤弱一徵也年文早著鞭事更有大于此者官府參商仁賢浩歎豈年丈優游松菊時乎弟鼠技方窮白雲在眼不知能坐候使節之入否

答白惠風

縮綬黃堂風行千里自是吾輩實在經濟事業等而上之猶屬隔膜不親況如弟空言無裨安所當萬一乎張弛寬猛之間斟酌布之而毋護恣睢蠅營之吏于下二千石之責盡此矣台丈妙手精

心宿有高譽知新政卓冠兩河欣為梓里生色若區區郵使小誤
五實年兄自不作此俗見也承命即為致之不煩介意

答楊大豫 諱方盛河南按院

長安聚首正賴同心之雅今年文持斧南巡地居四方之中央則
澄清一方即所以又安天下固不獨兩河拜賜已也但吾黨落落
又見玄黃之血每思脫離此地而羈局不了遙望驄馬之行觀風
問俗不啻仙鏡至地方治狀自無逃于冰鏡中弟蒙蒙不善鉤索
實茫然無以答下問之雅若此中近事只大家求靜耳看吾黨福
運何如年文高明之見幸有以教我彰德白守敝府之卓然者也
幸照拂之

答鮑上海

老父母治行卓絕有口能言有心共曉無俟不佞之微塵濺沫裨
益高深也理人之方甘苦自知與民之分甘茹苦者知之區區芻
蕘乃蒙俯采尤非其質然以見仁人君子孜孜求瘼之心矣巨浸

稽天吳民其魚老父母德政所感海若效靈聞瘡痍未如往歲果
何道以致此

答何武莪

台臺正氣膚功昭垂雲日迴翔兩粵共有嗛嗛之懷然內之坐嘯
畫諾所謂虛名便計從來大經濟之手率以鎮撫一方歷年久長
乃得盡展謀猷建不朽之業且達觀世局欲速其功每為小人藉
口惟君子退守一步則人心轉有餘思正氣亦覺縣遠台臺之暫
留甘棠舊蔭也萬不宜動東山之思使不知者以為介介也肝膈
之私敢效他山台臺其俯鑒之伏讀加派疏冊為民造命為國奠
本使今日有十五人心台臺之心而彷彿良法美意以行于天下
何至騷徧窮黎此固不肖之所神仰而舌甘者也何敢愛焉

答金稠原 諱世俊

清風朗月輒深立度之思每念世趨陵夷人心波蕩銓政幾于濫
觴道宜受之以節乃可以通其窮而疏其壅然乞者或未滿志焉

山公座上清通簡要如翁臺者指不敢多屈而以些小同儕之事
茹蘖不吐飄然高謝不獨明厚亦將砥世也相知每共歎此義引
領羽儀之出在旦暮間耳弟孤拙無所短長心之所存不能畢達
何意耿耿者辱鑒信于千里之外耶

答楊大豫

代函纔報俄接嗣音弟于諸兄弟中最爲拙而孤懶而廢其何以
承下問勤勤如此然弟手中土治狀實未有聞從此當時時博訪
以備芻蕘之采苟有所聞不敢不密以奉告也邇來議論少似靜
平不復爭水火立黃矣此番舉動所傳聞者多出意外然不關吾
黨相知則亦付之度外而衙門變態沓出又有孫堂翁之變真可
浩歎也貴屬推知治行卓絕而風格不凡者鑒衡定有別得可舉
其名見示否餘無足爲年兄道弟亦有五六杜門不出總無好
光景也但望文場監臨如雲中絳仙耳

答陸鳳台

諱完學福建布政

景仰有年矣宦途修阻無緣識荆敷歷之偉望峻卓之芳聲私計
粉榆光耀建牙之指者實惟翁臺是賴邇者八閩奠安紅夷底定
則經緯之績居多雖計前啓事方議暫停而公論所推要當超乘
或需次撫閩或先陟卿寺當事者正有商量自不敢後駑力也伏
讀條教露湛霜明國計民生何謂要言不煩矣以此實心實力仔
肩天下大計何事不立何蠹不清仰窺淵妙之藏必有燭照于四
方之故者其亦可傾儲而教之乎

答楊遠初公祖

向有一函馳候想已徹覽近聞巨浸稽天民且其魚所恃仁人德
政活我災黎此中正竭絲力共爭改折其喫急要著全在接臺公
祖勘疏幸老公祖鼎力促之敝邑十有七潦近在照臨之下尤望
破格爲民請命近武進議畱卽可以青暘移之敝邑業與當事者
言之未審得從所請否長安變局日多弟以拙質貿貿而行殊愧
無所短長老公祖何譽之過也宇下之庇已弘而遠益之以翰貺

更令汗浹附有一絲爲獻亦野人之芹也

答沈雲升

年兄行後吾輩遂覺孤寂又當內外水火之時語嘿兩難官命如葉真使人望巡方使者如雲中仙也執法除殘觀風問俗步步是實際事弟正悔擔此虛差卻于鴛背混此歲月年兄何譽之過也人情險巇議論亦消正使浪息波平原自天清日朗年兄虛觀近事且謂之何其有可以教我否靜長年兄治行旣已膾炙人口學道自其本分容與意白年兄商之種種欲言筆不可殫

答田陸海

諱唯嘉浙直鹽院

老公祖正色昌言主持國是屢折璫嵌不避櫻鱗同志者方望爲領袖卽邇來盈廷請劍猶是老公祖餘勁也何云不合時宜哉弟孤拙無似碌碌猶人老公祖以宿愛之故而過譽之愧矣愧矣敝鄉凋敝之後重以商羊爲祟民且爲魚菽亦不飽當事者按畝責賦欲舉從前救災成例一切寢格恐洶洶思亂吳越間將無寧宇

老公祖握兩地之命脈爲民造福端有厚望仁人一言百世之利也楊蘧初公祖端嚴敏靜吏弊民生洞無遺照今譽望日重遷期不遠尤乞老公祖爲地方借寇定此救荒大政儻有意乎辱承手翰故敢率布

答周老師

久無便羽遂隔冬秋近從俞令親拜雲中之札併悉吉履及太師母襄事之期正擬抒辭作輓一申門下士私念忽枉台命屬以傳信之言某不敏以餽釘小業受國士知而今腕膈間積塵落暈且忘之矣况號爲古文辭尚未能繫字切音顧欲執筆誅行哉伏讀懿略瞿然下拜實深篤行先民有道人想不獨景闡範而式聖善也附塗歌巷歎之後託姓名以不朽言卽弗文豈非快事要以機絲雲錦易蕪穢之言碧玉文犀飾瓦礫之語師命則重愧拜何安至白毫穎秀實分夢中之花庶幾向管中乞靈以不大負明命未知筆神見許否耳

又

長安之局正在可解不可解之間一時意氣相煎猜嫌互起總是聲望皎皎之君子各有獨登壇坫之意而事會偶有參差人情又多挑激遂使剖心泣血之交情忽入深雲迷霧之變局卽圓海年兄一去雖有微情亦爲人說分喜亂者借以爲題好事者蔓傅之謗吾輩平平澹澹何樂有此豈非氣運乘除君子亦有不能自主者乎今波浪少平全局尚在所難言者聖躬孤翳特甚左右伏莽方深昔人謂參政他日之憂也老師終能以度外置之乎葉相公快快而行怨尤殊甚彼謂調停已苦而公論遺議紛然要其病根獨不釋然于南昌波及禹門兄陰阨其出機會屢失可爲歎恨老師且幸祕之某向出口見憎不知何緣獲戾若復言此又增一重罪案矣吾鄉水災正在力爭改折不審得從所請否急候按臺勸疏老師幸著力言之爭十纜可得五也台諭饒父母廉明爲一時冠己心識之不敢不竭齒牙之力諸門生漸次出都今只寥寥兩

人林門生聲望甚佳老師時一提撕之則他日同心之一助也時事日難頗切歸思老師幸終教之

答程徵源

薛正己保定巡撫

恭惟台臺皎若鏡懸淵如水止吏民之利病直須坐照兵食之單匱何難巧籌乃虛懷不居殷殷下采夫罷餉留兵則此五千人者向豈有量沙之術乎抑別有醫瘡之法也財盡則議銷兵烽急又思秣馬多與去盜有擇焉權緩急之勢而謀分合之宜問疲冒之籍而簡精銳之旅蓋書生勦見不過曰少勝多實勝虛耳局外何知短長惟台臺精核而妙運之并求向者所以留兵而罷餉之說也狂瞽曉曉以發高明一晒

答樊鍾陽

薛尚燦兩淮鹽院

今天下竭澤而漁賢愚共歎似乎舍赤子之皮毛遂無點金之妙手然猶是齷政而入年臺之擘畫何處生此五萬之羨七萬之抵也天下事不得實心實才以爲之其腐敗金粟而枯竭脂髓可以

數計乎從來經國名臣原無奇方神力如此苦心如此通變如此先公後私則既盡之矣弟愚亦有心拙無所效捧讀大疏祇有額首已耳

答萬拙菴

諱谷春吳縣人

老父母逸才慧照幾于遊刃然犀而冰操凜然勺水不飲此治民之所交口而頌者也方今災沴頻仍民窮盜作朝端日見紛歧內外正當水火民生國是端藉老父母人而主持之不佞碌碌無奇心長舌短其何以答有道之譽祇有愧汗沾衣耳

答卓嘉定

做鄉不辰遭此巨浸所賴仁人君子引手不啻起白骨而肉之也伏讀台諭奔走汗泥問飢煦苦字字日煖春溫從此民不知災矣昔人謂救荒無奇而程子謂一命之士苟存心利物于人必有所濟通此意行之動念具有化工出手無非生意未有心真力竭而澤不下暨者也老父母聲問卓然德政不勝書偶推目前一端言

之耳

答鄒靜長

手教再及談甘州事如指掌卽聚米爲山谷不是過也邊疆之事如此使弟長一識矣擊璫之局草草而敗幸得支延目前而側目者方深亦聽之耳居此一官殆非計生死毀譽之日也

答陸景鄰

當今經世之才目之所見心之所許實無居白臺之右每向相知擊節非敢佞也貴陽危地乃大手轉旋脫穎而出之會頌豐功偉烈者將滿天下又豈俟某之三寸舌哉台諭屯種鼓鑄悉經濟實用根本先圖而歸于減以求精此一言者尤救時急著居邊境者概不肯言亦不肯爲每念封疆之事難以臆決不敢浪置口語白臺以一旅一卒定前人之案則成敗利鈍之數瞭然矣內之所患者獨遠徵兵而多費餉餉固不容已願寢徵兵之說耳蔡元老負天下之望白臺同心戮力以成之銅柱之標某謹執簡以俟大刻

淳志名山不朽時一披誦以當塵立并州新態遂復爾爾台諭業
心識之矣

答張燦衡公祖

敝鄉荒陋之區老公祖法星照之朗朗乎耀于光明之域矣洪水
爲虐一望渺然漂廬沈竈之景嗚飢號寒之聲老公祖耳而目之
繪鄭俠之圖以獻而當事者以爲謾也行且加罪于鄉士民弟某
輩從此緘口矣仁人之言業心拜之庚桑畏壘百世不敢忘老公
祖也

答董見龍

諱應舉

兵興以來民力已竭當事者尚仰屋而歎每見聖明一番發帑卽
滋一番盜騙從未有費省而效多如台臺之屯政者台臺經緯之
妙仔肩之力實以謀國苦心拮据從事故荒郊變爲沃土勸農卽
以養兵其實心快之不禁舌之津津也豈足裨高深萬一乎屯事
惟廣惟勤惟久乃克底充國之績台臺尚堅忍行之以紓國計之

乏此滅口第一根本計也台貺誼不敢自外然以新設之節有捉
衿之勢一絲一粟皆在嘔心節縮中何當捐俸以賜乎敬心佩之
完璧以返

答李緝敬

不肖謬謂差無仙凡視其居之者何如耳台臺持真實心發大願
力照之以白日拂之以清風吏洗其腸而民飲其味台教所謂行
所無事則真吾道之仙法也台臺心可自信而人亦無不爲台臺
信學術事功俱在不欺兩字中而獨一方禔福哉不肖歸依有素
正藉箴銘乃台臺將以例讓其如同志之主盟何

答李若鶴

慈邑宿稱劇地非運斤之才未易愉快也每聞品望絕羣而上如
百鍊精金浮圖合頂豈憂罡風吹墮哉弟最以疏拙自信甞勉支
吾所望同心早入正人生色耳

答劉康谷

近從德化令君便郵附有荒函奉候想已徹覽矣老父母苦心苦
味士民知之當事知之所不知者一二含沙之口耳棠陰不改槐
路方長終當爲老父母白去後之思何況計典斷無吹毛碎璧之
理也老父母不須介意春風北上拂席相後彭澤酒錢不敢醜拜

惟台慈照察

答程肖莪

詳紹河南撫院

恭惟台臺志在憂民道先濟世風雲變色樽俎盡是甲兵雨露從
心鴻雁皆歸樂土蓋中原爲天下之命脈而台臺作四海之斗杓
澤豈在于一方功自關于社稷昨者進重大疏獨著儆戒之詞大
破貢諛之習追觀盈廷之諾諾益想正臣之審審拱聽履聲以作
柱石某空有愚忠苦無佞舌方轉喉而觸諱輒望若以捫心何當
下問之殷更沐百朋之錫永懷明德可任瞻馳

答李大衡

詳思啓浙江按院

驄馬南行風清兩越每讀驅殘黜墨之章凜有霜氣至憐惻民隱

繪圖請命藹乎仁人之言也台臺之造越者至矣早望還朝主持
國是將梓末徼有餘庇正恐孤蹤已還無緣再領塵玄耳

答吳茲勉

諱之甲浙江督學

老公祖文心慧照迴在天際俯視凡界直懸肺腑而獻之區區摸
索妍醜較量短長不足道也以九十日盡兩越三試之秀如風行
雷過十不失一乃今相士之神不得不推老公祖第一矣文衡所
重教化攸關越士囂而陰術亦善變以老公祖之陽明孤峻明表
而微導之必有道術入人之妙竊洗日以觀成不敢哆頌前美而
已某方戇直見憎勃有尊鱸之想吳山片石仰望真人紫氣未知
緣法若何猥辱高雅惓惓敬謝大德并布依斗之私

答王玄珠

瘴地僻遠人所意厭而翁臺凝神畢慮以居之霜月高懸夷民靜
謐勞苦績奢詎他方可擬矧孤忠環召久在馳驅人心未能甞然
要以眾正飄零之時尚有疾風勁草挺居天末則吾道有人同里

生色所望旦晚還朝砥此狂瀾耳何武老有國本邊功抵餉三案
方在推轂間事忽中變正恐以敝郡爲累不知遲速何如葉父母
冰清山立劄心愛民真一時首出斯民直道與緇衣好德正自不
能己已台教蓋先得我心者逢人說項早已竭此寸舌矣弟孤蹤
踽踽抽身無路每懷大雅何處晤言臨風悵惘

答門人余未之

每懷清晤夢在長松白鹿之間偶一惝睂談天下事猶往日餘緒
也何日北上潑茗煮雪助我靈心浣我塵面乎勿久作兒女戀戀
也近見賢書故人寂寂毋乃爲彼哉所笑寄語諸兄宗風未墜吾
道不孤勉思進修以觀後效傳兄并道耿耿

答寇禮亭

諱慎蘇州守

治敝郡者不難風馳雨驟難于霜明日皎要使人恬于理俗息其
囂各有恥浮薄而勉忠厚之意則至治也老公祖居之以惇一臨
之以清嚴民風吏習肅然丕變師帥之義洵無愧焉業已書上上

考恐不能久借寇君然商羊肆虐之餘雨粟無計轉漕益迫而織
璫復挾其重以前此遺脂挺而走險亂可翹足待也老公祖調甘
劑苦莫難此時東南半壁之憂以累老公祖矣高明何以計之

答何大瀛

諱應瑞

敝郡向借福星民飲其和熙熙如也士澤于道彬彬如也觀于大
射人有尚功尚德之思焉以此知老公祖衡文之政中土丕變矣
數十年後猶將歌詠作人之澤況雲漢昭回之日乎不佞一覲台
光每懷大雅翰貺之辱敢不心佩

答黃行其

外吏之難非官于外者不知也李官之難非久于李者不知也台
丈以才以識當事者倚重尤殷則其難定倍于弟然難盡而易者
至矣都中江海波濤倏忽百變弟力觸兇鋒蘧蘆一官儻未卽挂
冠猶能矢竭三寸舌以揚芳譽也

答董景越

粵雖僻壤然西南夷動靜之咽喉也從來治民多良吏而治夷者獨首班定遠寬猛操縱之間非深心淵識誰能妙運況當此土酋跳梁滇黔蜀騷敝之會乎台臺才而本之以誠識而濟之以膽將安粵以安西南半壁反側者將望風稽顙焉側聽鴻聲書之竹帛

答梁樹宇 諱建廷

年丈天駟異才瓊芝卓品黃堂奏最中土風清昔漢詔二千石以政平訟理為安民之要今民之不安政之不平也沉藩屏之地均調實難年丈剛柔妙運為民大父母寧復河南南陽之不可問乎

答王玄珠

粵西僻在天末法網闊疏聞猺獠蠢而頑然畏漢官法甚其不肖有司家奴胥吏雜出而蠶食之若得廉吏則易安也台臺清霜所拂人人易腸田泗且懾威帖息獨黔禍方始不免紛騷披髮大費區畫耳何武老之遷聞非其志然二三同志者舌力止此將需次樞曹台臺晤間善慰存之同鄉主盟寥落已甚日望台臺竣事而

入若嘉惠之及殊為慚悚絮語陳謝亦附于同好之意也

答趙□□ 諱天錫

國計匱拙弘羊不勝烹也當此而言寬商幾于塵飯土羹然清其源釐其蠹仁人之手每有上下兼利之法而地方旁撓則又在執持之力耳年臺合數長以握籌人稱利津國無虧額此真救時妙才也無憂匱拙矣

答饒業明

台臺峻節弘猷敷歷中外鬱然建牙之望矣粵民不靖自有任其責者公論昭然飛波已息拂袖還山介不可奪難進易退風操迥然不佞嘗謂行藏大節寧處其後可以留而去者不失為高標不可不去而留者不免為戀位此一行也公論所以益明而台望所以愈隆也出山之期屈指計之矣

答晏玄洲 諱清

地方數厄洪水之虐而老父母造化之手拯之沈淵仁心所喻民

不知災雖卓譽久飛即在異等之擢猶得邀半暮之靈造物災黎則真非望之喜也改折一議費盡筆舌幾于坐爲罪案今以全災微浩蕩可少慰仁人如傷之思若敝邑無天徒有向隅之泣耳國是紛紜願望主持豈弟父母每爲歌詠不置無俟台命也

答朱上愚

諱光祚河道總督

治兵治水宇宙間兩大事神聖之所經營豪傑之所馳騫盡此矣非有絕人之才入微之機則不可以得志矧禁旅媮詭未鼓氣衰而一經台臺整挈如李臨淮旌旗壁壘一新也以此偉略出而視河雖沈州隕隄勢方孔亟知河伯效靈不煩壁馬之沈矣黃流既平措中原于衽席不肖輩俱可安枕沐如天之庇甚大當執筆以俟用紀明德

答楊兵馬

司城之難百倍外吏法易詭權易撓奸又不勝剔也終歲而璧無玷焉如臺下者指不再屈不佞即旁局乎然廉聞精采時口芳譽

若以守法爲忤俗庸能守法也歲計之役無煩介慮

答孫蘭畹

諱森

弟閱人多矣見吏才之敏妙脫手彈丸者莫年翁若也在江以目在粵以耳兩地政績可謂入于精微使人意動而精消惜郡司馬之擢未快所期耳然才局所恢運以深心而一根極于實地則真無前之業竊願拭目以觀超簡者也

答林二府

向有一函奉候并鳴感佩之懷承台教憺憺具悉尊旨每念敝邑凋疲之極不勝科擾之煩譬如久病嬰兒奪其父母嗁飢雖切漠無動念而仁人君子從鄰舍來撫摩過于己出喘息漸蘇方知有生之樂其如鄰翁之不得久處何也然敝鄉之民沐甘雨和風之賜從此支持縣力皆戴德之年凡可爲老公祖效五袴之歌者家嚴已命之不敢忘也

答儲文曙

諱顯祚

襄陽宿號劇郡兼以征兵轉餉之餘楚地驛騷殆徧守土者倍費拮据卽功令忽嚴而平安集哀鴻可念其未可以鷹鷂易鸞鳳也老年文茹蘖爲味運斤成風卓然治平第一至于以完糧作欠額豈司帑之別那抑部冊之混亂乎當事者知行法而不知核實錯謬種種每爲人笑了不足以損吳公治行直別白之可矣

答沈愚公

諱匡濟

居高者難如水之心御劇者難迎刃之手兼此兩長指不多屈台丈何其裕如也越俗好波而聲光所在又往往交相陵軋錢塘固首邑將以表率諸長令而弭其心目其難其慎倍于他邑台丈得無深思而卻顧乎民瘼國是端有厚賴詎止榮施梓里竊願附古人諤諤之義也

答宋希文

老父母親民如子治虞如家幽隱之情朗然畢照人盡託衽席之安也民之無天忽迴福曜豈弟君子之歌方與琴水同韻某託在

棠陰久沾湛露瞻歎之懷實倍倫等輿人之頌豈敢後焉辱翰施遠及殊發其愧素絲附獻聊代生芻伏惟節哀珍重

答畢白陽

諱自嚴

恭惟台臺文武壯猷勳勞懋著共仰中朝柱石冠冕天曹屬以津門之鎖鑰無人榆關之轉輸不易暫借斗望用展鴻謨從前虛耗之弊止因兵冗而餉糜卽今對證之方不過清兵以核餉故欲省餉先練兵兵練而老弱者汰詭冒者清若欲省兵又不如省將一將之費可以養無數之兵台臺酌盈濟虛守經通變幾于點鐵量沙之妙而九天九地之神幾足食足兵之全用則未易仰窺淵涵萬一今茲額首以觀爲國家根本得人慶又爲神京緩急有賴喜也台臺其終懋之某迂愚無所知識獨有好德之思耿耿不寐況辱在世譜之末乎拱聽履聲之入矣

答王蔥嶽

諱洽浙江撫院

浙爲海內名藩山川之秀麗民物之豐阜從來名公鉅卿康濟之

區也台臺以千尋正氣萬斛弘猷賜履于茲聿新治象乃不肖私竊計憂不在民而在兵兵不盜而獷難馴民即盜而駭易敗也台臺妙運從心樞機坐握無不入人心志使之意動神消者方今宇內多故安危之計實在方叔壯猷矧時情翻覆非深心定力如台臺又誰爲主持以扶陽德而消黨禍哉

答祁西巖

詳送吉

子瞻爲養生說曰安日和養民之方通于治民長令號民父母凡以安之而已故曰政在養人夫心和氣和而民之和應之此循良之上理也讀來教勞絲就緒漸覺安和只此二言已該政譜理煩御劇無非是物民之疾痛痾癢不勝調如父母之心恬意盡拊摩赤子而不厭即理天下可也何獨一邑哉循聲正茂前路方遙尚勉終之以需峻擢將世道有寄梓末分光矣

答閔非臺

造物者因此一方民商羊爲虐而特予之仁人以拯救之譬如赤

子有慈母之依雖切膚之痛不難去也崑之微德于造物者厚矣老父母出真實心爲地方造命撫如傷之民振久弛之法遂使豪猾斂手士庶興歌餘波所潤敝邑如在懷保豈獨弟分蘭譜之光逢人讚歎其何能已若治術之妙雖欲再效千慮之一亦不過無倦一言止矣老父母儻訝其饒舌乎

答申立渚

時事多艱急才實甚老年翁深心卓識未竟其施天之所篤忌者不能掩也矧牽引舊案時有乘除固知多口之無傷而今已溫綸特被則特簡可指日待矣吾鄉寥落振起無人其分老年翁之光者不既多乎不肖妄語弗戒行思歸隱息黥補劓老年翁何以策之

答徐未孩

敝鄉方在水底而當事者視爲不竭之藏呼號之聲當以嘻笑誰復有惻然哀憐者乎老父母出真實心爲地方造命哀此災黎至

甘居催科之拙夫今天下之所乏者非巧也吏愈巧則民愈困地
方何賴焉外謝其華而中殫其赤如慈母于子疾痛之與分燥溼
之與共惟拙故誠也老父母勉操斯志卽古循良上理何以加焉

答練任鴻

諱國事巡漕

漕事日難費盡老公祖心血其冰之早合則天也至敝鄉巨浸仰
藉仁人拯援之力雖輸將竭蹶調苦爲甘敢忘如天大德今幸台
車咫尺矣根本之憂內外交迫老公祖以爲民者爲國何以挽回
氣數而消朋黨之禍哉弟慙愚觸忌眈眈在前亟思引避豐草長
林老公祖何以教我

答徐月賓公祖

民生不辰遭此巨浸而急粟者緩民聊以三分之一塞其嗥呼耳
老公祖下車幾何時昌言請命至再至三若父母之于子拯之沈
溺之中卽濡首不顧也仁人之言聞者隕涕民雖轉于溝壑死無
所恨況徼從寬議折之旨哉雷霆四出至以地方虎冠摧奪我賢

撫從此織璫肆其虐賦斂吸其脂加以正官半缺署事者如秦越
人之肥瘠敲剝以應功令春夏之交二麥無望飢民嗷嗷盜賊公
行衙虎四出三吳之爲亂藪可翹足待也老公祖以一身獨肩其
重控訴環繞于側調劑倍費苦心此誠一時之難以爲老公祖累
奈何目前急著在得賢令大疏已及此矣儻可與喻老公祖商之
上江小邑有年青才練者爲敝邑造命乎切膚之計迫于望歲惟
台慈裁察

答余星子

斗大寒城久淹驥足門下了不生厭薄想畢竭心力以治之卽有
瞿塘濫預得不化爲平瀾順流哉勞苦已深賢聲久播無煩意外
之慮也不佞迂戇觸忌行圖友麋鹿之羣然并州故人關心自切
可效齒牙者視機緣何若耳

答周來玉

璫燄方熾正氣孤危所賴翁臺領袖羣賢生色朝堂忽聞居廬之

戚相知共爲黯然況辱在聲氣之餘薰澤尤切者乎久無便郵闕
焉生芻之奠茲以水患剝膚上厪軫念情至語迫不減鄭俠之圖
也業與霞城年兄筆舌交爭改折已有端緒卽主計者齷齪相難
要之期于必得共此一方有輕重無緩急只候勘疏一到惟力是
視耳議局忽新忽故忽靜忽歸總如波浪層層翁臺虛中觀之其
何以教我素絲綫綫敢告尊先翁靈几伏惟照入

答傅元軒

老公祖以折檻之忠奮請纓之志當黔危累卵慷慨致身向使廟
堂早借韓范豈至有大方之敗哉事機旣誤急乃需才而老公祖
冒險疾驅危疆生色誅逆定變壁壘一新夫濟之以沈握之以算
前撫一懦一莽皆前車也誅首惡而輯其餘老公祖饒爲之矣翹
首捷音以日爲歲

答孫咸若

高陽老師四令郎

曩臣之釋人各有心不敢言也人各有偏至之心不能持平等之

言也老師發所未發宜乎其或駭焉然爲國守法存此議論可耳
而別有心者致煩其口見之每爲三歎敘防疏中固有人所大不
喜者老師略一敘及而人以爲必用之此其所以紛紛也然不知
者十之三知者十之七且度外置之耳三年勞苦危疆晏然人情
安則忘危書生舌長見短千古同然徐當自定但聞老師有進取
之議似又宜慎重也有便郵乎弟將附一候問之牘幸示之大才
偶屈甚爲快悵遇合有時正宜沈詣以需并此奉慰

答葉震孩

諱有聲福清令

每念年丈品望應在本天乃屈之簿書殊非其格然天下國家之
事盡在宰百里之中從此練習隨方遊刃入而慷慨言天下大政
未有不親切有味鑿鑿可見施行者也聞中之頌政績者推爲一
時翹楚同心之助日盼望之弟附兄弟之好竊分蘭臭自不敢後
彈冠之誼也

答吳玄垣

諱尚默四川按院

蜀事難于始尤難于終也始如奕家劫勢著著緊殺其勝敗之數
乃在收局一著失算此局全輸矣奢酋倭伏我以靜勝以穩勝蓄
力布謀惟先惟密年台沈毅之力定優爲之察吏安民又無須贅
矣

答張澹若

諱履端東鹿令

年兄聲實並茂俄當高議青瑣之班矣此遽廬一宿乃爲拮据播
遷支持版築只此一片眞實心天下事何所不可爲力持清議百
折不回從此預卜而他日姓字與雉堞俱高亦一不朽之業也爾
時正如貧家作苦安得餘粒及人大惠不已多乎


答宋一衷

年臺以清風白日照臨一方墨吏解綬去矣懸鏡之下心膽俱動
豈復有怙而漏于網者而俟旁觀之采撫也兩耳如塞無可以報
獨廷議日紛正氣雖旺而時有飄蕩吹激之患安得年臺早至出
鐵筆玉尺以定之哉

答胡浮冶

楓葉蕭蕭戍樓高處年仁兄談笑而淨胡口禪家有以瞋喜作佛
事者知指麾之下喜動三軍生氣十倍矣仁兄得毋爲之一笑乎
長安光景日新月異眞以杜門卻掃爲上著耳每欲于攢眉相向
處更覓歡喜佛也白岳年兄聞尚滯蜀中仲雪亦久無聞問矣報
代之牘不敢復報相思耿耿引睇宣雲

落落齋遺集卷六



落落齋遺集卷七

西臺書牘下

答趙總戎

將軍提戈荒塞耕不毛之上而食之外靜烽煙內寬輸輓勞苦功高登壇已晚然國家用人之意與樞輔知人之明將軍蚤夜以思報稱未易臥薪嘗膽與士卒同甘苦乃可得死士而滅口酋恢故土也金城之績期于振旅而還不負僕推轂之初言分光甚大且遠若以胼胝之餘爲惠則前固明以告矣誓不飲汗馬之血也雅意惓切佩之不忘幸毋以卻見罪凡可效齒牙者決不敢有愛惟心照之

答蕭德化

視篆兩月正當積蠹分絲之後訛言隄枕之餘獨力孤懷步步思蹶所賴門下如珠之圓迎刃而解分其瘡而釋其負每念往事意常在廬陰滄浦之間也芳聲已發上考旣書不佞當候飛舄于春

明門外又辱白雲分贈乎

答董鳴廉

翁臺在職方時秉公守正百蠹俱清識拔將才運籌邊計人無間也么磨幻弁以鬼愚人而言者輕爲之動適足以明定力耳西浙名域特借福星以竟經綸之大業維桑生色實多況不佞弟託有師門之雅者乎屬夏繩老在事幸不辱命彼中甚以得賢爲慶也

答黃陽平

向爲鹿洞舊遊一申沈鬱翁臺憐才意熱大發其光凡并州子弟之彈冠則皆不佞弟之生色也感在肺腑矣翁臺以名家法眼起敝維衰士趨文心應爲丕變西江數世後猶被作人之澤也晉秩而竟其施乃得快心滿志脫換胎骨翁臺儻有意乎

答曹薇垣

東省賊勢言者張皇彼中縉紳蹙額相向而撫院疏札都屬夢中猜度之詞絕無的耗且聞撫與按頗有異同按欲撫而撫欲剿然

撫院決非能剿之人弟所以出疏駁之蓋心知賊本飢民有年兄在事苦心竭力安插解散此爲上策且按君爲吾輩同心絕有意思而撫院倡爲掣肘之說故駁撫院者亦所以爲按君而成年兄之事也大率流民復業須有安插之方而飢賊投戈急用保甲之法安知當面乞生者非背後作賊者乎安知暫時僑寓者非陰受驅迫者乎聞當年納價得產者半屬有力之家衙役之輩今或使吐其十之二三以爲隨處招撫收保之計庶使賊黨散有所歸若其中妖孽固亦不能盡無亦未可遂撤我備積炎火而成燎原也年兄飲冰茹蘗所行事皆古真循良不可多見于今世者弟私甚欣幸然須安重持久毋急近功儻見按君爲道鄙意昨見其出疏請告似乎有所不平此中倚重方殷何乃爲爾別有所聞幸密教之大惠附璧不敢分廉吏之俸也

答蔣澤疊

年兄巡行三秦到處盜謐勞而多功矣轉眼冬春早早入朝生吾

黨之色爾時弟又當驅車出矣又奈何云不復問朝事邪吾鄉大水爭改折甚難今俟勘疏到可得大半也玄黃之戰幸已少息彼此爲安靜之計雖未能化爲一家亦少存鄉鄰之面惟肘腋之寇爲憂方大然尚有三分顧忌只外邊政本涇渭交流誠未知所究竟聖躬近安未有慮也近以總憲之推司徒熱中屢傳內旨今雖失其所望猶頗見眷畱殊不可解少宰以資後稍讓今聞擬司空一席而又有欲與少墟者大司馬爲心華所刺頗有不安其位之意秦中諸兄弟甚不喜也貴邑饒父母聞其甚賢自當爲之回護高堂翁不聞有說也吾郡公會之費至時當共商之秦中司道但聞關內之馬噴有楚中舊議廓園先見保畱疏意欲鈔參以年兄亦有公疏而止彼于條陳中漸刺矣年兄斟酌畱意可也

答談中約

恭惟翁臺以經文緯武之才敷歷大藩聲實交懋當此宇內多事亟需才略鎮撫用奏安攘江右枯削之地徵輸之難向所目覩翁

臺苦心擘畫解且逾額乃坐前人之累計曹茫亂大率如斯容爲當事者明告之要亦不足累翁臺也

答李了思

邊備久弛虜情叵測秋高馬肥正邊人枕戈之日仰藉韓范先聲天驕寒膽匹馬不入四鄙晏如使中朝得安枕臥者皆拜台臺之明賜也所望未雨綢繆先事有備長爲固圉之計毋生窺伺之心防不在秋秋可無防矣

答杜梅梁

一別芝眉曠焉七載側聞守茗治行卓冠一時曲突徙薪功成不有每爲慨然嘉歎忽而功翻爲罪議自南來殊不解其所謂總之石孝廉終天之痛不覺入人毅中要不足爲年丈累也此中相知共明前事息壤在彼謗書不至年丈安臥少時當共白此顛末正自不煩過慮耳

答樊我劬

追憶匡城共事心膽相向肩臂交撐庶幾稍可無負三年以來不
佞半在塵路祇今紙上空言毫無實際而台丈到處棠陰且勸姓
氏于峴山碑上來教所謂大破庸人之調者既直道其所得力卽
他日擔任天下事不須問第二法門而不佞之私心推仰安思倚
爲同心之助者亦不出此一言天竭區區以覘事會之何如台丈
勉持其終前期固不遠也

答戚司理

匡雲廬水清夢依依每見西人輒問舊事未嘗不以明公之清慎
宜民爲瘠土額手竊幸掩其前穢長表芳署矣李官勺水都焦矧
于此地不佞甌塵猶在也割俸殊苦敢辭但得白鹿長藉護持則
不佞分光已遠率其耿耿惟台臺鑒之

答霍韻衡

諱鎮宜大拔院

河西孤懸絕塞聞往年虜騎闌入使者走死無弔蓋招釁之易而
綏靖之難也年臺霜清鏡明妙運于淵微指顧之外塞馬不嘶胡

塵如掃武弁亦挾驕兵以侮玩而不能逃空懸之鑑綜核邊事茲
眞第一義乎廷議時復一變正氣在衰旺之間藉我同心早入而
砥柱之翹首隴雲不勝引睇

與母舅孫太素

計違色笑者經歲矣每望弄璋之信而近乃聞爲子虛不勝惋歎
卻喜三表妹已得擇嫁粗了向平之願且善遣胸懷徐俟充閭之
兆可也吾鄉水災獨于母舅爲宜往年焦土合當薄收乎公稅不
逋則舒眉高臥門無叫租之吏卽是貧家太平之樂矣戶中收推
曾否清楚其餘意氣之激總當以一聲彌陀消之所念生計蕭條
何以爲策先外祖母襄事少俟甥歸執紼可也甥之官況所謂舌
長智短不能默默取容亦由家嚴好以名人奏疏時時教勉不覺
少成若性而不知非好官自我之法也母舅定爲一笑時事日難
冬春之交擬乞歸省先發一奴還俟起居并附俸金二兩以將遠
念

與內翁錢斗垣

前于縣中李君附有報命之函想入覽矣邇來天氣嚴寒福履何似岳母舊恙不至復發否甚以此爲懸念也溟南舅事畢竟作何結局路遠無從效力每切不安鞭長馬腹信非虛語然亦可以爲後人不羈之戒從來門祚盛衰不論富貴貧賤視其子弟之謹愿與澆薄耳竊見韓墩一帶率喜犯上而羞孝弟甚至下流無賴其長者敢怒而不敢言只有岳父一身溫恭孝友故門祚亦獨延長正恐後來漸就衰薄而今人所豔畏之溟南不免于禍患則子弟可以相戒矣願岳父時以此意提醒後人也時事日變將挈妻孥以歸計侍色笑不遠矣

答陳鹿萃

時事忽如沸羹方其初發之時猶妄意抽薪沃水而不虞其潰決益甚也少宰在事旦暮補牘借重銓司機緣偶錯遲之至今今正更張布置之時不敢復問天下事儻天意猶存剝復不遠得借翁

兄爲正人之依仍守前議則世道大幸弟固竭其駑力以從五知年兄之後不須兄屬也

答許霞城

年兄行後復有如許變態然小人伎倆總歸吾輩擬議之中可付之一笑也弟既蹈危機進退維谷望年兄之超然眞如仙境推至新春以病行矣否泰有數亦不暇爲世道計也孫姚老吾鄉品力第一弟久志年兄之言不待今日且東陽令偁之甚詳苟可效力斷不敢愛三寸舌也

答陳雲怡

武林一晤備承繾綣每與相知言台丈如玉之溫如鏡之明吾黨一大仔肩之手也方今重陰掩日邪正倒持弟鼠技已窮正望後來之彥爲同心之助然時情所趨自非透悟定力未可依賴台丈中流一柱夢寐信之久已盟之同志銓省二席斷無他疑正無俟台諭之諄復耳

答瞿起田

客歲入都聞年兄孝思所迫星夜馳還得一見老年伯以免終天之憾私歎仁人君子超出尋常萬萬而又未嘗不為世道惜也長安昏夢復當波濤千變之時日月如梭心搖手懶即耿耿知己之思屢操牘而不竟疏節之罪年兄或能亮之至于老年伯靈几之前亦尚關生芻之奠則弟真非人哉而年兄惠念惓惓轉辱翰貺見之愧且欲死宜乎以青揭示蒲鞭之辱也每念數年來同心之誼比于蘭臭迹愈疏而神愈親可謂素交不關世味況正氣孤危之日人情搖蕩之餘自非吾年兄道力高凝孰作他時砥柱尤喜帷燈匣劍光燄尚藏君子已望其寶氣小人未發其妒心重陰之中微陽一綫又未嘗不先為世道慶也向者憂在內今者憂在外璫為虎而南樂為狐狐與虎合禍未有艾年兄為何道而可弟驚直招忌勢必不容行且為乞身之計虞山片石把酒吟詩為期不遠餘且度外置之耳

答同年某

車塵遂具令人氣索獨吾年兄芳韻襲人落子停杯相對有濠濮間想讒言忽出驅除手辣今之塗面登場者夫豈異人也年兄可以此自慰然此君向頗相習略信鄙言方張彌天之網或不復與年兄為難而當此時事翻覆在人歸隱之日年兄得安故園之夢詎非造物之巧于逸我也家庭之間即有參商且須消釋况風影之停正自不煩介介年兄以為然乎令弟來尚未獲晤弟多言觸忌正理歸裝計把臂入林之期不遠矣

答趙淇陽太座師

主持國是全在政本之地而其機先妙合格心遇巷者又在講幄之間太老師以正人宗盟補洽妙手一言而動天心方幸泰交有象雖復暫遊珂里日聽履聲之入頃見大章宜邀溫眷忽而俞二疏之請者豈天地閉賢人隱數實使然抑微有巧播于中者乎時事翻覆適與遜會然後歎哲人見幾可謂如神非體道無欲者未

易語此也不肖狂慙觸忌側目者眾方有白雲親舍之思若世道
憂虞終賴旋乾之手將伏處草莽觀師錫之命以上盛衰之俟矣
仰承台翰不覺覩縷

答陳自公

恭惟台臺直聲壯節標映宇內霜斧東巡海濱日皎惟是法網闊
疏之地忽驚埋輪破柱之威良民以懷奸民以畏事變偶值亂形
倏起此亦神明之所不能驅而禮義之所不能化也長安議論小
有異同正使長亂倒施不肖竊謂非法故主者以覆稿見屬衡命
而久閣之迨公是初明主者旋罷此案遂爲不了而今則無力可
效矣高老先生有言使太守不入察院則亂民遷怒何因三復此
言庶爲篤論紀綱甚重國體攸存台臺母慮其旁滄也伏承台翰
益破疑城至云兩次貽牘乃竟未始一見豈有浮沈之者乎

答繆西谿姑丈

射斗不出蓋有所用之參嶺之入則意見夾持之力而冢公平等

之見也聞冢公欲救大獄意甚切至但選司得久留意兄大可有
所挽回若不肖固聽其所爲卽題差不下尚有例轉可以脫身不
必慮也順德守昨晤意見云已推杭嚴道矣此外俸資有關中一
二人雖不甚知然意見所舉決無所差者將更計之若得毛公祖
往彼題畱舊者尤妙將面贊之也縣公亦有關中之人總以意見
所知爲據耳胡父母題事渠云無難總不誤也何芝嶽請告而著
冠帶間往劉念臺請告而革職奪誥又最好看者新副院一日而
上十疏十疏以淮撫爲主而攻高邑梁谿渭南安邑甚毒併及梅
谷止敬廩園諸人恐必有所處分然似爲楊左陳冤而有汎汎波
及之說則不可解此行後新事也

與陳襄範

仕路風波從無常局然以年兄之如金如玉粹然中和忽麾之于
嶺外此事之不可知者也正人遭折公論自明乃因新義之初翻
兼喜直臣之牽復此又事之不可知者也翹企來旌持平國是消

此偏黨之見以還蕩平之途而近乃聞有居廬之戚凡在知誼共
為黯然伏惟年兄以禮節哀母過其則他日出而抒忠吐赤身名
兩全九原有知應為含笑斯則孝之大者也白安年兄行附布區
區併展生芻之奠幸告之靈几前若弟之多言賈罪三黜已甘湖
山泮渙或可望見素帷也

與孫意白

昨見選君之旨甚急則來期不遠矣數日之間用得一人即微陽
之一綫也弟將去之人而一二關切乘年兄在事不得不告不審
敝鄉兵道的屬何人僉願借重田枝鹿來星海兩年兄望早爲了
之敝縣父母但調得貴鄉之人定佳只年力有餘爲上耳顧職方
極荷垂念據開俸單一紙呈覽貧病無聊過此則冷人無望矣

答周三緘

年臺品望爲海內循良第一借重銓衡生色桑梓方額手而慶不
意顛倒豪傑之用乃爲竊弄威福之方讀玉斲年兄疏足使正人

吐氣所惜俸期稍後虞門不光需之時日則他年挽回世道大機
括也幸善自愛

答何具翁老師

向謝鳳毛令弟攜得老師台翰久無便羽未獲修候此心耿耿時
在左右也禮註挾微擷華煩簡合則允爲二戴功臣開道後學澤
大而遠明德之後定食其報乃賢書不覩三兄姓字大才固晚成
耶諸孫濟濟與東坦同青其矜造物之意亦略可見老師名在名
臣之列而書爲石室之藏千秋不朽業已有在豈向黃梁夢中問
消息乎璫燄方張與楚爲難清流一網時事堪憂似非躍鱗振羽
之日也貧病相尋進退維谷則長安一席地不若故園之穩非某
狂戇誰爲老師發此苦口者乎所惜某謀身之拙以多言賈戾權
璫權相內外側目且晚定爲芟除之首亦第願畱此微軀歸養二
親不敢復問天下事也將來得路幸有馮門生在若王門生亦以
艱去矣禮記之刻尚容商量共成勝舉貴邑陳令業多方鳴謝茲

附其行薄展一芹恭申候問伏惟涵鑒

答方孩未

憶申酉之交伏讀大疏心飛意舞至所謂紅塵赤日之中有白草
黃沙之意則更旨味不盡宇宙間自有真男子一片血膽足辦天
下事足激發天下頑懦不靈之人而事權不一局勢散飛人事氣
數相逼使然乃強以爲翁臺罪案則公論旣已剖分瞭然矣諸君
子商量未定意貴萬全及河南道之稿出不十日而局已變共在
一網之中殆無兩全之著不肖亦嘗再請之新院總以遲遲爲辭
則雖欲效一字于案中不可得也諸君子之苦心非共事目擊或
未易知然當此倒翻世界之日正欲搜尋舊題以爲奇貨庸詎知
遲遲者之非得策乎翁臺靜以俟之鄙言有當否敝差已代徒有
耿耿特在蘭臭之末神交有年率其狂直或不罪也不肖亦且晚
爲芟除之人不敢復問天下事矣

答王歸善

不佞舌與心長力從智短此詹詹者聊以鳴如石之志而已強者
怒之巧者笑之直道詎久容哉臺下何自有昌歎之好謬以伊訓
說命擬不予倫當自師門氣韻不言相感有舍其文而取其志者
乎審此交期他年持清議而定國是必在臺下無疑矣嶺表法疏
習膩其風聲氣習易以溺人儻矢冰立之志克堅其後循良卓異
舉不越此尚重自愛

答顧平湖

吾輩縮綬一方爲貧黎造命如雨露之濡與時俱積更使寬猛之
候漸調而甘苦之情畢透純氣之守妙于伏雌不在矜激才鋒取
效眉睫也台丈本之以廉居之以靜新猷正茂前路方遙率此以
往世道之藉甚遠寧直桑梓分光耶

答朱白岳

天南萬里干戈滿眼杳不得年仁兄行車消耗每一念之慨然三
歎忽于新正連得二札更細詢來役備道長路之艱難兵事之單

棘年仁兄運籌揚武乃居然有數萬甲兵之意始信賢者固不可測具此一副真肝胆則文人騷雅之壇卽是投筆萬里之業也誦報功之疏生氣勃勃爲引一大白遙相慶祝吾輩單車問俗去家十步渺如天外遠近亦復何異所貴策勳立名爲不朽計耳長安近事真堪扼腕欲如年仁兄之聲施絕域超然是非之外何可得也中丞閔曾老弟舊在屬下極荷國士之知文武壯猷勳勳彝鼎定應異數相酬眾論僉同而政府方有印剞之智要之日既久則功乃益懋耳戮力同心以靖四履德威兼用仁義並行出示招懷破散黨類祖班定遠之意以馭之斯長久之計年仁兄深計妙算知不俟弟之娓娓也弟狂直之性觸事則鳴大犯權要之忌孤跡獨立進退維谷每望逐臣之車輒發挂冠之想而危機所伏結舌避之長林豐草之適爲期蓋亦不遠知己天涯夢魂空繞不自覺其覲縷也

答周老師

驚濤怪風之中雖長年三老鮮不顛覆而某以片帆亂流而渡正在搖蕩時也若其不死定須鬼神獲之得一泊岸畱此身以待二親他俱無所復問目下有河東之差度亦未必邀俞旨然勢不可以請告惟此稍爲穩著一人里門再圖謝病俟老師宣麻之日或卽是世道休明之會而逐臣之綵舞蜚夢亦已久酣矣早年入仕途全未體驗學道二字邇來靜觀人情之險幻時事之起伏乃知白馬清流儘非奇禍吠籬偃月總屬家常一切都有定命以此心中廓然儻得十年讀書或者道心不遠台誨所謂外不愧清議內不疚本心奉以周旋敬斯須去耶狂奴饒舌原不是好官之利根聊以發老師一笑而已

侯孫老師

去秋一函附四哥肅侯台履屬軍務倥傯未審徹覽否嗣後狂瞽觸忌進退維谷竊念老師方激昂義勇獎率三軍而某顧陳嫉邪傷世之言進憂讒畏譏之說祇有愾歎何補高深所以數四削牘

輒復閣筆然默默居此者且三月矣辣手險阱有觸必焦相知者
勸之候差以去稍爲正著于斯復有奇發則挂冠有名矣嗟乎錮
人于不進不退之間以行其陰施陽設之計昔人謂難進易退也
退亦豈易言乎老師拮据危邊三年不得見天子而羣小挪揄白
日幾晦以今日之物力中外之人情即使孔明復生犁庭掃穴必
有書生叩馬千古同然之慨老師且奈之何哉所恃聖明眷顧息
壤在彼竟此偉伐徐俟還朝則亦可坐消反側之口而瞻前慮後
日難一日畢竟何道而可至人微密之藏非鈍見所能參也家從
兄奕茂還自榆關備述父母天地之心念之不覺隕涕卑末于役
初不意吐握之及也愧謝曷已片芹恭候伏冀鑒涵

答喻醒拙

諱思恂巡漕

漕事廢弛得老公祖大振起之每讀大疏具有風霜之氣而竅會
熟嘗一似素所練習而出之裕如者才之敏心之精擔當之力真
從來漕事所不經見也第敝鄉民瘼甚于剜肉醫瘡又正官半闕

胥役叢蠹征求之令一下則百弊錯出正供之外費復倍之旗軍
之勒捐官贈私折其慾無厭若當此功令新嚴民畏法而軍益肆
不一禁戢必倍困于往年老公祖定爲災民垂念也敝鄉江陰積
受其毒因年年屬淮安衛故奸旗與糧房老人小甲表裏合一牢
不可破若得台慈矧調一術來兌則民受其賜而糧亦易完亦仁
人不費之惠也望老公祖留意辱手翰惓惓敢布其愚弟行有河
東之役矣并謝垂念

答沈雲升

客冬報函久發矣尚未徹覽耶時事之奇不可盡言至孫老師勞
苦功高納之深寡令人有書生叩馬千古同然之歎蓋以輟錮之
法行驅除之計一一出南樂手危乎危乎非吾輩所忍言也吾鄉
考選人眾而數窄除衷涵古凡鹿平三兄屬前咨外新者十二人
僅可得四人而當權者別有操柄向來鄉評官評套子都用不著
矧弟尤時情之所側目一語揄揚反爲人累每語諸兄各尋頭路

區區總不敢置喙任他有力者好爲之而已揣摩之說似乎吳亦
臨也周湯葉頗有機括其餘且看力量何如數居其阨可爲浩歎
所幸人人曉此局面不以相罪耳澤壘移揭相通此用何妙法恐
所講開者尚未得開甚爲危之奈何奈何弟覓差不得求去無方
岌岌有性命之憂無問官矣年兄亦爲我念之乎

答瞿芝遠

地居省會參謁應酬精神費去十九其定息之餘簿書雜沓十指
爲枯所得疑神清慮以加惠百姓率先羣吏者蓋亦無幾忙中日
月虛聲捷譽直以郡爲寄徑長負此官者眞可歎也惟吾年兄神
明旁徹力量宏遠了辦一切都無難事而興釐實際定應不沒本
懷今之吏治病在窳二千石以精強督率于上使長令凜凜勤民
則令之善卽守之善寬大之中不廢操切亦救弊之道也弟不識
中州吏治如何然大要所覩記則以寬大廢弛者是處皆然欲得
吾年兄遊刃有餘之才不一二屈指乘時得地而大竟其施甚不

可錯過偉伐無前卽爲故知生色多矣弟率心信口大觸時忌求
去不卽得殊苦將以此官還之君父爲故園之遊乃辱年兄遠念
敬謝高誼

與何武莪

向有報函想徹覽矣邇來用舍之權南樂一手握定而時借中旨
以行其所登進者非破甑則燕人卽太宰雅有虛平之志而肘掣
無可奈何益君子道消之日也翁臺避地嶺表澤普功高顯仁臧
用之妙無踰于此近探粵東縉紳之日與計吏之言似乎搜抵加
派地方無大利焉或謂商稍苛或謂官苦括而總之奪有司及大
家之利以代貧民之需則彼地法綱闕疏便其私者已久不覺反
以善政爲小惠耳治道不古民生日蹙良可浩歎翁臺酌時宜而
行仁術想亦欲聞此以觀人情之變故以所聞私布之不肖求去
無方日夕履冰不能效其區區統惟台照

與門人陳清望

忠孝一理本于此心心之所安三公不易也然功名之際人所難言戀舞綵之甘而息冲霄之影仁兄可謂知道矣白沙先生之澤近在珂里儻有得于斯乎新刻雕龍繡虎爛焉不朽之業字字可寶因文以見道進而求之揚子雲不足述也僕亦好織詞近已淡焉忘之竊拙爲權佞所憎乃將返子舍之樂晚矣退就北面以明吾愧

答陸太和

今日楚事之難不在黔下黔已成之亂而楚未然之憂也兵餉騷敝日中黔禍三湘七澤之間嘗恐有呼嘯風雨之夜者吳越巨浸告饑于楚楚粟貴而閉之糴粟不行源易涸則亦病楚翁臺先黔之難何楚之慮而安楚以爲黔是在楚猶在黔也調劑運量倍費苦心敬拭目以觀其效弟迂戇且行矣耿耿不盡

答顧定澤

時事紛紜人情波蕩民瘼國恤大家置之度外所恃賢長令撫循

此殘黎耳政績益茂卓譽翔飛他日世道有人又爲吾郡私慶也江南巨浸當事者直欲沈餒之而後快矢口力爭幾成罪案今一切緘口思故園之遊矣

答盧九台

都下長拂惠風時披爽氣使人有珠玉在側覺我形穢之歎翁兄風華高秀天韻標令退然如不勝衣而卓乎壁立千仞之志日中所覩誰與爲情清源新政歌頌四聞以慧光白意酌苦劑饑公私交利焉庾署卽銓途也翁兄其懋勉之且爲梓樹光矣猥承雲中之札爛然被錦高情白不敢讓而疏慵何以鳴報區區附展願言鑒存弟孤蹤觸忌方擬乞休回車不遠矣良晤何期可勝軫結

答湯參予

新歲連作二牘俱不及附時亦有機緣可圖與意白兄商量借重于秦晉之間而靜長兄謂探之劉玉孺俟呂南溟公祖入一窺其意乃爲穩著事遂中止蓋吾輩道義之雅知年兄以名節爲重不

爭出山之早暮也燕勢方張炙手可熱正人君子一網俱盡而弟猶以孤蹤絲力待當戶之鋤正苦脫身無法耳彼懸險阱挾雷霆以擬我顧念兩親不得爲元白兄之續今將乞休矣年兄綵舞方酣學力日進用世之具斟酌飽滿舉而措之前路尚賒稍俟燕鋒暫斂似亦未晚只愧弟不及盡此區區耳枝鹿兄亦有成議而意白忽去又吾鄉新撫公祖枝鹿意遲慮焉遂亦輟議天下事固有定數非人力所能與也道子以去冬之孟入滇頗自矯矯可慰同人之念中冷玄水一入卽出都可付之長歎萬斛懊惱非筆可盡與曹薇垣

日間年兄聲光益茂澤在民心鄒魯之郊今爲樂土長安之頌不必言矣魏元白忽有處分其故甚不可解大端翻挺擊之案者播弄于其間耳灰任事之氣傷忠義之心年兄定爲三歎瞿心水真誠可以共事已爲年兄委曲言之但不知渠能免于驅除否在年兄持此真誠任事之念則無人不可相信又不必問來者之何人

也弟兢兢救過脫身甚難今已擬乞休不復問差矣先發賤累南還道經貴屬恐有不虞乞年兄差人護之出境但得平穩過去足矣止婦子四五輿而女流幼穉無一知事者損不過五擡蕭蕭行李不甚費驛人也恃在骨肉之愛故敢以聞弟亦且至矣

答胡浮冶

雄邊巨鎮日白風高年臺攬轡其間慨然有封狼胥居之想此亦一壯遊也弟以觸忌孤蹤進退維谷差雖告竣而尚錮之不內不外求一脫身之法日推一日如坐苦海年臺亦復念我乎澤壘久不相聞渠亦正在危機也汪如石倅次僅差一二日竟格不入選然此番人眾而數慳不如遲之爲後日張本弟已擬乞休嗣是不復得通聞問矣辱惓惓遠念并拜黃鼠之惠消我口酒稍平胸中磊塊謝不可以筆旣

答張篤棊

李官之難倍在末路而老公祖冰心愈皎吏民上下之間心恬意

盡入于至誠而不知其故則提衡天下之妙在是矣貴鄉固多賢豈有出老公祖之右相知筆舌關于吏治之衡者斷不敢不竭此心蓋緇衣之好自不容已非足為老公祖重也時事日新重陰蔽日老公祖虛觀其得失亦千秋一大公案附在蘭臭之末輒敢吐此高明以為何如

答劉心統

講四端

自年臺行時消長之機微微動矣嗣後遂潰隄奔注幾于平地陸沈若無射潮強弩惟有引身避之耳年臺勁骨深心屹然中流之砥方持斧問俗事外主持國是挽此狂瀾使長林豐草之間獲觀世道清明之象于願已足何敢復言天下事若同志之中聯合聲氣各從君父起見毋遂以爵祿之餌從風而靡知年臺必有激發之大機權也

答蔣澤疊

兩日之間事且數變近數日之間又大變矣南樂與魏璫為呼應

內外合力以去吏垣去吏部并欲去首揆其所欲者李年伯為冢宰王射斗為總憲不至一網清流不止而外之人情上忌高邑下憎廓園其鼓掌者亦十之六七也天下事一至于此吾輩同舟之勢其能安枕乎弟一疏觸兇鋒幾為元白兄之續適有天幸而免今岌岌不保思覓歸計年兄何以策之目下會推儻可支持則大善否則大事去矣馮少老未知得遂出山否靜長兄品望卓然秦中諸公甚稱之據意白云可借撫按力留其免覲終當借重本省耳近來選君執持少所啟事相知相為之意正復鬱之喉中然此又為清平話矣餘未可一二盡也

又

九十月中有兩番報函矣半月之間翻覆至此已為一網打盡之謀而其必不能容者則觸怒于南樂之人也內魏之毒有限外魏之毒無窮此時燕勢方張而齊越之謀主局亦從此遞變矣貴座師本是同舟遇風之人而往時二三君子好疑遂開吾黨之隙逆

授小人以柄到此大家悔之晚矣總憲欲用長垣弟挂冠謝之耳
年兄料理地方之事無問長安異同繼差者在劉碧山宋荆璞之
間然亦未可預定也首揆將行矣若上亦搖搖不安過此卽爲一
家要其作法之驟用瑞之銳理勢自不可久且靜觀其後耳饒父
母定爲雷意諸事想卽報中間之霞城公疏上內傳已允閣票中
夜易之者自外人也齊之二李爲南樂門生將爲先鋒故一疏入
而蒲州遂得嚴諭機括甚妙祕之祕之延綬武弁袁勳者袁熙宇
之乃郎也須爲破格薦拔

又

近有報函附貴役不知已大覽否會推之事一奉南樂之意旨以
行明明出口無所忌憚而亦無敢逆其意者崔固內外魏之私人
亦取其向爲正人彈擊借之倒戈彼固云待驅除盡了始做一番
至四五年後讓他們再做昨樞輔忽有入賀之疏便云若入城來
把來殺了往時人疑高陽之合于南樂而今始共知其不相容也

然則南樂之毒至矣吾輩豈有能安之理緹騎四出搜訪而南樂
圈又仕籍又分爲五黨之圖以進此種光景真以挂冠爲上策耳
答楊大豫

時事忽至于此漢唐宋季世之象也一身固以去官爲快其如聖
明孤立何所望年兄入而在持回微陽于一綫耳程伯子有云新
法之行吾黨亦分任其責年兄所謂名節太激實至言也晉撫一
推聞舊太宰獨斷甚堅以晉中諸君子多爲郭藩伯地故太宰立
意置之此誠意見之過及思野疏出禍機甚深而當事者以爭辯
爲快心驅而納諸陷窞不自覺也總之借題于晉撫又移禍于郭
藩年兄在地方言地方畱之自是正理但因此一爭去部去院而
臺省爲之一空恐終須一引避耳大疏斟酌極當且又撫公所同
待其旨下而上之正自無嫌也衛輝司李之量移弟不知其故若
宛推乃見立一家聞亦關中諸君子所棄且大來年兄曾一點綴
之彈章正合公論俟晤間當道尊意耳弟觸時相之怒幾無餘生

將乞歸以謝之不願復問天下事矣雅意惓惓有逾骨肉惟有心刻

答王念生

年兄行後遂有許大風波別是一世界矣年兄品望如百鍊精金市有定價東西南北無所不可年兄必欲為真王也應從彼中問之奈何向不合時宜之人商得失哉一笑近論紛紛無暇言及吾鄉之事而區區心舌不敢為知己吝只苦力薄勢單年兄何以策之時事關目都在邸報弟得罪權相度必不免思圖歸計若得年兄既入要地而後長往則真大快不審得遂願否

答何武莪

承示援黔績次燎如指掌非熟嘗其款會者不能知不能言至其大端業共知之而未有言之者黔以後局掩前局欲理前局俟現局稍定耳聖明寬大不令當世有介子推也國本一案秉筆者不敢掩功亦既有成諾若先帝諭旨篤念聖母山陵情至語危讀之

潜然可涕并當屬之秉筆者明台臺闡揚聖孝之忠藎也時事忽如沸羹清流幾于一網得劍履還朝作中流之砥正氣永不剝落所關消長甚大日幾幾望之不肖狂愚觸忌方在怒濤駭浪間力理歸楫恐無以終副惓惓之雅率略布謝并獻寸芹諸惟台照與周柱羸

憶丁巳謁選遂辱年臺忘形之外在苒五年寸心相照比方聯南牀之坐而忽戢高岡之羽君子道消早為兆卜自此驚濤屢作璫燄日張直臣至抱痛幽泉又何問拂袖挂冠者乎然後羨年臺之超然事外小屈行且大伸即就眼前實際而維揚雄鎮露湛霜清吏之洗心易腸者幾何民之瞻帷戴德者幾何建牙偉望蚤樹之標視弟之孤蹤觸忌進退維谷者何啻霄淵也每與令兄年丈角子談心輒深故人雲外之想行覓歸帆望羅浮而索醉矣

答李瑤圃

天曹冰鏡借重年臺此世道之幸不獨為桑梓光也憶客冬羣議

僉同而舊宰獨知之契堅不可奪然意見之角遂開水火將有漢唐黨錮之憂乃信用獨之不如用眾而年臺一人之用舍卽世道否泰之關昔賢謂吾不西行大禍不解其年臺今日之謂乎幸早驅車以慰同志之望伏聞鼓盆之戚未申弔問先辱遠貺不益之媿乎知己之誼不可卻一芥附奠年嫂希鑒入弟迂愚取憎方覓歸計當相遇于驛舍矣

與解石帆

年丈行後驚濤怪浪日異月新今且滿船俱覆矣向來當事者奸行其意如絕磴孤攀退無餘地罡風吹墜人人在深谷中言之可爲浩歎偶閱宋史元符元年河南人獻玉璽遂有次年同文之獄事數巧合豈盡人力吾輩一身何足計所憂者國事耳年丈優游故園超然是非之外碩果不食斯世道大幸然長垣且出辣手可畏年丈正氣千尋自有以壓之不俟弟之鯁鯁弟迂戇觸忌日有不測之憂捱至春初得生入里門無所復望矣年丈道義之愛有

踰骨肉得無爲我念之乎久無便郵簡于書問辱承不忘率布縷縷勿以視不相知者又爲罪案也

答沈雲升

纔幾時不相聞而長安鼎沸驚心駭目岌岌乎有漢唐黨錮之憂不能不追咎于往日當事之人也取二三孤刻好奇之士開吾黨水火使小人起乘其隙而向之號爲君子者亦復且驚且喜以一洩其不平之氣將不免潛移默化入其勢凌利誘之中此則世道之所大憂年兄以爲然否以正直忠厚如年兄何風波之云向所言者乃槩言世局之紛紛耳每當二八月之期何人不在推敲之內蓋執語言字句以求言外之指歸此向來諸君子膏錮之疾然實未嘗擬年兄卽所謂弟之效力者亦風影之談也今時移局變舊話俱不足提只大家相同舟遇風之勢爲要緊義耳弟觸權相之怒憂在性命無論一官升沈若春初得理歸楫卽萬幸也靜長兄已擬學憲吾輩心事已了諸不多及

與許霞城

年兄行後羣小披猖毒蝕日甚恐同文之獄尚未已也正人幾何
堪此摧折可惜聖明勵精之意乃為無忌憚者借以行其報復屢
在國家何處痛哭昔人有言新法之行吾黨不得不任其過往時
諸君子若能聽吾輩之言平平穩穩元氣自固二豎不難去也今
若之何弟危幾正伏似必不能倖逃然禍福聽于天即竄逐以去
亦主恩也聞有向權門而乞憐者則雖死不為耳新歲可得秦差
差亦未必下下亦不必到只求脫卻長安便為極樂世界每念風
波危疑中安得復有同心鐵膽如年兄者一冬意氣蕭索實在于
此年兄萊綵方歡且置時事于度外若吾鄉考選正自難處俟五
知足吾兩兄任之銓議主之者相公而陪之者則少宰篤于門牆
之意然考選諸公俱不得與弟無力可效而相知者俱無厚薄之
嫌未必不是一幸也大計中似尚有奇文字吾鄉撫臺亦將易矣
秋風之葉掃除必盡崑山極力歸依所可喜者聊城有必不相下

之勢其隙已開或者變局之始乎枚卜定不遠若得張何老人則
亦挽回之機可借年兄之靈先下一片苦心以為世道計何如何
如縷縷者皆罪案也幸祕之

答何武莪

冬仲一函奉報方擬觀時相機稍盡區區以報明命近接來札且
慨然有拂衣之想見之不覺浩歎方正論昌明人爭馳騫則姑緩
勞臣于天末及時局翻覆死灰盡然則又正人避席之時也然後
追憾諸君子用人聽言舉失其當今中流帆亂誰與共濟哉台臺
有國本邊功抵餉三案炳炳耳目今國本一言大都為時所忌即
王心老已且晚乞歸若邊功抵餉固忌者所不能掩而强者所不
能爭也俟其黨合興闢終當少伸公案且姑靜觀時日展布鴻猷
大疏命使者止之此中告歸者率如秋風之葉故願台臺留作歲
寒之松耳相知星散無可與言祇有孤鬱

答林浴元

李官味如蠟也年臺七年冰力兩地孤翔每于嚼蠟之中時有凌雲之氣左宜右有妙合其符問之上下之口無不以廉明爲頌蓋治譜得自家傳而道味又從師授知他日主持國是必不從世態波靡作笑罵好官也同志之中定應託契直視年臺事如身事何須諄屬時事紛紜乃占定力要在善藏其用以靜以密清華之選自是賢司理本等若春間老師入都則尤如山之重也

答袁九滌

別來音問寥寥都緣路迢雁杳每見明月想山中之遊停杯分韻時也吏治邊防日就頽廢盜官糜餉轉歎乏才思得廉敏強力如翁臺者一生其色濡筆躊躇想時觀會正逢貴督之疏意借計事以素所懷來大發而長鳴之不料狂言觸忌權臣張網爲羅家有二親不得不少避其鋒此志竟鬱于抱讀來教悵然增歎陸景老鐵骨血誠久已逢人爲地卽有讒口無所復畏而張鍾老被彈之後乃切切致疑于弟不可發翁臺之一哂乎計典方嚴無人爲政

黔疏未得卽覆覃恩之典則不能脫吏胥之手未可以正說也李碧老仍還故物眞可彈冠相慶但余二生來備聞太翁之強飯近況之清娛皆遠慰故人之念弟歸期不遠儻可相晤于大江之上也

答曹薇垣

妖民遺孽易靜易擾在守土者撫解有方耳信如移兵蕩掃之計東土久爲戰場非年臺以身任之仁義並用誰能了此局者今村歌巷舞雞犬不驚地方旣拜仁人之賜而福德亦從此無量矣榮膺新命益展壯猷以此實心實力行之坐見開府建牙勒名彝鼎惟招賊之讒聞前事者致憾于按君頗倡此議總之賊黨消除旣盡則媒孽自無所容善後之策尤須留意新按君翟心水端厚人也弟已備與言之且屬元老同鄉當心相照年臺只口不言功爲第一義以消前人之忌耳

答曹根遂

弟生平寡合相知無幾而相知中又生歧路左牽右挽步步俱難
自入長安來集之忽去曾幾何時而年兄又去矣去而褰帷露冕
于西湖之上猶自動人遐思乃虛懸之不進不退之間終日言齊
言楚而茫無歸宿之地嗟乎銓政如此宜其爲人所乘至于全局
俱覆乃弟之口舌不靈效亦可見而又不免以信心之言作違時
之案欲如年兄之安夢故園又豈可得哉正東書焚筆昂首挂冠
忽得手札兼訊來使乃知長卿病起輒已得麟知吾年兄從此生
氣勃勃儻獲借拂拭之靈消其口孽子銘石兄清心勁骨故是我
輩人然使區區作曹邱不幾欲益反損乎正當爲之焚香乞靈鬼
神耳以發千里一笑

與阮圓海

易曰知幾其神乎年兄幾先之哲高人數等而好事者牽之于葛
藤之中清夜思之每爲三歎伊川子瞻一生樹敵到底同鑄黨錮
之碑若使蔡確之徒欲分收一人以去吾知二君子必不願也可

和可爭而必不受小人之攀援君子之品乃見何今之得志者妄
援吾集之以爲重寔不令人短氣哉向有耿耿欲一吐出左牽右
挽終鬱于懷若夫名義所在不能緘口負心而今俱成罪案年兄
翱翔天路亦復爲故人垂念乎既懶作書又苦乏羽乃忽得元甫
使者之便遂慨然一發其不平之鳴嗟乎十年來二三友生落落
紛馳而且成荆棘之林也月明星稀烏鵲南飛繞樹三匝無枝可
棲讀之堪當痛哭

答魏仲雪

懷人之緒日縈于心每爲塵緣所擾亦不得便羽直到南都故落
落如此往歲正論力明稍一舒其狂直之氣原知有利害翻覆然
言官以言爲職不問生死寔顧世局欲依違兩可之間正苦無此
輒舌至官府相激釀成黨禍向固預知其不可而大義已倡不得
不從其他持議之稍苛取途之稍狹諸君子豈曰無過然觀過知
仁弟亦未嘗不效忠告而今總付之長歎年兄靜觀局外定有妙

解尤堪痛者則吾黨二三同志乃自作水火使人左顧右盼步步牽挂耳吾鄉水災爭之頗力幾為罪案當事者意欲棄此一方民以洩燕人之怨可奈何恭甫年兄弟久有契誼偶小疏中汎及東事數語夢想不及于恭甫也而恭甫誤疑之既亦徧告之長安幸部覆稍存其概此心略可自白年兄早已從千里外為吾伸豁相知貴知心豈不信哉弟以多口觸忌行理故園之游年兄得一返棹為十日談乎卓品僅從常調弟豈敢嘿嘿而已特以銓缺為人所先故姑了兄意廓園亦甚著意也以廓園之子子而今被以貪名兄為之碎一唾壺否

答毛禹門

前日同異遂為今日難端君子實授小人以隙口晏然修唐虞三代之容彼乃捷而取之無一矢遺鏃之費而正人已盡矣仁兄觀目前之事豈非從來一大變局哉瑞毒所中在一身之怨尚有怒殺之時而南樂之毒中于齊越之伏戎燕人之新怨驚悍而不可

解凡其從內出者皆其從外入者也霞城之事內已允閣擬而中夜傳入忽復中變蒲州將行矣若上亦不久此下合為一家不過再驅除數人則燕局定而齊越起一年之後恐并用瑞二字忘之則是非乃大亂耳弟一疏觸奸幾陷虎口彼方眈眈必逞願乞身于長林豐草從仁兄續張公玉女之遊未知天與之否日與霞城議疏通之法而或者執賜環之凝想日復一日乃付流水殆亦天也勢窮理極物無不反且共靜觀之聯合聲氣以俟狐魅形銷天心來復耳

答袁公寥

不佞雖涉世未久然所見逸才高韻託志千秋如足下者指不再屈而邀元甫兄之靈傾蓋如故何幸何幸文章之道神于作合曠世相感何況交臂乎微觀足下退然深念鋒藏光闇以善用其才蓋動忍之功多矣不佞信心饒舌方行乎憂患之途願就足下學所未至何敢以師道妄自任也敬謝不敏尊翁老先生以任事叢

謗士大夫自有公評第近議生財思復得疏理之功而不可猝見
人人以任事爲戒則尊翁之公案亦易了矣左牽右掣誰爲斬
此葛藤乎按鹽二院俱已出都不及效力然此非儀之時言亦弗
重空負惓惓見託奈何少文兄前已略悉其概非楮墨所能具陳
恃有心照
與熊青嶼
弟懶于作書一切曠廢而台臺道義之雅時往來于心也機緣不
偶君子道消事已至此夫復何言吾輩信心信道邱壑之中別有
天地矧萊綵方酣鯉庭可授直可置世事度外而聖賢憂國憂民
不忍一膜自封則今日之事知台臺太息流涕不能已已所惜發
難者乃在貴鄉而反先受其禍則諸君子之過也弟亦且晚歸矣
几上餘生言之可涕一官何足道哉但兄持鹿洞碑刻台臺之愛
忘其醜使人汗透重裘然託名公以不朽幸也詎可筆謝賢郎鍛
羽喟然附訊一芹以將言近意遠惟知己鑒之

與蔡元崗

敬啟敝邑舊父母蔡南胡公以恩詔贈官應得誥命而後人無爲
陳請者不佞與舍親繆西谿兩家皆世被其澤比于畏壘今相繼
以罪去矣舍親曾言台臺爲胡父母至戚敦于古誼用敢以此爲
懇其軸止須封司類題其文或貴鄉名公自爲之例借銜于中翰
薄有酬謝謹附上白金四兩幸台臺始終曲成令親九原之銜結
亦不佞兩家之銜結也罪廢之人不敢躬叩臨楮皇恐

答陸景鄴

方今任事之難內外無異而貴陽遠在絕地又當海內凋敝之秋
問兵問餉無所不難乃事權之錯出人情之嫌忌又有難之難者
台臺以血誠赤膽敝精竭力以任之細詢吳簿得軍中狀甚悉未
嘗不服台臺之壯而復惻然念也早已知此調爲相苦然從古真
豪傑必從難處下手使人人縮步誰與成功但願得其安頓之所
既已入黔卽未易他徙方欲謀之知者而黨禍方興不肖以狂言

犯柄臣之鋒遂張羅逐之恩恩去國不敢復問天下事惟伏處林
穴側耳俊偉大業以爲社稷慶而已冰清茶苦豈宜剖俸倒施敬
以璧返幸恕不恭心長喙短莫效區區祇有悵結

答樊鍾陽

黨禍方興誠君子卷懷之日然憂時妙用尚藉正人以回微陽于
一綫年臺何遽堅遯思耶弟以狂言觸忌久拌一官謝之今已得
謹行矣長林豐草不敢復問天下事恩恩布復臨風惘然

答朱白岳

撫院承差回具有一函奉報近來時事愈出愈奇弟爲小人側目
無路脫身而今且安排陷奔借破甑曹郎黨字題目遂逢嚴譴辱
及其親可爲太息生死禍福言官之所不計沒齒編氓亦復何恨
而必以奪黃爲快何罪至此每念年兄在萬里外賦望雲之詩若
以弟之所遭則夜郎皆仙境也貴役分致諸函已爲一一料理度
旦晚可以言旋而弟去國之人從此無路接雲中之札相思相望

直俟年兄開府敝鄉乃瞻色笑耳夷氛未靖兵餉兼籌孤影勞神
百凡珍重

答門人關蓬石

佳卷中想味仁兄孤芳幽韻迥然塵埃之外及見其人如其文竊
念他年用世必以品見不隨俗波靡者也以此附知人之鑒甚幸
近貴同門來乃知有居廬之戚大孝以顯揚爲先惟以禮節哀靜
參文章之妙生生不已化相通則樹靜風生草枯鳥怨皆文境
也僕以狂言觸羣小人之忌張羅布網遂遭嚴譴長林豐草不復
問天下事所望賢輩天路翱翔爲故人生色耳恩恩束裝恃在道
義之知空函布復想能亮也

與蕭伯玉

長安中了無生趣但得吾伯玉比鄰而居寸心如雪貧賤慮難之
際有生死骨肉之情以此眷眷于心未忍遽草絕交書也初蒙放
時尚有辱親之慮牽挂胸次今亦付之幻夢入舟來伸腳高臥黃

梁飯孰矣石尤爲祟三日而行十里此豈章惇之罪哉不足爲鄉里小兒道也向者孤行一意信口而談而今一網牽合羅織如意此後未了之案知復何似年兄如有所聞幸附一行于敝同年龔淵孟處眞友朋相愛之意也去國之人不應復作長安書第私區區于知己卽令師亦止有心照

與王闇生

自別年兄後日坐冰淵幾無生還之望忽然構逐驚魂初定不審法星何日照嶺西聞彼中山水奇絕風土淳樸疏剔吏弊使民夷相安不過出經綸餘緒耳褰帷行部山嶽動搖自是吾輩壯遊遠近正無所異也客冬田陸海公祖別致一公禮以答吾輩公餞誼不可卻已致其一于霞城年兄今以其一奉上弟伏處林壑無緣通往來之牘適舟過京口附致賢公子不知此函何時始得入覽也

與繆西谿姑丈

台車一出都門光景日復慘急然亦謂去此一官他無所憂乃不肖至辱及于親雖倖生還了無生趣至姑丈之波入彼案尤令人扼腕一路尋問消息杳不可得直至京口得見邸鈔已四月望矣然亦未有招疏不知何樣羅砌過郡城盍陽來彼甚爲懸念據云十五人中禹門最輕乃六乎然亦係傳聞之言其餘相去不遠恐未必的也以理度之總數豈應過十萬則分之定無如許如廓兄四壁蕭然此局寧有完理耶天悟聖明再得如賈彪之西行則定有解法否則無了時也今姑靜俟之聞撫公已到可託蓼洲諸兄一覓的耗併商量處法耳禍患之來惟有順命憂之無益想長者自有達觀不肖亦驚魂未定深坐井底思之茫然初得抵舍先此奉候諸容續布

與高景逸

都中違教時猶奉台旨靜以息爭而潰隄狂瀾桑田滄海從來黨錮之禍寧有甚于此者乎台臺大道爲公虛平應物微聞羣小具

有心知而猖鬼一呼震霆立下事已至此夫復何言然使黨籍一
光吾道有主豪傑恥不得與而兕虎不復興歌則亦千秋一大公
案也獨念挺擊變作功臣紅丸化爲對證將且漸矣君父之憂灑
淚何地驚鱗折角網罟方張邱壑之中恐未安枕庶幾立雪三年
傳經下座仰昔樂誨奉以困窮台臺亦不鄙夷之乎向過錫時正
台駕在吳淞間未一申其耿耿今子舍方溫棍蝨自喻村深草茂
足不窺門輒敢一布私臆儻下走尚有危機餘罪者則乞指而示
之行時姜神超託逕解紛之意并爲次及

答楊遵初公祖

春初正申借寇之議而時移事變事與心違放逐餘生旣爲要人
所側目卽伏處邱壑又失二天之庇惟歌勿剪勿伐之章以慰孤
懷耳驚魂甫定杜門養病不敢一通姓名而忽辱瑤函藹然蘭誼
且貺及家嚴尤紉道義骨肉之愛也漕事極費唇舌民生不辰竟
以水底遊魚重累老公祖然非老公祖調飢劑苦仁心仁術則蠹

蠹者無寧宇矣百世之澤誰忍忘之憲節將西家嚴尚擬負弩罪
廢之人瞻望無期祇有婉結肅謝不盡

答曾二雲公祖

老公祖秉公拔才孤寒昂首文額繼而後通之以權此不易之中
道也弟已久絕世緣而親友見責非以爲利循例具牘實以親誼
之重輕爲先後老公祖錄其首名而斟酌其二三可也雅誼倦至
感切于心家姑夫處卽當以台旨致之至地方之事亦有可言者
錢糧侵蠹日甚批出瓜分習爲固然區書飛灑不可勝計在鄉間
最苦白捕而汛地一役尤令雞犬不寧妄謂斷宜裁革又刁悍成
風市鎮各有十光棍扛幫打詐結黨公呈幸老公祖神明之鑑屢
見摧擊而餘燄未息卽敝里顧山鎮向稱清靜近亦爲十虎盤踞
矣領袖者有口曰二姓兄弟老公祖留神查訪俟廉其實而一懲
創之眞地方小戶安枕之賜也饒舌多事聊備芻蕘之一而已

答莊魯餘

都門一晤甚慰聞思弟方憂病相尋弗獲時相過從年丈養疴罷
試暫息六月之翻三年一蜚轉眼事耳如弟放歸邱壑長與野鶴
爲緣戶外草生嗒焉喪我益不知握手歡笑還復有此日否雲中
一羽忽驚蝶夢亦意外一大歡喜因緣也

與魏廓園

弟蒙恩放歸而年兄遂罹嚴譴傷心孤弔三復范滂之言爲送行
文耳雖然聖明寬大霜雪陽春努力前行無庸悲怨弟病頓不能
出戶特遣人問候于途念兄貧甚貸得廿金以供緹騎之費耿耿
寸心祇有遠照

答周來玉

時事如此真堪痛哭弟既得附于翁臺之後可以自信自安卽自
首邱壑亦復何恨但以無頭迷障故貽翁臺以未了之局念之每
爲氣結又未知網張四面吾輩終得高枕否耳告身之繳理無異
同若侗老處止于新給則吾輩便當如例則翁臺已繳似又宜追

回其半若一有參差恐又開一罪案矣承使遠來具感同心之雅
答徐月賓公祖

弟迂愚觸忌幾無生還之望幸聖明寬大放歸田里扁舟南下悔
罪省愆懶性恰宜驚魂始定纔渡江而父老子弟歌舞至仁有感
極涕零者調甘劑苦之方不啻起白骨而肉之也月朔抵舍伏接
台翰慰藉殷殷名已係于卓隸而轉叨忘分之交罪且辱及其親
而更沐如天之貺誼高霄漢歌邁陽春此則我有二天余其一樂
逐臣厚幸古人所無雖沒齒巖穴復何恨哉村居杜門不敢以罪
戾姓名輕瀆憲臺然施而不報草野倨侮是一罪也敕命賚繳儻
有事體異同更乞指揮仰恃台慈不勝阜悚

與高景逸

頃方具牘恭候道履而家姑夫寄示台札使不肖慾心平躁心釋
覺英雄感憤痛哭之語俱不足以入有道者之聽也每自念涉世
太早未嘗知學若使焚林稍息鍛羽不驚歸依絳帳立雪三年此

則造物之所以成我大矣自反不忤何怨何尤然細細思量亦覺
鹵莽儻非聖恩寬大久爲杖下之鬼又安得優游菽水之歡如今
日耶獨念二三知己三木囊頭生死何期撫膺流涕虞山日有亂
形因亂借亂皆殺機也時無賈彪夫復何言不審邇日更有奇聞
否統惟台慈教之

與沈五知

自別年兄後舟中清淨生平未有此適不啻再生之樂也嗣後風
波日急正人都盡而年兄飄然歸來矣甚喜明哲保身獨得道妙
近來文字益務新奇但不知吾輩旣已投林尚有危機罪案乎年
兄幸以所聞詳示之十五人賊案何似近又有一百七十六人之
說雖係揣摩然有後著與否未可知也弟子舍方溫毫不作門外
想以此胸中廓然而六君子檻車以去生死何如可得聞其概乎
炎暑懶得出門特此奉候不盡
與楊遽初公祖

伏惟老公祖以痾瘵飢溺之心軫吳民之厄遷喬旣久臥轍未還
劑苦調弦解苛止亂老公祖之造福于吳民者厚矣雖然追維三
歲之間江流夜靜狐嘯風驅使鄒兗之禍不作者誰之賜也虎冠
翦翼墨吏易腸使杼軸之遺未斬者誰之賜也乃今舍吾民而去
矣議者方以東南爲不涸之倉草菅民命者爲能吏敲吸民脂者
爲忠臣有繪監門之圖上叩關之章者不免爲大戮但不知福曜
旣移之後嗟此哀黎作何光景而不逞亂民魔劫未盡使驚鱗鍛
羽何處覓靈林深淵乎知老公祖并州之念定爲一步一回也弟
杜門省愆承歡膝下讀書荷鋤之外都無些子沾懷古來放逐之
臣少復如此蒙恩已過沒齒爲榮只願厚徼餘庇長得安枕爲太
平之民耳匍匐道左敬獻葵藿以申攀轅之意晤碣石明衡魯齊
怙月諸君子爲道耿結

與魏仲雪

春間于受之處附一函嗣後正覓歸計幸遂所願扁舟南下檢點

身心日星魚鳥儘可相對林泉書卷正足忘年曠觀漢唐宋以來
黨人之禍尚不止此兄宜爲我賦詩把酒不必發感憤之談也父
母俱存兄弟無故古人以爲一樂如弟懶癖間情隨處落落兄所
具曉當其執筆嘵嘵所謂未能免俗聊復爲爾手口已見今日乃
遂本懷兄以不作風波驕我豈有居言路在是非場中而卷舌掩
口爲兩來之變之行藏以保笑罵好官者乎非兄前弟豈發此狂
語只可與起田知他人勿道也兄近況正佳才不才之間善藏其
用知兄素心自足了願此非他人肯道也承劔環之惠時掀髯一
笑

答瞿起田

弟狂愚觸忌幾不得生正在網中幸得之子打破放舟南下兩袖
風輕始覺有生之樂歸來身心無礙菽水餘懽此趣亦復不少獨
念六君子三木囊頭悠悠長夜月沈酒醒友朋之痛不能忘懷而
博觀漢唐宋往轍殆亦天地氣運使然與諸君子命中帶得都亦

付之邯鄲夢界矣念欲一鼓虞山之棹靜對吾年兄道氣素心消
釋餘垢爲炎暑所困不得出門儻秋風漸爽吾年兄慨然生草園
之色者亦山居一大福緣也弟懶不通問而手教輒復先之想能
以野人見恕拜領雅贖誠不忍違附鑿金筆架雕檀筆筒爲異時
青瑣珥筆之用不盡依戀

答錢龍門

自別年兄後忽聞喬擢忽聞盧憂總不得便郵一通慶弔然耿耿
此心時與明月相望也此番變態筆舌招尤只不知口業深重如
此消折得盡否月白風清杯酒笑傲曾從香鑪峰下帶得一片雲
心今日不敢多讓儻清福難消造物所妒則耳熱烏烏又成負罪
引慝年兄應爲我憐念耳野服間遊一晤知己正自有懷然今日
亦不敢必明日事也猥承手訊率布區區令姪年兄希道耿結

答許霞城

日來避暑竹林放腳高臥絕迹城市斷絕書疏生來未有此適獨

念知己迢迢時牽夢寐秋中虎阜之約洵爲快事尚俟與澤壘年
兄訂之恐亦在秋冬之際矣新政日異掃除一空澤壘尚爲魯殿
靈光不知風雨飄搖若何也聊城已去行及崑山矣小人洗眼看
賢宰相巍然獨坐再造出底樣世界黃梁未熟醒夢何時一枕黑
甜各各受用一切置之度外耳繳軸事特費心神非道義骨肉往
復真切何以至此當再問之來玉諸君子以決從違家姑丈容致
尊意別統之惠殊非所宜拜謝不既

答蔣澤壘

弟偶幸生還放腳高臥幾不知天之高地之下所謂雞猪魚蒜遇
著便喫生老病死時至奉行一毫不須預慮以此胸中頗得自在
年兄持斧三秦風清月白快心明眼做了一番實在事業即使卷
懷亦復何恨安知吉神呵護不令惡曜退伏耶魯殿靈光巍然獨
存此亦吾輩一大眉目也虞山狂徒頗有貴介子弟而水滸之編
又設一穿正恐流毒未已要亦不關人力看天意何如耳弟鄉居

絕迹城市若駕過敝邑當移棹郭外一談近霞城欲約爲虎邱之
晤不知乘興得過否賢公子就試則敝寓儘可下榻不須他覓謹
灑掃以待

與錢牧齋

春間放舟南下靜觀世局屈指大端十得八九從前正氣頗旺渠
輩打算驅除忙卻心手故使深林鍛羽稍定驚魂直到滿盤淨盡
時飢鷹餓虎勢無休歇區區勒黨錮之碑伸僞學之禁詎足以快
其心乎此中機局作何究竟翁臺定得其微兼六君子生死關頭
近來頗聞其概否荒村杜門如在井底念欲一領塵立縱觀武庫
顧荆棘滿路不覺趑趄恃有神照耳繳敕之事昨訪張侗老止繳
本身是或一道想亦因虞高二疏故也翁臺如以爲可便當不致
異同幸明示之

與莊若侯

近來變態無所不有總是黃梁夢中幻觀不足以障明眼人也向

苦長安逐隊臭穢滿前今得脫體清涼散髮竹林伸脚高臥此種
便宜非吾輩懶淡之性不知此趣年兄雖復暫息恐富貴逼人受
用不久若弟乃叨爲終身受用耳知己之想時切于懷而村深杜
門都無出理年兄樂境方酣亦豈能遠問山陰之棹卽喪明之戚
誠爲不堪然又須以道力遣之不宜惻惻也靜長年兄亦遂遭誣
可爲太息晤間幸道耿耿

與周蓼洲

翁臺凌雲聳壑不佞弟卽不敢謬附聲氣之同然數年嚮往不在
名場世法中實以清風直道四字爲翁臺屈一指耿耿在心目間
而微聞許可亦似以疏拙見收則雖投林削影之餘不妨一通惘
臆乃者黨禍方深攢眉有罪獨翁臺于廓園兄救焚拯溺義重死
生誰謂古今人不相及乎仰對白日慨然淚下以此知絕交之書
未爲通論也家母舅來知廓園兄生機未斷友朋之痛恨不剜肉
茲區區者九牛一毛仍望慈悲大力點化丈六金身以消此劫而

已儻事有端緒亦希剖示以慰懸懸秋深足健申弔姚母便得一
了識荆之願草率徑瀆想能原宥

與高景逸

溽暑異常恭惟道履安和德業純至以慰四海之望某杜門兀坐
未獲受教于函丈之前非獨憂患之餘舉足多畏而性懶情癖久
違膝下不覺依依長日爲短也學問之途茫茫望洋古人云不得
于朝則山林而已今山林席地恐復相煎見六君子之慘酷不免
惻惻廢箸心如懸旌台臺何以教之廓園事周旋有路已走致蓼
洲所矣蓼洲竟以結姻爲罪案網羅之密淵無靈鱗而蓼洲好以
直言犯當路道力詎能裁成之否乎繳救一節不免爲親躄昨
知張同老止繳本身益因虞高二疏之後爲變通之法不審是否
可從私心皇皇伏惟裁示

答陳中素老師

柱石一移萬事瓦解承言時政付之賈生之痛哭而已然洛社有

人東山未老使小子得所依歸正使沒齒邱壑道味不孤豈復以腐鼠爲念自仲夏入里門如病狂驚悸之後忽爾清涼食息臥起都有生趣意謂閒身暇日可以專精誦讀勉醫寡陋然忽忽三月身心尚未安頓居諸如駛深自愧也荒村削影已絕城市之想緬想春風化雨止有神遊左右而已正擬恭候道履并請教益輒枉台翰惓惓注念老師之篤厚于弟子益非楮墨之所能鳴謝也秋暑未消伏惟爲道爲國自愛

與周蓼洲

音問之隔又兩月矣網愈密禍愈慘死者不可復生令人潛然淚下然則吾輩食息田間豈非曠蕩之恩哉邇來機殼想全付精神在枚卜中不知尚有白馬清流之結算否翁丈定有所聞可以開示村中聾瞽也索居寂照正有佳處四海畏途舉足如阱卽緬懷知己夢寐相牽聊此一通聞問不得便理訪戴之楫也向約繳敕事近張侗老止繳本身似亦一法然不審彼此諸公有無同異翁

丈曾否定決卽欲了此省一挂礙瞻前顧後正自不容草草耳幸直示之

答解石帆

踉蹌去國獨辱知己憐念雲霄高誼當于古人中求之乃知絕交書尚非通論也歸來散髮高臥菽水多歡檢點身心殊覺空曠只是風波滿眼網羅四張生者旣盡枯骨欲灰然于鼎沸山搖之時猶畱陽明一縷得吾年兄爲魯殿靈光儻亦社稷之靈非人力也使節暫南徐觀妙手轉旋以佐中興之業使弟長爲太平之民不作釜魚挺鹿則厚幸矣深村卻掃忽驚雲中之札回想知交笑語道義肝膈之愛真如隔世事矣

與徐月賓公祖

弟名在錮籍棄同糞土餘波所及猶足累人凡在青雲之彥並以遠我爲福何意祖臺雪腸鐵骨憐其失路違眾而哀榮之至再至三情逾骨肉豈所爲昌歎之好耶正修一函鳴其感切候憲務之

少暇家嚴九頓階前而家兄某又傳台札至矣言念宿昔恍然如
夢仰瞻天上已若重淵雖復故人高義世外相看豈敢以葛巾野
服唐突憲臺且以黨人餘垢爲明德累哉伏處荒村永與世緣斷
絕卽圍棋酒政恐動機心矧敢入城市乎緬維道義肝膽祇有夢
魂牽結而已東南民貧賦急人心蠢蠢而祖臺風霜清肅雨露沾
濡遂使賦畝之中獲有寧宇異時再借法曜若周文襄之鎮撫江
南則籍末野夫終當鼓腹一見清光耳家兄方困于諸生乃拜九
天之賜下士之禮亦屬曠遇伯樂一顧驚馬生風一家戴德頂踵
以之矣

與毛禹門

時事都不敢言而仁兄久錮之餘尚不免絕流之網是又何也羅
織已就排解無方仁兄何以爲計每一念之驚心慘目顧不敢輕
出柴門握手慰勞獨念擇禍欲輕則仁兄視六君子已霄懸矣弟
凜凜不測尚幸生還醉夢隨緣儘得自在然觀新政鋒刃日急又

有白馬清流之患未知終得保此餘生否耿耿在心執筆茫然聊
通問訊而已

與蔣澤壘

向辱手教日擬候謝而每接一報愴然者累日不覺寒風射人矣
驅除已盡久知年兄不免在一網中然猶得以藩屏相寄豈非微
陽一綫尚不泯乎行藏之際定有妙裁居今之世出處兩難安知
不以退避爲罪案且宜好酌之也若使大路相容則節鎮一方事
業無量名公鉅卿胥從此出亦何必薄視淮陽況忠厚正直如年
兄櫻忌或不如弟輩之甚也恩詔將下或爲黨人開一面則長林
豐草儘堪逍遙否者未知何處生活年兄觀邇來鋒刃將何抵止
乎弟杜門兀坐卽周老師處不敢破戒往弔何日得知交晤語一
澆磊塊前約敝寓下榻何以不至試事未了敬掃門以俟別具侑
緘希鑒入

與許霞城

弟性懶喜靜數武之外輒覺意灰以此都不出門不得尋吳門之約近來經心入耳總堪悲□欲得知己相對劇談引滿不知還在何年空□蒹葭白露之章而神飛耳皇子誕生率土俱慶黨人儻開一面乎長林豐草尚得逍遙自在而靜觀機局正恐山林亦無寧棲年兄近有聞否將作何究竟也十五人之案歸之撫按吾鄉人數不少大都以撫爲政前年兄云毛公祖意將束之高閣今既有催檄方議了局則原招無賊而招語復輕如家姑夫者未審何以處之毛公祖用意忠厚主于斡旋雖顯勢不容不做而題外做題似亦費手年兄道誼素篤肝腸如雪儻可面詢而善商之乎則亦今之孔融也

與黃白安

驛路傳詩後便彼此曠隔年兄飄然而去弟子處愁城日夕凜凜卽向來促膝圍棋者亦復落落他可知也世局變遷友朋離散光景乃爾正具呈引疾爲兒子出花所纏而彼人代我脫之樊籠外

身輕心快拜德良多只比年兄多上場一出耳策蹇出門顧影自笑標榜不俗位直頗高與年兄合傳旣使臭味不孤獨有糠粃在前之愧耳扁舟南下五月抵家父子兄弟之樂讀書飲酒之歡皆與年兄遙相應和但傳一邸報使人愴然廓園死矣生平子立好爲耿介而不免坐之以贓嗟乎廉吏不可爲恐其子不免負薪年兄何以爲之計弟禁足不入城市每念西湖之約欲于來春了之顧念風波未息舉足便爲罪案何時黨禁少弛得一弔廓園之墓耶追維往事吾兩人頗亦告戒爲天心事互相促激所謂新法之行吾黨不得不任其咎今亦付之南柯一夢矣只願太平無事以安老山林譬如三家村人原不出仕本來面目各各認取國家未嘗負我輩也正念千里故人忽傳芳訊開函獨笑不能已已輒以來韻和得三絕又一絕以爲湖上之盟書之扇頭聊慰相思儻虎邱西湖彼此遊履所至各須急足相聞開懷引滿勝于七級平升惟年兄記取

與姚現聞

罪廢餘垢猶足累人翁臺道義之雅勤惠顧此意真足千古彌天之網知翁臺適遂本懷獨不料太夫人霜柏之恣忽焉凋謝在仁人孝子悲痛何勝要以較節榮名上壽善養既已纖毫無憾哀思當爲少紓也弟屏居卻掃擬走奠生芻爲持有城市之戒卽荆溪敝座師處未得一行且念黨禁方嚴恐哀詞織爲謗書素車指爲罪案少俟風波少息泥首請荆想在鑒原不以疏懶見督也爰爰申奠幸告几筵

與文湛持

弟自杜門後斷遣眾緣痛念師表在邇每欲一參玉塵兼弔命甥于廬而驚心慘目日新月異友朋生死之痛草樹都復牽懷河水悠悠黯然廢新禁方嚴邏卒滿路不如兀坐一室且免罪也尚擬殺機少息春山共賞不知得了此願否從前小草既未讀書今方討得閒身而俗腸鈍質茫無入手索處三家村中真如井底

蛙也虛此一蕃放逐不得學古人一事翁臺何以教之性懶書疏積想歲時僅一訊問別附土物託家母舅道不詳

答徐石城


都中一接光範鄙吝爲消爾後踉蹌去國不得觀曲江之勝獨念同里當扼半爲時詬厲而翁臺新砌初發雲路方高端志貞趨早有壁立萬仞之意其仰贊新政爲同里之光可券俟也理官之難在上下間苟欲市恩不免府怨苟欲避怨又恐招愆大率居之以慎而出之以如不得已之心則無往不孚矣至于秉公執法約以平情高明自饒爲之何俟下詢芻蕘哉罪廢餘生鍵關思過近且殃及一弟已無復人世之想而高誼殷渥重以謙光豈草野所敢當此儀刺并璧祇有心佩

與蔣澤巽

弟于冬季有舍弟之變傷心慘目生趣都盡陰陽人道之患二者交併殆是口業深重罰不盡辜惟有枯坐懺悔而已知次公采芹

大是嘉慶若浮雲一官年兄素不挂胸次即彼婦之口正足令人
千古不足爲年兄太息也十五君子之案催逼日甚聞禹門處略
已就緒託在知交邈若秦越方捫心自愧乃家姑夫更苦乞貸無
門敝邑同輩寥寥力乏義薄反思借才異地託弟告急于年兄以
向來道義之雅或亦在所慈憫許以義盟亦涸轍更生之德在年
兄從心量才非弟所敢強也恃愛代達不罪唐突

落落齋遺集卷七



70030565

